

الطبعة الثالثة
2016

سنة أولى مصنع



الكيميائي محمد عويضة



تصميم الغلاف

كيميائي / أحمد فؤاد

هذه الصفحة تركت خالية عمدًا

2016

سنة أولى مصنع

الطبعة الثالثة

كتاب يحتوى على العديد من مفاهيم الصناعة و ما يرتبط بها من متطلبات و تدريبات تؤهل من يعمل فى المجالات الصناعية لأن يكون على قدر من المواكبة لمتطلبات السوق الذى يهتم بالعمل المتطور الذى يؤدى عمله بكفاءة عالية بما لديه من خبرات متراكمة و مهارات مكتسبة .. و الآن أتمنى لكم قراءة ممتعة



بِسْمِ اللَّهِ الرَّحْمَنِ الرَّحِيمِ

{فَأَمَّا الزَّبَدُ فَيَذْهَبُ جُفَاءً وَأَمَّا مَا يَنْفَعُ النَّاسَ
فَيَمْكُثُ فِي الْأَرْضِ كَذَلِكَ يَضْرِبُ اللَّهُ الْأَمْثَالَ (17)}
سورة الرعد

لكل انسان وجوده و أثره و وجوده لا يغني عن أثره لكن أثره يدل
على وجوده فلا تغادر هذه الحياة الا و قد تركت من لمساتك نورا
لمن خلفك حتى اذا مروا من الطريق يوما قالوا
لا بد أنك كنت هنا!!

تحت رعاية جروب وظائف كيميائيين

كتاب سنة أولى مصنع

بصمة في الحياة من إعداد

كيميائي / محمد عويضة

الطبعة الثالثة، يونيو 2016

حقوق الطبع و النشر محفوظة لكل المهتمين بالكتاب بغرض الإستفادة الشخصية فقط لا غير و من يجد
غير ذلك يبلغني

هذا الكتاب هو صدقة جارية على روح أبي الحبيب رحمة الله عليه

أسألكم الدعاء له و لأمواتنا و أموات المسلمين

هذه الصفحة تركت خالية عمدًا

نبذة عن المؤلف

محمد عويضة، تخرج فى كلية العلوم شعبه الكيمياء الخاصة بجامعة المنوفية. عمل بشركة كوكاكولا - مصر، ثم بشركة شأس لخدمات المياه - السعودية و هى احدى شركات مجموعة نسلة العالمية، ثم بشركة أتكو فارما للصناعات الدوائية - مصر و كلهم فى محطات معالجة المياه بغرض صناعة المشروبات الغازية أو مياه الشرب أو صناعة الدواء.

و هو أيضا طالب فى درجة الماجستير بقسم البيولوجيا الجزيئية بمعهد بحوث الهندسة الوراثية و التكنولوجيا الحيوية بجامعة مدينة السادات، و يعمل على أبحاث الخلايا الجذعية فى علاج تليف الكبد و تحسين وظائفه، و هو عضو الجمعية المصرية لأبحاث خلايا المنشأ الجذعية.

لمزيد من المعلومات أو الاستفسارات يرجى مراسلتى على البريد الإلكتروني

Mohammad_eweda_7@yahoo.com

شكر و ثناء

أود أن أتقدم بالحمد و الشكر لله عز و جل أولا على أن علمني ما لم أكن أعلم من تلك الموضوعات التي يحتويها هذا الكتاب ثم وفقتي لكتابة و شرح مثل هذا العمل و يسر لى الأسباب لذلك.

ثم أتقدم بالشكر لكل من ساعدني على التعلم و أكسبني من خبرته خلال مشوار تعلمت فيه من أساليب الصناعة قديمة كانت أو حديثة حتى تكونت لى المحصلة التي بين أيديكم الآن و التي على الرغم من بساطة محتواها مع كتابتها بلغة بسيطة جدا إلا أنى لم أدخر جهدا فى توصيل ما تعلمته من خبرات لمن سيقروها حتى تعم الاستفادة و إن كانت قليلة على الجميع، كما أرجو أن تكون مثلا لكل من عنده ذرة من العلم فى شيء يستطيع أن يفيد به الناس فليقدمه لهم كما كان غيري من الكرماء مثلا لى.

ثم أتقدم بالشكر لكل من سيقروها و يتعلم منها شيئا أو يعلمها و ينشرها للزملاء من كليات العلوم فى الأقسام المختلفة منها أو حتى من خارج كلية العلوم، فما كان العلم يوما حكراً على أحد أو شيئا غامضا مستغلق المعاني على أحد لأن الله عز و جل يفتح على من يشاء بما يشاء، فقط أخلصوا نياتكم لله و ابدلوا العلم للناس يعلمكم الله من واسع علمه و يوسع أرزاقكم و يزيدكم من فضله .

يقول جل ثناؤه :- { مَنْ ذَا الَّذِي يَفْرِضُ اللَّهُ قَرْضًا حَسَنًا فَيُضَاعِفَهُ لَهُ أَضْعَافًا كَثِيرَةً وَاللَّهُ يَقْبِضُ وَيَبْسُطُ وَإِلَيْهِ تُرْجَعُونَ } (245) سورة البقرة .

و يقول أيضا عزّ من قائل :- { وَالَّذِينَ تَبَوَّءُوا الدَّارَ وَالْإِيمَانَ مِنْ قَبْلِهِمْ يُحِبُّونَ مَنْ هَاجَرَ إِلَيْهِمْ وَلَا يَجِدُونَ فِي صُدُورِهِمْ حَاجَةً مِمَّا أُوتُوا وَيُؤْتُونَ عَلَى أَنْفُسِهِمْ وَلَوْ كَانَ بِهِمْ خَصَاصَةٌ وَمَنْ يُوقِ شُحَّ نَفْسِهِ فَأُولَئِكَ هُمُ الْمُفْلِحُونَ } (9) سورة الحشر

أسأل الله عز و جل أن ينفعني و إياكم بما كتبت فيها و ما بذلت فيها من جهدٍ و أن تكون فاتحة خير علينا جميعا و أن يتقبلها خالصة لوجهه الكريم ... أمين يا رب العالمين.

الفهرس

رقم الصفحة	الموضوع
3	• نبذة عن المؤلف
4	• شكر و ثناء
6	• مقدمة الطبعتين الأولى و الثانية
7	• مقدمة الطبعة الثالثة
9	• الباب الأول: مفاهيم صناعية
19	• الباب الثاني : مهارات صناعية
32	• الباب الثالث: شهادات الأيزو
56	• الباب الرابع : الاسعافات الأولية
63	• الباب الخامس: الأجهزة و الاختبارات
83	• الباب السادس : الكروماتوجرافي
90	• المراجع
92	• نصائح عامة

مقدمة الطبعين الأولى و الثانية

سلام عليكم يا شباب ... دى سلسلة حلقات سميتها " سنة أولى مصنع " بشرح لكم فيها معظم ما يتعلق بالعمل فى المصانع من أول ما ندخل من باب المصنع لحد ما نبقى كيميائيين - مهندسين - أخصائيين زى ما الكتاب بيقول. والحلقات هتبقى طويلة حبتين و مركزة و دسمة يا شباب خصوصا على الخريجين الجدد أو الطلبة اللي لسة بيدرسوا فى الكلية و حابين يستفيدوا فى ريت محدش يزهد من القراءة لأن دى خبرات متراكمة و محدش بيعرف يحصل عليها بالساهل و انا شخصيا طلع عيني على ما عرفت و كونت خبرتى و لسة لحد اللحظة دى بتعلم و حابب أفيدكم باللى انا اتعلمته فى حياتى العملية و اللي ملقناش حد يقولنا عليه فى الكلية و لا درسناه فى مناهجنا العقيمة اللي من أزمنة غابرة و سحيقة و ملهائش أى بُعد تطبيقي ولا أى اتصال بالواقع اللي احنا عايشين فيه، فياريت نركز و نقرأ كويس و نتعلم محدش كبير على العلم دى نصيحة أخ مخلص و الله و يا ريت متنسونيش من صالح دعاءكم لو استفدتم حاجة من اللي انا كاتبه دة ☺.

رؤيتى فى شرح الحلقات هتبقى من العام الى الخاص، يعنى الحاجات العامة أولا هنبدا بيها اللي تهتم كل الناس اللي شغالين فى كل المجالات فى المصانع المختلفة ثم هنبدا نتدرج شوية شوية لحد ما نوصل لبعض الكورسات التخصصية اللي تهتم كثير مننا بردو و هحاول على قد ما اقدر اشرح فى كل حلقة بمثال عملى موجود و الناس شغالين به علشان نقرب الكلام النظرى أكثر. و هنبدا كلامنا بخير الكلام شوية آيات و أحاديث يا ريت كلنا نستفيد منهم و نتأمل فى معانيهم و نحاول نطبقهم بنفسنا بما اننا خريجين كليه العلوم و هى و الله أصل العلم و مادته و مفاتحه و مكانه و ذروة سنامه.

- قال تعالى : { أَمْ مَنْ هُوَ قَانِتٌ أَبَدًا مِنَ اللَّيْلِ سَاجِدًا وَقَائِمًا يَحْذَرُ الْآخِرَةَ وَيَرْجُو رَحْمَةَ رَبِّهِ قُلْ هَلْ يَسْتَوِي الَّذِينَ يَعْلَمُونَ وَالَّذِينَ لَا يَعْلَمُونَ إِنَّمَا يَتَذَكَّرُ أُولُو الْأَلْبَابِ (9) }. سورة الزمر
- و قال سبحانه أيضا : { أَلَمْ تَرَ أَنَّ اللَّهَ أَنْزَلَ مِنَ السَّمَاءِ مَاءً فَأَخْرَجْنَا بِهِ ثَمَرَاتٍ مُخْتَلِفًا أَلْوَانُهَا وَمِنَ الْجِبَالِ جُدَدٌ بَيضٌ وَحُمْرٌ مُخْتَلِفٌ أَلْوَانُهَا وَعَرَابِيٌّ سُودٌ وَمِنَ النَّاسِ وَالدَّوَابِّ وَأَلْأَنْعَامِ مُخْتَلِفٌ أَلْوَانُهُ كَذَلِكَ إِنَّمَا يَخْشَى اللَّهَ مِنْ عِبَادِهِ الْعُلَمَاءُ إِنَّ اللَّهَ عَزِيزٌ غَفُورٌ (28) } سورة فاطر
- عن أبي الدرداء رضي الله عنه قال: سمعت رسول الله صلى الله عليه وآله وسلم يقول: مَنْ سَلَكَ طَرِيقًا يَبْتَغِي فِيهِ عِلْمًا سَلَكَ اللَّهُ لَهُ طَرِيقًا إِلَى الْجَنَّةِ وَإِنَّ الْمَلَائِكَةَ لَتَتَعَرَّقُ لَطَالِبِ الْعِلْمِ وَإِنَّ الْعَالَمَ لَيَسْتَغْفِرُ لَهُ مَنْ فِي السَّمَاوَاتِ وَمَنْ فِي الْأَرْضِ حَتَّى الْحِيتَانِ فِي الْمَاءِ. وَفَضْلُ الْعَالِمِ عَلَى الْعَابِدِ كَفَضْلِ الْقَمَرِ عَلَى سَائِرِ الْكَوَاكِبِ ، إِنَّ الْعُلَمَاءَ وَرَثَةُ الْأَنْبِيَاءِ ، إِنَّ الْأَنْبِيَاءَ لَمْ يُوْرَثُوا دِينَارًا وَلَا دِرْهَمًا ، إِنَّمَا وَرَثُوا الْعِلْمَ فَمَنْ أَخَذَ بِهِ أَخَذَ بِحِطِّهِ وَإِفْرٍ ” رواه أبو داود والترمذى واللفظ له
- عن أبي أمامة الباهلي قال ذكر لرسول الله صلى الله عليه وسلم رجلان أحدهما عابد والآخر عالم فقال رسول الله صلى الله عليه وسلم " فضل العالم على العابد كفضلي على أدناكم ثم قال رسول الله صلى الله عليه وسلم إن الله وملائكته وأهل السموات والأرضين حتى النملة فى جحرها وحتى الحوت ليصلون على معلم الناس الخير ". رواه الترمذى و حسنه فى سننه.

و فى آخر كل حلقة هسيب بردو 3 حاجات :- آية و حديث و مقولة من الحكمة هغيرهم كل حلقة من باب " بلغوا عنى و لو آية " و من باب نشر الخير بنشر الحكمة.

مقدمة الطبعة الثالثة

سلام عليكم يا شباب ... المرة دي يا شكل الحلقات اللي احنا متعودين عليه هيختلف تماما لأنى خليت الحلقات دي على هيئة أبواب كل باب يضم ما يندرج تحته من موضوعات يعنى ممكن تلاقى حلقتين تلاتة فى باب واحد و دة لأن المحتوى المعلوماتى فى الكتاب كبير و كان لابد من تنظيمه بشكل أكثر ترابطا و فاعلية بدل ما هو متناثر كدة كل موضوع فى صفحتين أو أكثر و منفصل عن باقى المواضيع علشان كدة غيرت الشكل من حلقات لأبواب.

الأمر الثانى برودو هو انى زودت بعض الشرح فى أجزاء من الموضوعات و أدخلت عليها تعديلات بالإضافة للحاجات الجديدة اللي هنتكلم عنها زى الكروماتوجرافى و السبكتروسكوبى و الأوشا و الاسعافات الأولية لأن معرفتها مهمة جدا و هتلاقوا الكلام دة فى الأبواب المختلفة من الكتاب.

الأمر الثالث هو انى بدل ما كنت بسبب فى آخر كل حلقة آية و حديث و حكمة، المرة دي مش هعمل كدة لأن الكتاب أصلا انا متعمد انزله فى رمضان اللي هو شهر تدبر القرآن الكريم ومطالعة السيرة و الحديث النبوى الشريف و شهر العبادات و الطاعة و التسامح _ و اللي يا ريت ميبقوش فى رمضان بس و يبقوا فى كل الأيام ☺ _ و كمان حب القراءة و التعلم لأننا أولنا فى القرآن الآية الكريمة اللي نزلت فى رمضان { إقرأ بِاسْمِ رَبِّكَ الَّذِي خَلَقَ (1) } سورة العلق، علشان كدة أنا هكتفى بشوية النصائح العامة اللي موجودين فى آخر الكتاب و أكاد أجزم اننا لو ربنا وفقنا و عملنا بيهم كلنا هنبقى من أفضل الناس.

مش هطول عليكم فى الكلام، لكن أنا بس عايز أكاد على حاجة صغيرة ألا و هى ان ممكن بعض الناس يشوفوا ان الكلام المكتوب دة كلام سهل بالنسبة ليهم و طريقة مناقشته بسيطة جدا و دة حقيقي فعلا و أنا قاصد كدة لأنى وجهت الكتاب دة للطلبة و الخريجين الجداد و اللي لسة يا دوب شغالين جديد و تايهين أو مش عارفين اية الوضع فى الشركات فحببت هنا اعطيهم زى دليل كدة او نبذة عن اللي ممكن يقابلوه بحيث يبنى عليها خبرته بعد كدة و ميقعدش يمشي كل الطريق الطويل اللي مشيناه دة علشان يتعلم و دة توفيراً للوقت و الجهد، و كمان علشان نتجنب الكوارث الناتجة عن قلة الخبرة و عدم العلم بالحاجات اللي بنتعامل معاها فى خطوط الانتاج و المعامل فى الشغل أو حتى فى الكليات بالنسبة للطلبة زى ما سمعنا و لسة هنسمع طول ما احنا مش عارفين و مش متعلمين صح، و أهى برودو بالنسبة للناس اللي خبرتهم كبيرة تعتبر مراجعة معلومات ليا و ليهم و ياريت اللي عنده معلومة جديدة يضيفها لنا و أدينا بنتعلم و بنستفاد من بعض ... و ربنا يوفقنا أجمعين للخير.

عَنْ ابْنِ عُمَرَ رَضِيَ اللَّهُ عَنْهُمَا أَنَّ رَجُلًا جَاءَ إِلَى رَسُولِ اللَّهِ صَلَّى اللَّهُ عَلَيْهِ وَسَلَّمَ ، فَقَالَ : يَا رَسُولَ اللَّهِ ، أَيُّ النَّاسِ أَحَبُّ إِلَى اللَّهِ ؟ وَأَيُّ الْأَعْمَالِ أَحَبُّ إِلَى اللَّهِ عَزَّ وَجَلَّ ؟ فَقَالَ رَسُولُ اللَّهِ صَلَّى اللَّهُ عَلَيْهِ وَسَلَّمَ أَحَبُّ النَّاسِ إِلَى اللَّهِ أَنْفَعُهُمْ لِلنَّاسِ ، وَأَحَبُّ الْأَعْمَالِ إِلَى اللَّهِ سُرُورٌ تُدْخِلُهُ عَلَى مُسْلِمٍ ، أَوْ تَكْشِفُ عَنْهُ كُرْبَةً ، أَوْ تَطْرُدُ عَنْهُ جُوعًا ، أَوْ تَقْضِي عَنْهُ دَيْنًا وَلَآنَ أَمْشِي مَعَ أَخٍ لِي فِي حَاجَةٍ ، أَحَبُّ إِلَيَّ مِنْ أَنْ أَعْتَكِفَ فِي هَذَا الْمَسْجِدِ يَعْنِي مَسْجِدَ الْمَدِينَةِ شَهْرًا ، وَمَنْ كَفَّ غَضَبَهُ سَتَرَ اللَّهُ عَوْرَتَهُ ، وَمَنْ كَتَمَ غَيْظَهُ ، وَلَوْ شَاءَ أَنْ يُمِضِيَهُ أَمْضَاهُ ، مَلَأَ اللَّهُ قَلْبَهُ يَوْمَ الْقِيَامَةِ رِضًا ، وَمَنْ مَشَى مَعَ أَخِيهِ فِي حَاجَةٍ حَتَّى يَنْتَبِهَا ، أَثَبَّتَ اللَّهُ قَدَمَيْهِ يَوْمَ تَزُولُ الْأَقْدَامُ " صحيح الجامع

هذه الصفحة تركت خالية عمدًا

الباب الأول

مفاهيم صناعية

Industrial Concepts

3. و أخيراً خرج ليا المنتج بتاعى أبدأ ادرسه و أعرف بردو خواصه الفيزيائية و الكيميائية و احط له تاريخ صلاحية بناء على تجارب بعملها عليه و أشوف بيتأثر بياية من العوامل الخارجية و أشوف هعمله تعبئة فى اية ولا بيتباع مش معبأ و هل بيستخدم كمادة خام فى صناعة تانية ولا هو آخره من عندى للجمهور على طول و أبدأ ادور له على طريقة تخزين و أشوف كلفنى قد اية على ما خرج لى فى صورته النهائية و أشوف هسوقه ازاي و اقع أسأل نفسي الأسئلة دى ... و طبعا الشركات اللى بنروحها بتبقى خلاص جهزت الكلام دة كله من أول ما قامت فى السوق بس أنا بقولكم على اللى بيحصل علشان تبقوا عندكم علم.

• **البحث و التطوير Research & Development :-** و دة أنا شايف أنه أهم عماد من اعمدة اى صناعة لأن الهدف منه هو العمل على تحسين جودة المنتج باستمرار و ابتكار طرق جديدة و بسيطة و غير مكلفة للحصول على منتج نهائي بأعلى و أفضل المواصفات و مطابق للمعايير الدولية و المحلية و دة معناه انه هيرتبط ارتباط شديد جدا بالاساس العلمى للصناعة لأنه هيقوم على تطوير النظرية أو إضافة أو حذف خطوات منها بحيث لا تؤثر على عملية التصنيع نفسها و توفر لى التكلفة و تزيد فى جودة المنتج.

دول أنا ككيميائى أو فيزيائى أو أى تخصص مننا مش هنمر عليهم كدة مرة واحدة لالالا دول بنمر بيهم على مراحل زمنية و أغلبنا بيفضل فى تانى مرحلة لأن مرحلة البحث و التطوير هى أعقد مرحلة فيهم و لو أنا شغال فى شركة International يبقى حتى محلش بيها بس سهل قوى أعرف هما بيعملوا اية عن طريق ال SOP Updates اللى ال Mother Company بتبعته للفروع بتاعتها اشوف دخلوا اية جديد أو اختصروا اية من الاصدارات القديمة و هكذا.

دة كدة كان نبذة مختصر جدا عن ازاي أقدر أنشئ صناعة أو اية اللى أنا لازم أعرفه و أنا بحط أول خطوة ليا جوة مصنع.

التمرين العلمى هيبقى ان شاء الله فى الحلقة اللى جاية على صناعة معالجة المياه و ازاي أقدر أوصف كل خطوة فيها و اطبق الكلام اللى فوق دة عليها و دة بحكم انى شغال فى معالجة المياه .

ثانيا: تطبيقات من الصناعة

بعد ما اتكلمنا عن الخطوة الاولى فى اى مصنع بدخله هى انى أعرف الاساس العلمي اللى قائم عليه الصناعة و تفاصيل العملية التصنيعية من ال SOP و توصيف كل خطوة فيها ثم الخطوة الاخيرة متابعة التطوير اللى بييجي من الشركة الأم أو اللى بيعمله قسم الأبحاث و التطوير R&D فى الشركة عندي ، دلوقتى هنتكلم عن التطبيق العملى للكلام دة و زى ما قلت لكم انى هعمله على مصنع معالجة مياة بحكم شغلى فى المجال دة و ان خبرتى كانت فيه .

• **الاساس العلمي للصناعة :-** و دة بيختلف من الغرض من معالجة المية نفسها

مثال :- أنواع المياه :-

1. **مياه مفلتره و مُطَهَّرَة** : للاستخدام اليومي فى الشرب و خلافه.
2. **مياه مقطرة : Soft Water** و يتم الحصول عليها بالتقطير أو تمرير الماء العادى على **Resins** راتنجات تنزع منه الأملاح و بتستخدم فى المعامل الكيميائية من أجل التجارب وليس للشرب و تستخدم برودو فى بعض الصناعات الأخرى.
3. **مياه قلوية أيونية** : و بتستخدم فيها الكهرباء لزيادة ذوبانية و تأين الأملاح الصلبة الذائبة **TDS Total Dissolved Solids** و اهم فائدة لية هو انه يتم امتصاصه بسهولة و بسرعة فى الجسم و يعمل على تقليل الفضلات الحامضية و ال **Free Radicals** المسببة للكثير من الامراض.
4. **مياه قليلة القلوية** : لو هتدخل فى صناعة تانية علشان يضاف اليها مواد حامضية زى المشروبات الغازية بقتل قلويتها لكي لا يتأثر المنتج النهائي و يتغير خواصه.

و زى ما شفنا ان فى انواع كتير للمية و كل نوع له أساس علمى خاص بيه و بالتالى لازم قبل أى حاجة نعرف الاساس العلمي لكل واحد منهم و هنتكلم حالا عن مصنع لإنتاج المياة المعالجة قليلة القلوية و المياة المقطرة أو الميسرة **Soft Water** للاستخدامات المعملية ... غالبا معظم المصانع اللى من النوع دة قائمة على حفر آبار مياة جوفية و استخراج الماء منها لأنها بتبقي اوفر_ و ممكن برودو مية البلدية عادى_ و بتكون فى مصر على بعد قريب من سطح الأرض حوالى 180 الى 200 متر أو أقل أو اكثر بقليل و لازم هنا أعرف نوع المياة و أعملها تحليل كامل علشان أعرف العناصر اللى فيها اية و نسبة الأملاح **TDS** و القلوية و عناصر زى ال (**pH & Mg++ & Fe +++ & Ca++ & Cl- & SO4-- & NH4- & NO3-**) و كل دة علشان أعرف أنا هحتاج اية من طرق المعالجة علشان أخلى المية صالحة للشرب.


أولا :- بالنسبة للقلوية لو عايز اقلها مثلا بطريقة بدائية تعتمد على الكيماويات :- بضيف جير مطفى هيدروكسيد الكالسيوم للمية اللى بيتفاعل مع بيكربونات الكالسيوم أو بيكربونات الماغنيسيوم الذائبة فى المية و المسببة للقلوية العالية و بيحولها الى كربونات كالسيوم **CaCO3** و هيدروكسيد ماغنيسيوم **Mg(OH)2** لهما ثابت تأين منخفض جدا فى المية و يفضلوا عالقين فيها **Suspended** زى النشا كدة مش بيترسبوا فبقوم ضايف كلور كعامل مؤكسد على هيئة **Ca(OCl)2** كالسيوم هيبوكلورايت طبعا بدوبه الأول فى **Drums** يعنى (برطمانات بس كبيرة شوية) مخصصة لذلك أو **NaOCl** صوديوم هيبوكلورايت و دة سائل مش بيحتاج اذابة و معاهم

كبريتات حديدوز $FeSO_4$ ذائبة في المية و بحقنهم عن طريق مضخات فبيتم أكسدتها بالكلور إلى $Fe(OH)_3$ هيدروكسيد الحديدك و دة مركب جيلاتيني بيتكون في المية بس و بيشتغل كمُحَثَّر او **Coagulant** يعنى باختصار بيساعد على تجميع جزيئات الكالسيوم كربونات و هيدروكسيد الماغنيسيوم على هيئة أنوية كبيرة طبقة من هيدروكسيد الحديدك و فوقها طبقة من كربونات الكالسيوم و هيدروكسيد الماغنيسيوم عن طريق تجاذب بشحنات الكترولستاتيكية بينهم (اللى أخذ **Surface Chemistry** هيفهمنى) لحد ما تعمل نواة يثقل على المية انها تشيلها فترسب في قاع الخزانات اللى بيحصل فيها العملية دى و اللى بيسموها تنوية تكوين نوية يعنى أو **Nucleation** ... الرواسب اللى اتكونت لى دى في قاع الخزانات اللى بيحصل فيها التفاعلات دى كلها بيسموها **Sludge** او الحمأة و دى لازم اتخلص منها بانى أفتح لها تنزل في الصرف من محابس موجودة في أسفل الخزانات علشان تروح محطات معالجة مياة الصرف الصناعى يتصرفوا فيها بمعرفتهم ☺ .



و بالطريقة دى بقدر اتخلص من القلوية الزائدة في المية و بعد كدة بمرر المية على فلاتر من طبقات الرمل خشن ثم متوسط الخشونة ثم ناعم علشان اتخلص من أى رواسب عالقة في المية و أخيرا بمرر المية على فلاتر فحم نشط **Activated Carbon** علشان يعمل امتزاز **Adsorption** للكلور الموجود في المية و اتخلص منه بعد ما يكون أدى دور آخر لية و هو قتل البكتيريا و الكائنات الدقيقة المضرة و عقم لى المية تماما ... النوع دة من المية بيصلح جدا في صناعة المشروبات الغازية و اللى بيتم فيها حقن ثانى اكسيد الكربون (المادة الفوارة في المشروبات الغازية) و اللى بيخلى الوسط العام حامضى فلو داخله مية قلويتها عالية هيعادلوا بعض و يآثر على الطعم النهائي للمنتج.

ثانيا :- لو عايز أعمل مياة ميسرة أو غير عسرة أو **Soft Water** في أجهزة تقطير بتعمل كدة بس لو أنا عايز أعمل كميات كبيرة علشان غرض الصناعة و كدة يبقى لازم طرق تانية ألا و هى تمرير الماء على راتنج أو **Resin** زى الزيولايت مثلا في عملية بيسموها التبادل الأيونى **Ion Exchange** يعنى بعمل أنا تنشيط للراتنج دة بأيون مش بيعمل عسر في المية زي الصوديوم و دة عن طريق غمر حبيبات الراتنج الموجودة في داخل الخزانات (التانكات) بمحلول كلوريد صوديوم تركيزه كويس فيقوم يتشبع الراتنج دة على سطحه بأيون الصوديوم ثم أعمله شطف بمياة عادية لإزالة الطعم الملح للمية اللى جوة الخزانات اللى فيها الراتنج بس مكرش الشطف علشان ميشلش الصوديوم بعد كدة ثم يجي بعد كدة عملية تمرير المية الجوفية اللى أنا عايز اتخلص من أيونات الاملاح اللى فيها يقوم الصوديوم ينزل في المية و يحل محله أيونات الاملاح على سطح الراتنج و بكدة اتخلص منها كلها لحد ما يتشبع سطح الراتنج اللى عندى كله بالأملاح و دة بعرفه من اختبار العسر الكلي **Total Hardness** للمية اللى خارجة بعد التبادل الايونى ما حصل لو زاد عن المواصفة بتاعتى أقوم أعمله عملية إعادة تنشيط بكلوريد الصوديوم تانى و هكذا ... في انواع من الراتنج بتبقى **Selective** يعنى نوع بيعمل تبادل أيونى مع ال **Anions** بس و نوع بيعمل تبادل أيونى مع ال **Cations** بس و في حاجة أسمها **Mixed bed Ion Exchange** بيبقى الراتنج خليط من **Cation Selective & Anion Selective Resins** علشان يخلى المية منزوعة الاملاح تماما.

المعادلات دى هى طريقة عمل الراتنج (**Resin (R)**) في نزع الاملاح



و المعادلات دى هى طريقة اعادة التنشيط بالملح مرة ثانية :



تلخيص للكلام السابق:-

1. الاساس العلمى هو تقليل القلوية بإضافة بعض الكيماويات الغير ضارة و التى يسمح باستخدامها فى أغراض الصناعات الغذائية كصناعة المياه. و ازالة أيونات الاملاح عن طريق التبادل الايوني فى حالة المياه الميسرة.
2. العملية التصنيعية هى كما شرحنا فى السابق فى حالة المياه الميسرة استخدام الراتنجات و عمل تنشيط لها بكلوريد الصوديوم لنزع الاملاح من المياه أو استخدام الجير المطفأ مع الكلور و هيدروكسيد الحديدوز لترسيب مسببات القلوية فى قاع الخزانات ثم تمرير المياه على فلاتر رمل للتخلص من الشوائب الناتجة عن التفاعل ثم فلاتر كربون للتخلص من الكلور و زى ما قلنا لازم أعرف الموردين بتوع الكيماويات و الراتنجات دى حتى الملح اللى هعمل بيه تنشيط و لازم يجيبولى شهادة معتمدة اللى سمينها **MSDS** بتركيبتها و خواصها و احتياطات التعامل معاها علشان احتفظ بيها عندى لما يجيلى تفتيش و يقولولى بتعمل اية عندك فى المصنع و كل الكلام دة بيبقى مكتوب فى خطوات بالتفصيل الممل من اول خطوة فى العمليات اللى قلنا عليها لحد آخر خطوة فى وثائق داخلية خاصة بالمصنع اللى سمينها **SOP** علشان أى حد زينا كدة لما يدخل يدوله منها نسخة أو على الأقل يعرف هما مخبينها فين و يروح يقرأها يمكن تنفعه ☺
3. و دة مهم جدا التطوير اللى بيحصل على العملية دى كان مثلا زى اننا نبدل كبريتات الحديدوز بالشبة أو العكس اللى هى كبريتات البوتاسيوم و كبريتات الألومنيوم المميهة (اللى مرتبط معاها مية يعنى) **KAl(SO4)2.12H2O** و فى ناس بتعمل تعقيم مبدئي بالكلور للمياه الخام الخارجة من البئر فى مرحلة وسطية كدة داخل خزانات تخزين مياة كبيرة و دة أفضل جدا علشان يقتل البكتريا فى خزانات أخرى و يحافظ على انابيب توصيل المياه شبة نظيفة مش ملوثة و يعمل أكسدة مبدئية برودو للحديد لو فى علشان يسهل عملية تجميع الشوائب بعد كدة بس لازم أهتم بنظافتها باستمرار لأنها بتتسخ بسرعة كبيرة يعنى مثلا بفضيه يوم جمعة كدة و اروح جايب العمال يغسلوه ... و بيستخدموا برودو وحدات **UV** أو غاز الأوزون للتعقيم.

التناضح العكسي Reverse Osmosis

بعد ما اتكلمنا عن الثلاث حاجات اللي هما أول حاجة لازم أعرفها و انا داخل لسة من باب المصنع و قلنا انهم كالاتى :-


*الأساس العلمى للصناعة.

*العملية التصنيعية نفسها.

*التطوير الذى طرأ أو مازال يطرأ عليها.

و اتكلمنا عن التمرين العلمى الأول و كنا عملناه على صناعة معالجة المياه و اتكلمنا ازاي بنقدر نعمل مياه صالحة للشرب قليلة القلوية أو مياه يسرة **Soft Water** منزوعة الأملاح غير صالحة للشرب و لكن للمعامل و لمراحل معينة فى صناعات اخرى، هنتكلم عن التمرين العلمى التانى على طريقة أخرى تعتبر تطور مهم جدا فى صناعة معالجة المياه و هو الأكثر شيوعا و الأكثر موثوقية بردو على النطات الواسعة من الشغل فى المصانع ألا و هى التناضح العكسي **Reverse Osmosis** و كالعادة هنمشي الطريق بناء على الثلاث خطوات اللي فوق دول و هيبقى فى صور مرفقة مع الحلقة لزيادة التوضيح.

- **الأساس العلمى للصناعة:-** كلنا عارفين اننا لو جنبنا إناء على شكل حرف **U** و حطينا فيه غشاء شبه منفذ و على طرفه اليمين حطينا محلول مياه ملحي ذو تركيز عالى جدا و الطرف الآخر محلول ملحي ذو تركيز منخفض ينتحرك المياه عبر الغشاء الشبه منفذ **Membrane Semi-Permeable** من التركيز المنخفض للتركيز العالى حتى يتساوى التركيز على طرفى الغشاء شبه المنفذ ... أما الطريقة بتاعة الصناعة بتاعتنا هى جعل المياه تذهب فى عكس الاتجاه السابق يعنى من التركيز العالى للتركيز المنخفض و دة بيتم عن طريق قوة دافعة خارجية تحرك المياه فى هذا الاتجاه دة كان الاساس العلمى كما فى الصورة.




Reverse Osmosis operating principle

- **العملية التصنيعية :-** زى ما قلنا فى الحلقة الثانية ان فى مصر معظم شركات معالجة المياه فى مصر بيبقى مصدرها هو مياه الآبار الجوفية و دى بيسموها **Feed Water** أو الماء الخام اللي هيدخل على محطة ال **RO** ... محطة ال **RO** فى تشغيلها بتختلف كليا و جزئيا عن المحطات التقليدية الى اتكلمنا عنها فى الحلقة اللي فاتت لية ؟ لأنها لا تعتمد على كيمياويات تضاف للمياه لتقليل الأملاح إطلاقا و لكن تعتمد على نفاذية الغشاء **Membrane** و اللي بتعتمد بدورها على كمية الأملاح اللي سمينها **TDS** و درجة حرارة المياه و ضغط المياه اللي داخل على ال **membrane** و تصميم المحطة ذات نفسها و حجم المياه المعالجة الناتجة عنها اللي بيسموها **Recovery & Capacity %** ... المحطة بتتكون من مجموعة من الأوعية **Vessels** حسب تصميم المحطة هل هي مرحلة واحدة أو مرحلتين أو 3 مراحل و هي عبارة عن انابيب طويلة كل وعاء منهم بيشيل عدد من الأغشية جواه ممكن 3 أو 5 أغشية حسب حجم

المحطة و المياه بتيجي للمحطة عن طريق مضخة Pump تسحب الماء الخام ذو التركيز العالي للأملاح و تدفعها عبر المحطة الى خزانات المياه منخفضة التركيز الناتجة من المحطة و دي صورة توضح شكل ال Membrane المستخدم فى محطات التناضح العكسي و هى أحجام حسب تصميم المحطة.



و دي صورة ثانية توضح تركيب ال Membrane من الداخل :-



و دي صورة تالته توضح تصميم محطة تناضح عكسي على مكونة من مرحلتين :-



و زى ما قلنا ان محطة ال RO بتعتمد فى معالجة المياة على تقليل الاملاح فى المية و هنا بيبقى عندنا 3 انواع من المية ... الاول هو ال Feed Water و هو المية الخام اللى داخلة المحطة على الاغشية ... و الثانى هو ال Permeate Water و دة المية الناتجة من المحطة بعد تقليل الاملاح منها ... و النوع الثالث هو ال Reject Water و دى بتبقى مية ذات TDS على جدا لان الاملاح بتخرج فيها برة المحطة لان مش كل المية ال Feed بتتحول ل Permeate و علشان تعرفوا قد اية محطات ال RO بتقدر تقلل الاملاح من المية يكفى انى اقول لكم ان ال TDS عندى فى المية الخام ممكن بيبقى حوالى 4000 جزء فى المليون ppm و المحطة بتقللها الى حوالى 80 ppm حسب تصميمها لو مثلا مكونة من 15 وعاء يعنى اعجاز ☺ و مية الشرب بتبدأ من 120 ppm ... اهم مادة كيميائية بتضاف للمية الخام و هى داخلة على الاغشية ليست لغرض المعالجة و لكن بغرض الحفاظ على الاغشية و المادة دى بيسموها مانع تكلس أو مانع ترسب antiscalant و المادة دى مهمة جدا جدا جدا لانها بتمنع ترسب الاملاح على مسام الاغشية فتسدها و بتوظها بسرعة فنضطر نغيرها بسرعة طيب مانع التكلس دة بيشتغل ازاى؟؟ دة بيمنع الاملاح من انها تكون بلورات Crystals مع التركيزات العالية اللى داخلة بدل ما هى ايونات ذائبة فى المية بانه بيضيف للمية شحنات تتنافر مع شحنات الأيونات المكونة للأملاح فيخليها تتنافر مع بعضها باستمرار و يمنع ترسبها على هيئة أملاح على ال membranes و يفضل وضع وحدة UV على المحطة لتعقيم المياة الداخلة اليها أو يمكن وضع تركيز خفيف من الكلور قبل دخول المياة الخام الى محطة ال RO بتركيز حوالى 0.1 ppm لتعقيم المياة من البكتريا الضارة لأن أكثر من كدة يودى الى تحلل للاغشية اللى تتكون فى أحد طبقاتها من مشتقات السليلوز اللى بيتأكسد بالكلور و يودى الى تلف الاغشية و اذا كانت المياة تتحتوى على ايونات حديد أو منجنيز بنسبة عالية يفضل أكسدتها بالكلور فى مرحلة سابقة و وضع فلتر أو اثنان رمل Sand Filters لتنقية المياة من الشوائب و نواتج التأكسد قبل دخولها الى المحطة.

- **تلخيص العملية التصنيعية Manufacturing Process Brief :-** الهدف من محطة ال RO هو تقليل ال TDS للمياة الخام الداخلة اليها عن طريق استخدام مجموعة من الاغشية membranes داخل مجموعة من الأوعية Vessels و باستخدام مانع تكلس للحفاظ على سلامة الاغشية من التلف او الانسداد.

- **التطوير :-** تعتبر المحطات العاملة بنظام ال RO من أكثر النظم استخداما فى العالم كله علشان هو نظام متكامل ذو أساس علمى واضح و لذلك كان التطوير اللى بيحصل بيكون معظمه 3 حاجات :-

1. تصميم المحطة نفسه يعنى ممكن نضيف أوعية زيادة بحيث تقلل كمية المياة المفقودة ال Rejected Water و بكدة أضمن أقصى استفادة من كمية المياة الداخلة عندى ، مثال لو أنا عندى داخل كمية مياة حوالى 100 متر مكعب فى الساعة ك Feed Water المحطة بتحول لى منهم 70 متر الى Permeate Water قليلة الاملاح و الباقي 30 متر بيروحوا فى الصرف لأن تركيز الاملاح فيهم بيكون على و بالتالى بيكون عندى كفاءة المحطة دى 70% .. أما لو زودت وعاء أو اثنين يعنى حوالى 10 membrane ممكن ال 100 متر دول يتحلو منهم 80 متر لمية Permeate و أفقد 20 متر بس فى الصرف يعنى كفاءة المحطة زادت الى 80% و دة كان مجرد مثال فقط للتوضيح أما الحقيقة فى شركات متخصصة هى اللى بتصمم المحطات دى و هى اللى بتقول أزود ولا لا مش الكيمائيين خالص.

الباب الثاني
مهارات صناعية
Industrial Skills

أولاً: Good Manufacturing Practice GMP

ال GMP يا شباب عبارة عن مجموعة من الممارسات اللى لازم تكون موجودة و مطبقة فى العملية التصنيعية Manufacturing Process علشان تخليها منضبطة و سليمة و المنتج اللى خارج منها على أعلى درجات الجودة و مش بيعرض العاملين عليه أو المستهلكين ليه لآى خطر من أى نوع و كل فرد فيها يبقى عارف دوره كويس و يشتغله على أكمل وجه .. و حالا ان شاء الله هنتكلم عن القدر الأدنى من الممارسات دى اللى لازم تبقى متوفرة و ممكن أى صناعة تضيف ليها أى حاجة تانية حسب احتياجها.

1. **Hygiene** أو النظافة العامة للمكان :- و دى أى صناعة محتاجاها على العموم علشان تبقى بيئة العمل فى خطوط الإنتاج أو المخازن أو أى مكان فى المصنع نظيفة و مفيهاش كراكيب ولا قاذورات و بتوصل حتى للنظافة الشخصية للعاملين و الزى الرسمى للشغل و الأظافر ... الخ و دة علشان متبقاش قاعد مكبر دماغك فى الشغل و سايب خط الإنتاج يضرب يقلب و هوب تلاقى مديرك داخل عليك و يتخاتق معاك و يقولك انت متعرفش حاجة عن ال **Hygiene** كمتطلب من متطلبات ال **GMP** و خصوصا لو كانت الصناعة اللى انت فيها صناعة أغذية أو أدوية أو أى صناعة تتعلق بيهم ... جيب عمالك و شغلهم بس من غير تنطيط على خلق الله علشان الكل يحبك و خلوا بالكم ☺

2. **Controlled Environment** أو التحكم فى البيئة :- علشان متلاقيش بردو و انت شغال فى ورديّة بلليل و ماشى فى خط الإنتاج بتتابع الشغل و تلاقى عش عصافير فوق المواسير ولا قطة معديّة من جمبك ولا فار بيجرى من تحت رجلك ☺ - القوارض و الحشرات عموما - أو الماكينات مش نظيفة و متعملهاش تعقيم و الشغل داير ولا حد حاسس بحاجة و اقلب يا جدع أو الجو ذات نفسه مترب و الهناجر بتاع المصنع مفتوحة من كل ناحية و بالتالى منتجك متعرض للتلوّث أو المدخنين جمب الخطوط و هى شغالة و أى حاجة تشوف انها تأثر على جودة المنتج نتيجة بيئة عمل غير مهينة للشغل كل دة داخل فى التحكم فى بيئة الإنتاج علشان المنتج يبقى فى النهاية صالح للإستخدام الآدمى.

3. **Process Is Controlled & Well Defined** أو التحكم فى العملية التصنيعية و تعريفها و تصنيفها جيداً :- و دة بيتم عن طريق حاجة اتكلمنا عنها قبل كدة و هى ال **Standard Operation Procedures SOP** اللى فيها بتعرف بالتفصيل الممل كافة مراحل العملية التصنيعية بتاعتى داخله منين و خارجه منين و بتبدأ منين و بتنتهى فىن و اية اللى بضيفه علشان يطلع لى اية باختصار اتعامل مع العملية التصنيعية كأنها مراتك أو زوجك ☺ و بكدة أضمن انها متخرجش عن الاطار اللى أنا حاظه ليها علشان لو حصل أى لخبطة أعرف حصلت لية و ازاي و أعالجها ازاي كمان بحيث المنتج يخرج مطابق للمواصفات كل دة لازم بيبقى موجود عندى بالتفصيل و كذلك الحال بردو مع الاختبارات اللى بعملها على المنتج أثناء انتاجه علشان أتابعه .. لازم أكون عارف طريقته كويس و عندى وثائق رسمية بيها ميبقاش الشغل ماشى بالحب غلط جدا!!!!!!

4. **Daily & Historical Records** التقارير اليومية أو الارشيف :- و دى كارثة لوحدنا لأن المفروض ان كل واحد فى موقعه سواء عامل أو فنى أو كيميائى أو حتى مدير معاه أو بيجيله تقرير أو مجموعة تقارير عن سير العملية دى المشكلة بقى فى تسجيل التقارير دى هل هى فعلا تم أخذها كقراءات حية **Live Records** من ال **Field** يعنى من على خط الإنتاج مباشرة أو من المنتج اللى خارج منه اثناء المتابعة ولا مضروبة زى ما كنا بنضرب الميل فى الرسم البيانى بتاع سكشن العمل بالخبرة ☺ و اعتمادا على ان الشغل ماشى و الدنيا فى اللذيذ و محدش فاهم حاجة ... لأنها لو كانت مضروبة و حصل

أى انحراف كبير فى المنتج عن اللى مكتوب فى ال SOP و معرفتش تلم الموضوع انت و الناس اللى معاك هتبقى كارثة على الكل لأن اللى حصلت الكارثة فى وريته هيتحاكم محاكمة عادلة و يُعَدَم ☺ لأن المنتج هيترمى و الخسائر قد كذا و استدعاء للمنتج من السوق تانى و سمعة الشركة تنبوظ و مش عارف اية أو خلىنا نقول محصلش كارثة بس أنا بضرب النتائج و خلاص من غير ما اتابع و عمال يحصل عندى هبوط تدريجي فى كفاءة المنتج أو الماكينات و انا مش عارف سببه رغم ان كل النتائج اللى انت ضاربها مظبوطة و اخدلى بالك ☺ و داخل المواصفات زى ما هو مكتوب فى الورق و ارجع للأرشيف أدور و ملاقيش أى انحرافات Deviations ساعتها على طول تعرف ان المشكلة مش فى التقارير المشكلة فى اللى بيضرب التقارير فى آخر نص ساعة من وريته و سايب المنتج لما باظ فى الخطوط و الماكينات من غير متابعة لحد ما كفانتها قلت و قيس على ذلك أى مشكلة داخل فيها الإهمال.

5. **Man Power** :- أو الناس اللى بيشغلوا خطوط الإنتاج على كافة المستويات من أول العمال اللى بينظفوها مروراً بالفنى اللى بيشغلها أو اللى بيصلحها لحد حضرتك اللى بتابع المنتج عليها و حتى رئيسك و رئيس رئيسك لغاية مدير المصنع لازم يكونوا مدربين تدريب تام و عندهم وعى كامل بالمتطلبات دى كلها و بيعرفوا يطبقوها كويس علشان كفانتهم هى جزء لا يتجزأ من كفاءة المنتج اللى خارج لأن الماكينات ما هى الا آلات بتطحن فى بعضها لكن الاعتماد كله على العنصر البشرى فى المتابعة و التقييم .

ثانياً: Good Laboratory Practice GLP

ال GLP نفس الكلام هى مجموعة من الممارسات اللى أنا مطالب أنى أنفذها و اطبقها و انا شغال فى معملى علشان تضمن لى كفاءة و جودة و موثوقية فى أداء و متابعة شغلى سواء فى التعامل مع المنتج اللى انا بنتجه لو كان التعرض ليه ببسبب خطر أو الكيماويات نفسها اللى انا بستخدمها بتعرضنى لخطر و ازاي احمى نفسى من الخطر دة عن طريق ارتداء مهمات الواقية الشخصية

Eye Goggles & Hair net & PPEs Personal Protective Equipments - زى ال **Gloves & Face Mask & Lab coat & Safety Shoes** كمان بتساعدنى فى إني أحصل على نتائج تعكس الواقع على أرض الإنتاج من خلال متابعة النتائج اللى يحصل عليها و تسجيلها زى ما قلنا بطريقة صحيحة **Live Recording** .

و مبادئ ال GLP كالتالى :-

1. **Personal Commitment** أو الالتزام الشخصي: - حاجة كدة بينك و بين نفسك انك تشوف شغلك بما يرضى الله يعنى ان كل واحد يكون عارف مسئولياته كويس و يقوم بيها على أكمل وجه من أول أصحاب رأس المال و الادارة و انتهاءً بينا و فنيين المعامل سواء كان فيه فنيين معامل فى الشركات المحترمة أو اذا كنا احنا اللى بنشيل الليلة كالعادة.

2. **Quality Control & Assurance** التحكم فى الجودة و توكيد الجودة :- و دى مهمة لأن فى فرق بين الاتنين ، التحكم فى الجودة QC هو مراقبة المنتج من خلال مطابقتها للمواصفات اللى انا حاططها ليه أو المواصفات المحلية و الدولية للمنتج دة من خلال بعض الاختبارات اللى بعملها عليه و بسجل نتائجها و اذا كان فى انحراف عن المواصفات بصلحه ، أما توكيد الجودة QA فهو العمل على تحسين جودة المنتج بأخذ النتائج بتاع التحكم فى الجودة و دراستها كويس و علشان أعرف قد اية العملية الانتاجية بتاعى ماشية Smooth من غير مشاكل داخل المصنع و قادر اتحكم فيها كويس و أعملها تأكيد كمان Verification يعنى اتأكد من نتايجي من جهاز معين باني أجيب عينة

معلومة و أقيسها على الجهاز و أشوف هيقراها مذبوط و لا لأ و أضع ضوابط لضمان الاستمرار على كدة و كمان من خلال حاجة مهمة و هى شكاوى العملاء اللي بتجيلي بدراستها علشان أعرف القصور جاى منين و بالتالى أحسن أكثر فى المراقبة أو فى الانتاج.

3. **Facilities & Equipments** التجهيزات و الادوات: - و دة بتشمل كل حاجة عندى فى المعمل من مواد كيميائية زى ال **Reagents** أو أجهزة أو أدوات شغل (كلنا عارفين أدوات المعامل) أو أدوات الحماية الشخصية ليا أثناء شغلى و تعاملى مع الكيماويات.

4. **Test System & Reference** طريقة الاختبارات و المرجع بتاعها: - و دى مهمة جدا بردو زى ما قلنا مينفعش أشتغل الاختبارات اللي بعملها كدة من غير ما اكون عارف الطريقة بالظبط علشان اضمن ان النتائج هتكون صحيحة و موثوق فيها علشان كدة لازم اشتغلها من **Reference** او مرجع ليها خاص بالشركة متسجل فيه طرق عمل الاختبارات سواء كيميائية أو ميكروبيولوجية علشان أنا و غيري يبقى عندنا طريقة واحدة معتمدة فى الشغل و بالتالى نتانجنا تبقى على **Track** واحد و بالتالى يسهل عليا انى ألقى أى انحراف فى المنتج بتاعى بسهولة.

5. **Documentation Management** إدارة الوثائق: - و دى لزمته انها بيكون فيها كل المراجع أو ال **SOP** بتاع شغلى و بتتابع أى تطوير حصل فيها و بتعمل اصدارات للتطوير دة كل فترة علشان الناس يبقى عندهم توعية باستمرار بأى تطوير بيحصل و بالتالى رفع كفاءة ال **Man** و ال **Power** و ال **Production** على حد سواء.

ثالثا: Lean Manufacturing & 5S Implementation

أولا أنواع ال Waste المحتملة :-

1. **Transportation** :- يعنى أو وقت أو جهد ممكن يضيع أثناء نقل الموظفين أو المنتج من مكان الى آخر داخل المصنع من الخطوط الى المخازن أو خارج المصنع الى السوق.
2. **Inventory** :- يعنى أى وقت أو جهد يضيع فى تخزين المنتج أو قطع غيار اى ماكينة عندى لأنى خزنتها و كومتها غلط فوق بعض فتاهت فى بعض زى دولاب هدومك كدة 😊 أو لأنى معنديش بيها قائمة واضحة.
3. **Motions** :- يعنى أى وقت يضيع فى إلتفافات أو انحناءات أو مشي أو توقفات ملهاش داعى لأن المصنع مش مترتب و مفيهوش أماكن مخصصة للمارة و أماكن مخصصة لمرور السيارات أو ما الى ذلك.
4. **Waiting** :- انتظار أى حاجة ممكن تعطلنى عن الانتاج زى تعليمات متأخرة ولا ادوات متأخرة ولا خامات متأخرة أو موظفين متأخرين و هكذا.
5. **Over Production** :- و دة لما انتج كميات زيادة عن حاجة السوق اللى عندى بحيث تفضل من غير تسويق عندى فى المخازن و تتعرض لتلف.
6. **Over processing** :- يعنى أى خطوة أو إضافة للعملية التصنيعية أنا مش محتاجها ولن تسبب أى تحسين ملحوظ فى المنتج و هتتعقد العملية التصنيعية زيادة.
7. **Defects** :- زى ما قلنا أى أخطاء حصلت فى العملية الانتاجية هتخلينى أرمى المنتج أو أستدعيه من السوق أو أدخله من أول و جديد فى الخط تانى علشان أصلحه بيسموها Rework أو عندى تقارير مكتوبة غلط و هكذا أو ماكينة اتصلحت غلط أو أى اهمال نتج عنه أى خطأ.
8. **Skills** :- و دى مهمة و أغلب الأخطاء اللى فوق بتبقى منها ألا و هى إسناد المهام لأشخاص غير مدربين عليها أو غير مؤهلين لأدائها فيضيعوا الوقت من غير ما ينجزوا المهمة أو يعملوها اى كلام بدون أى اجادة فنضطر نشتغلها تانى فالوقت يضيع.

و دلوقتى هنتكلم عن ازاي ممكن نتغلب علي الحاجات اللى فوق دى عن طريق ال 5S

ثانيا: يعنى اية 5S

دى عبارة عن خمس كلمات ببداوا بحرف ال S بيلخصوا كيفية التخلص من اى Waste عندى فى العملية التصنيعية و ممكن نطبقها حتى كمان فى حياتنا اليومية :-

1. **SORT** :- يعنى شيل أى حاجة ملهاش علاقة بالمكان اللى انت شغال فيه و مسببة زحمة و واخدة حيز على الفاضى بس مترميهاش فى حته تانية أو على قسم تانى أو خط انتاج تانى بحيث تسبب نفس الزحمة و تاخذ نفس الحيز ، لأ انت بتوديها أو تجيب حد يوديها للمكان المخصص لل Waste وبتعلق

عليها حاجة اسمها Red Tag يعنى كارت أحمر كدة مكتوب فيه اية البتاعة اللي انت تخلصت منها دى و بتستخدم فى اية و تاريخ التخلص منها و هل ممكن استخدمها تانى فيما بعد ولا لا و هكذا مع ترتيب كل اللي موجود فى المكان طبعاً من waste .. استخدموا مخيلتكم يعنى 😊

2. SET IN ORDER: - يعنى أشوف الحاجات اللي فضلت بعد ما شلت اللي ملوش لزمة و أبداً ارتبها كل حاجة مع اللي شبهها لو أنا مثلاً فى معمل يبقى ارتب الماصات لوحدها و الفلاسكات لوحدها و البيكرات لوحدها و الكيماويات الحامضية لوحدها و القاعدية لوحدها و السحاحات لوحدها و أنابيب الإختبار لوحدها و الأجهزة لوحدها و أبداً احدد مكان لكل حاجة منهم على حدة و ألزق عليه Label أو ملصق يقول ان دول كذا و دول كذا و دول كذا علشان الوصول ليهم بعد كدة يكون سهل و أى حد يقدر يميزهم بسهولة.

3. SHINE: - يعنى أبندى بقى بعد ما شلت اللي ملوش لزمة و رتبت اللي ليه لزمة أبندى انظف المكان من حواليتهم " علشان النفس طبعاً " 😊 زى ما الكلمة بتقول كدة ألمع المكان و ألمع الحاجات اللي أنا رتبتها دى و أوفر للعمال اللي معايا الأدوات اللي هينظفوا بيها لأن الشغل فى مكان نظيف و مترتب بيخليك مقبل على الشغل و على الحياة عموماً و بيقلل الخناقات مع زميلك.

4. STANDARDIZE: - يعنى أخلى كل الثلاث خطوات اللي فوق دول عادة يومية عندي بحيث أعملهم باستمرار و اخليهم من ضمن واجبات العمل كل يوم و اعمل بكل اللي فوق دة Check List يعنى قائمة مراجعة و اللي يتعمل منها أحط قدامه صح بحيث اتابع تنفيذهم دايماً بوثيقة رسمية مش بالنظر كدة و خلاص و هكذا و اعمل بيها كمان خطوات لكيفية تنفيذها على الوجهة الصحيح.

5. SUSTAIN: - يعنى أفضل أفكار و أشوف أية اللي ممكن اطور بيه العمل حواليا فى ضوء الاربعة خطوات دول يعنى مثلاً بدل ما ارتب الحاجات و انظفها على البنش من فوق لا أنا ارتبهم تحت فى ال Cabinet او الدولاب اللي بيبقى تحت البنش أو أحط علامات ارشادية للناس فى المصنع كنوع من التوعية بفوائد ال 5S و أهميتها و أدرب الناس عليها كل فترة علشان مينسوهاش لغاية ما تبقى أسلوب حياة مش مجرد روتين شغل و صدقونى اللي بيعمل الحاجات دى بيرتاح فى حياته كتير و الله 😊

و دى صورة توضيحية لل 5S :-

زى ما احنا شايفين كل مرحلة بتنقلك للمرحلة اللي بعدها و كلهم بيدوروا حوالين الاستمرارية لأن ال 5S مش هيقالها معنى لو مبقتش اسلوب حياة ... و فى ناس بيضيفوا كمان معيار جديد و خلوها بقت 6S بانهم أضافوا ال Safety كمان علشان يبقى كل حاجة بتعملها بتخضع لمعايير السلامة بحيث متأديش نفسك أو غيرك أو مكان و بيئة شغلك و هكذا.

انا بقي كراجل فاهم علشان أعرف ازاي أحل المشكلة لازم أعمل تحليل للأسباب السابقة دي علشان أعرف السبب الحقيقي الجذري للمشكلة اللي لو حلته المشكلة تنتهي تماما و بعمل كدة من خلال الخطوات التالية :-

1. **Define The Problem** :- تعريف المشكلة دي يعنى اية اللي حصل بالظبط من خلال المشاهدة العينية أو من خلال الظواهر اللي حصلت قدامى زي مثلا ماكينة عطلت علشان موتور اتحرق ... و هكذا


2. **Collect Data** :- يعنى أجمع معلومات عن المشكلة و ملابسات حدوثها يعنى حصلت امتى و استمرت قد اية و تأثيرها اية على العملية الانتاجية عندي و استعين بالناس الاكثر خبرة منى لو المشكلة كانت فنية بعيد عن تخصصى زي مشاكل خطوط الانتاج و كدة ... من الآخر طلع وكيل النيابة اللي جواك 😊

3. **Identify Possible Causes** :- يعنى ابدأ دور على سبب المشكلة الجذري اللي خلاها تحصل و دة عن طريق مجموعة استراتيجيات للتفكير منها :-

- **5 Whys** :- يعنى اقدر اسأل لية حصل كذا .. ثم لية .. ثم لية ومش لازم 5 مرات بس لا على قد ما تقدر لحد ما توصل لسبب تشوف انه سبب حقيقي.
- **Drill Down** :- يعنى فتت المشكلة لشوية فتافيت صغيرة و امشي ورا كل فتفوتة بالتفصيل الممل لحد ما تجمع كل التفاصيل فى صورة واحدة كبيرة للمشكلة اللي عندك.
- **Fish Bone** :- و دي طريقة مشهورة جدا و اسمها جاى من انى بعمل **Diagram** على شكل هيكل عظمى لسمة و دي من أسهل الطرق علشان بتقسم المشكلة لتخصصات يعنى تحط عنوان رئيسي كدة زي :-

Materials, Methods, Machines, Measurements, Man Power & Environment و ابدأ احط تحت كل عنوان رئيسي الاسباب المتعلقة بيه اللي ممكن تخلى المشكلة تحصل أى سبب مهما كان تافه يعنى باختصار نعمل حاجة اسمها **Brain Storming** يعنى عصف ذهنى و بعدين لما اخلصهم كلهم ابدأ ناقش الاسباب دي مع نوى الخبرة و المتعاملين المباشرين مع المشكلة لحد ما اوصل أنا و هما للسبب الجذري ليها.

و دي صورة لتوضيح كيفية عمل تحليل لمشكلة باستخدام ال **Fish Bone Diagram** :-



4. **Identify the Root Cause**: - يعنى أول ما تعرف اية هو السبب الحقيقي للمشكلة أمسك فيه بإديك و سنائك و شوف هو اية بالظبط و اعرف أسباب وجوده و فصص الأعراض الناتجة عنه و حل علاقته بالأسباب الفرعية للمشكلة علشان توضح الصورة قدامك أكثر و تقدر تحل المشكلة من جذورها.

5. **Recommend and Implement Solutions**: - يعنى حط توصيات للحل بناءً على تعريفك للسبب الجذرى للمشكلة دى و الحلول بتنقسم لنوعين :-

• النوع الأول :- حلول تصحيحية **Corrective Actions** و دى بعملها بسرعة علشان أعالج الأعراض زي ما عملنا جبيرة للراجل اللي ذراعه مكسور - فاكريته - علشان امشي شغلى و معطلش انتاجي.

• النوع الثانى :- حلول مانعة أو جذرية **Preventive Actions** و دى بوصلها بعد ما اعمل التحقيق اللي فوق دة و أبدا أحط لنفسى خطة عمل و أجزاء الحل أجزاء و أدى لكل تخصص الجزء بتاعه و أسجل دة فى جدول كدة المشكلة و الحل و الشخص المسئول عن الحل و هيخلص امتى و ازاي هنفذه و كل دة علشان أمنع تكرار حدوث المشكلة دى ذات نفسها تانى ما انا مش فاضيلها بقى و رانا مشاكل تانية عايزين احلها بردو .. ولا اية؟؟

دة كان بالمختصر المفيد (الزتونة يعنى) بتاع ال **Root Cause Analysis** و اللي عايز زيادة يكتب بس الثلاث كلمات دول فى جوجل و هيلاقى من خيرات ربنا كتييييير ... و فيه لينك جامد جدا فى المراجع لشرح الطرق دى بردو و زيادة عليها كمان للى يحب يطلع عليه.

خامسا: Microbiology Guidelines

الجزء الثانى من الحلقة عبارة عن **Guidelines** كدة فى شغل الميكروبيولوجى للمهتمين وأنا حطيته فى الباب اللي بيتكلم عن المهارات أولا لأنى مش متخصص فيه فمش هعرف اشرحه باستفاضة قوى فى باب لوحده و ثانيا علشان اللي هنقوله هنا دة مجرد خطوط مهارية عريضة لازم كل واحد يعرفها عن المايكروبيولوجى حتى لو مش متخصص و حاولت على قد ما ربنا يقدرنى أنى أذكر معلومات صحيحة من خلال خبرتى فى شغل مجال معالجة المياه و من خلال قراءتى و حطيت صور للشرح علشان اللي مشتغلش ميكروبيولوجى قبل كدة يعرف احنا بنتكلم فى اية و دلوقتى يالا نبدا :-

بداية أنا لية بعمل **Micro test** للمنتج بتاعى أو المادة الخام خاصة لو كنت شغال فى صناعة غذائية أو دوائية أو أى حاجة تمس الصحة العامة للمستهلك .. علشان أظمن ان مفيهاش أى ميكروبات ضارة مسببة للأمراض زي التايكويد أو الكوليرا أو حتى فيروسات مختلطة بالمنتج بتاعى فتسبب للمستهلك مشاكل صحية و بالتالى دة هيعود بالضرر المحقق على منتجى و سمعتى فى السوق و و و ... الخ ، طب هل أنا أقدر اعمل تحليل دقيق مستمر للمنتج علشان أشوفه خالى من الميكروبات الضارة دى ولا لأ ؟ الإجابة ان دة محتاج مجهودات معملية ضخمة و مكلفة .. طب الحل اية قالك احنا ندور على بكتيريا أخذها كعلامة بحيث من تواجدها أعرف ان مثلا عينة المياه اللي بحللها دى مختلطة بحاجة لوئتها زي مياه الصرف الصحى - أجلكم الله - مثلا .. طب اية البكتيريا اللي هتقوم بدور ال **Bio-Indicator** أو الدليل البيولوجى على التلوث ليا ... قالك احنا هنختار ال **E.Coli Escherichia coli** و دى بكتيريا يكثر وجودها فى مياه الصرف الصحى - أعزكم الله - فلو لقيتها فى مياه الشرب عندى أعرف انى بروح فى داهية على الرابع وإذا كان فى خامس يبقى خامس 😊😊 ... طيب اية الخطوات اللي بقوم بيها علشان أعمل اختبار مايكرو على المياه بتاعتى؟؟

أول حاجة لازم أعرفها هي اية ال PPE Personal Protective Equipments اللى لازم أكون لابسها و انا داخل معمل المايكرو زي Hair Net, Face Mask , Face Shield , Polyethylene gloves , Lab coat , Safety Shoes و بعد ما البس كل دة اروح على محلول تعقيم Sanitizer gel او كحول 70% و اعقم ايدي كويس قبل الشغل و بعده مهم جدا و اقول بسم الله و ادخل برجلي اليمين ☺

1. **Collecting Samples** أو تجميع العينات :- و دي بكون أنا مجهز الزجاجات اللى هجمع فيها العينات و معقمها كويس فى جهاز اسمه **Autoclave** بدخل فيه الزجاجات و املاه مية لحد علامة معينة كدة فيه علشان تغطى ال **Heater** اللى هو ملف السخان اللى جواه يعنى (دة النوع اللى أنا اشتغلت عليه مش عارف فيه أنواع احدث ولا لأ بصراحة) و بقفل على الزجاجات جوة جامد و اضبط تايمر الجهاز على الوقت بتاع التعقيم ممكن 15 دقيقة كفاية تحت درجة حرارة 121 درجة مئوية و ضغط 2 بار و بعرف من مراقبة عدادات الحرارة و الضغط و اول ما التعقيم يخلص بفتح ال **Autoclave** بالراحة كدة و أنا لابس جواناتيات زي بتاع المطبخ علشان السخونة و اخرج الزجاجات و اسببها تبرد شوية و بكون عارف انا و محدد مسبقا نقاط التجميع اللى هجمع منها العينات سواء مياة معالجة أو مياة خام جاية من البئر و عايز أكشف عليها ... بروح لنقطة التجميع و معايا حاجتين لهب و كحول فى الاول برش كحول على مقدمة الحنفية كدة علشان أطهرها و بعدين أعرضها للهب شوية دقيقتين كدة علشان أموت أى تجمعات بكتيريا جاية من الهواء فى الحنفية و بعدين أسبب الحنفية مفتوحة شوية دقيقتين بردو قبل التجميع علشان أضمن ان **Content Bacterial** المحتوى البكتيري اللى هيطلع لى فى ال **test** جاي من المية اللى هجمعها فقط



Petri Dishes




2. بروح المعمل عندي بكون مجهز ال **Petri Dishes** او الاطباق اللى فيها ال **Agar Media** اللى هزرع فيها البكتيريا و كل نوع بكتيريا لية **Agar** معين هقول ليه كمان شوية يعنى مثلا ال **E.Coli** **Coliforms** & الأجار بتاعها مثلا اسمه **Tergitol-7** و عندي مثلا ال **Pseudomonas** **Aeruginosa** الأجار بتاعها اسمه **Pseudomonas Agar** و عندي ال **Yeast & Mold** الأجار بتاعهم اسمه **Yeast Extract Agar** و هكذا ...

3. بشغل جهاز ال **Laminar Air Flow** :- و دة الجهاز اللى كل شغلى بيبقى جواه زى الصورة كدة لأنى مينفعش أشغل كدة و انا معرض اطباق الميديا للهواء حتى لو جوه المعمل لأنها ممكن تلتقط بكتيريا و تديني نتائج غير حقيقية و بيبقى مع الجهاز دة لمبة **UV** و ليها تايمر كدة بظبطه مثلا على 10 دقائق أو 15 دقيقة تعقيم للجهاز و اشغل اللمبة و أحاول أبعد عنها على قد ما اقدر و معرضش نفسي ليها لأن **UV Rays Are Carcinogenic** مسببة للسرطان عافانا الله و اياكم. اعرفوا فكرة عمل ال **Laminar air flow** و ال **HEPA filter** اللى فيه ☺



4. بعد ما التعقيم بال **UV** يخلص بيكون فى جهاز **Vacuum** أو بيسموه جهاز الفلتر **Filtration Filter** اللى بيبقى مكون من مجموعة من الكاسات المدرجة بالحجم و ابتدى اوزع عليها ال **Papers** و احط الكاسات ثم أحط مية من العينات اللى أنا جمعتها و أشغل **Vacuum Pump** علشان تسحب لى المية من خلال أوراق الترشيح دى اللى بيبقى الثقوب بتاعتها حوالى 0.45 ميكرون علشان تحجز لى البكتيريا على سطحها و بعدين ابدأ أشيل اوراق الترشيح دى بالملقاط علشان أزرعها فى اطباق الميديا اللى البكتيريا هتنمو فيها و بعد ما ازرعها لازم أقلب الطبق على ظهره بحيث يبقى غطاه تحت علشان بيبقى محكم الغلق على ورقة الترشيح اللى جواه و بيقولوا ان دة هو الوضع الصحيح لنمو البكتيريا و الله اعلم.



5. **التحضين :- Incubation** و دة على حسب نوع البكتيريا اللى أنا زرعتها بحطها فى حضانات عند درجات حرارة مختلفة علشان أوفر للبكتيريا بيئة مثالية للنمو مثال على كدة ال **E.Coli** دى بتتعضن عند درجة 36 درجة مئوية لمدة 48 ساعة و بعد كدة اكشف عليها.




6. بعد انتهاء مدة التحضين بخرج الطبق من الحضانة و افتحه و ابدأ اعد كل المستعمرات **Colonies** اللى اتكونت لى بعد نمو البكتيريا و بكدة أعرف ان المية بتاعتي فيها **bacterial content** المحتوى بكتيري قد اية علشان أعرف هحتاج منى اية من وسائل التعقيم هل أحط كلور ولا اركب وحدة **UV** ولا أعقم بالأوزون وهكذا و دى اللى بيحددها مصممين المحطات ... و خصوصا فى المية الخام قبل ما تدخل على وحدات المعالجة اللى شرحناها قبل كدة فى الحلقات اللى فاتت.

7. **التخلص من الاطباق المستخدمة :-** و دى مهمة جدا لأنها مصدر تلوث فظيع جدا و التخلص منها بيكون عن طريق انى بشتري أكياس كدة مخصوصة بتتحمل درجات الحرارة العالية و الضغط و احط فيها الاطباق المستخدمة دى اللى خلاص كشفت عنها و عدت اللى فيها و بعدين أحطهم فى ال **Autoclave** تحت ضغط 2 بار و درجة حرارة 121 درجة مئوية علشان أموت المستعمرات بتاع البكتيريا و اتخلص من الكيس بعد كدة فى صندوق قمامة مخصص لكدة اكتب عليه من برة **Hazard Waste** يعنى مخلفات خطيرة علشان بتجي شركات اعادة التدوير بعد كدة تشيل الكلام دة كله.


• ملحوظة مهمة يا شباب :- فى مجال الصناعة بيبقى أفضل كتيبيبيير بعد ما عملت تقييم بيولوجي كامل للمية اللى عندي و عرفت اية البكتريا اللى هتعامل معاها فى صناعتي و علشان موضوع المجهودات المعملية المكلفة اللى قلنا عليها فوق بيبقى أفضل لو جبت **Selective Agar Media** يعنى آجار مخصص لكل بكتريا منهم زى ما قلنا فوق كدة بالظبط يعنى مزرعش البكتريا اللى فى عينة المية كلها مثلا على اى **Nutrient Agar** تنفع لكل البكتريا لأ أنا بحاول أكون متخصص علشان أوفر على نفسي مجهود الكشف التاكيدي عليها بـ **Confirmation Tests** باني أبقى عارف نوع البكتريا اللى بشتغل عليها اية من الأول و عارف شكل ال **colony** بتاعتها لما بتتزرع فخلاص مش محتاج أكشف عليها تانى ... أما فى حالة لو عندي عينة خارجية مثلا مش عارفها ولا حاجة جديدة **colony** طلعت لى فى الأطباق غير الشغل الروتيني اللى أنا متعود الأقيه مش عارفها برودو هعمل الخطوات اللى فوق دى و بعدين أعزل **Colony** منها على **Nutrient Agar** علشان أكثرها لما اجى اشتغل عليهم اختبارات تأكيدية علشان أعرف هل هي **Gram+ or Gram-** هل هي مثلا عصوية **Bacillus** ولا كروية **Coccus** و هكذا و فى تحت جدول بيوضحهم ... و بعدين أبلغ بقى مدير الجودة بالبكتريا الجديدة اللى لاقيتها فى الطبق و هو بدوره هيبغ ادارة المصنع كله علشان يقعدوا يشوفوا حل فى المصيبة الجديدة اللى طلعت دى ☺

و بمناسبة البكتريا اللى بتظهر فى الصناعات الغذائية عموما هسيب لينك جامد جدا فى المراجع لملف عامل حصر كامل للبكتريا المتوقعة فى مجال الأغذية و الأدوية عموما للمتخصصين أنا بس هنا بحاول أفتح سكة و هسيب شرح الإختبارات التأكيدية للمتخصصين علشان منقطعش على بعض ☺

Gram Positive



Gram Negative



الباب الثالث
الشهادات
Certifications

International Organization for Standardization

هي المنظمة الدولية للمعايير .. دي اللي بتحط متطلبات الجودة العالمية لأى صناعة و بيبقى ليها مراكز معتمدة حول العالم بيدوا الشهادات لأى شركة مطبقة المتطلبات دي زى شركة فى مصر هنا اسمها **SGS**.

أولا شهادة ال ISO 9001 : 2008 و اللي حددت 8 مبادئ أساسية لأى صناعة عايزين نطبق فيها نظام ادارة جودة **QMS** حقيقي بغض النظر عن مجال هذة الصناعة ايا كان.
و الشهادة دي ليها كذا اصدار منها :-

- **ISO 9000 : 2005** و دي ذكروا فيها شوية أساسيات و مفاهيم عن الجودة
- **ISO 9001 : 2008** اللي هنتكلم عنها النهاردة لأنها أهم واحدة فيهم و هي اللي بيدوها كشهادة و اللي بتتكلم عن مبادئ نظام ادارة الجودة
- **ISO 9004 : 2009** و دي ذكروا فيها ازاي نخلى لنظام الجودة فعال و مؤثر لما يتم تطبيقه و ذكروا على كدة شوية أمثلة.

نيجي بقى للمهم ... اية هما ال 8 متطلبات بتاعة ال **ISO 9001** اللي لو طبقتها عندي فى مصنعى يبقى أنا كدة جودجى بريمو :-

1. Customer focus :- يعنى أشوف تركيز العملاء بتوعى فى منتجى رايح لفين لأن هما المؤشر الرئيسي اللي بيقولى اذا كان منتجى كويس و جيد ولا أى كلام و مفيش صناعة و منتج من غير عملاء بيستهلكوا المنتج دة ايا كان هو اية ... طب أعمل الكلام دة ازاي ؟

عن طرق شوية حاجات زى :- انى ادور على احتياجات العملاء و المستهلكين بتوعى و احاول ألبها باستمرار ، و احط من ضمن أهداف منظمتى أو مصنعى انها تلبي متطلبات العملاء بتوعى و توقعاتهم ، و احصل على توقعاتهم من خلال عمل احصائيات خارجية علشان تقيس مدى رضاهم عن المنتج ، و اوجد علاقات كويسة و متينة مع العملاء اللي بيستهلكوا منتجى و فى نفس الوقت أوازن بينها و بين باقى اساسيات شغلى زى الموظفين و اصحاب رأس المال و الاسهامات المجتمعية و هكذا .

2. Leadership :- و دي مشكلة بنعانى منها حاليا فى أغلب شركاتنا و هي ان مفيش حد عايز يبان انه يفهم فى كل حاجة غيره هو و بس مفيش حد بيربى من تحته قائد حقيقي يقود الناس فى غيابه .. كل الناس فى أماكن شغلهم مديرين و ليسوا قادة مع ان تربية القادة فى أى مؤسسة بتخلى الناس عندهم قابلية أفضل لتطوير شغلهم و تحسين انتاجيتهم و يبقوا فعالين فى المؤسسة اللي هما شغالين فيها ... طب ازاي أعمل كدة ؟؟

عن طرق شوية حاجات زى :- انى احط رؤية واضحة للشركة بأهدافها و اتجاهاتها و تكون واضحة لكل الناس علشان يعرفوا هما بيعملوا اية و لية ، و اضع تحديات و اهداف أثناء شغلى فى العملية التصنيعية بتاعتي يعنى مثلا أنا أنتجت 1000 متر مية الشهر دة و أهدرت 100 متر لأ أقول الشهر الجاي للناس اللي معايا احنا عايزين ننتج 1100 متر و نخسر 10 متر بس و هكذا ، أحفز الناس و ادربهم و ازود من مهاراتهم و اشجعهم على المشاركة ان لم يكن فى وضع خطة العمل يبقى فى

أطار خطة العمل التي سبق و تم وضعها و هنا بتكلم عن المرونة المنظمة في الشغل مش التحجر و رفض تحمل المسؤولية و إلقاءها على الغير ، الفهم الموحد لأهداف الشغل و خطة العمل بحيث يحصل عدى **Cross- Functional Barriers** يعني عوائق ناتجة عن سوء فهم الاهداف المشتركة للخطة بين العمليات المختلفة مثلا انا عندي مصنع فيه 3 خطوط انتاج و الخطة محسوبة ان الخط الأول هينتج لأنه جاهز و الثاني هيتعمل له تجهيز خلال ساعة مثلا و يلحقه و الثالث هيشغل نص يوم بس علشان هيدخل عمرة ميجيش بقى المشرف على الخط الأول يقول انا هنتج كمية المنتج اللي في الخطة كلها لوحدى اللي هيا مثلا 10000 عبوة مياة معبأة لأن الخط الثاني احتمال يتأخر و الثالث احتمال يعطل و يعمل كدة من دماغه بدون تعليمات واضحة أو يجي مشرف الخط الثاني يقولك أتأخر يا جدع في تجهيز الخط ما هو كدة كدة عدنا خط رقم 1 شغال اهو أو يجي مشرف الخط الثالث يقولك أنا هوقف انتاج بدرى و اهو عندهم خطين اتنين شغالين محاريت اهو ... غلط جدا الكلام دة بدون تعليمات واضحة مفهومة للجميع من مدير الانتاج ان كل واحد ملف بمهمة ينجزها في اطار خطة العمل و مفيش شغل بالمزاج ... طيب اللامركزية تتطبق هنا ازاي ؟ عن طريق اعطاء مشرفين الخطوط الصلاحية في حل اي مشكلة تعترض سير العمل و حلها بدون الرجوع للمدير في كل شيء الا في حالة مشكلة يصعب عليه حلها لوحدده زي مثلا الخط رقم 3 عطلت فيه ماكينة مهمة و مش راضية تشتغل تاني علشان يكمل خطة الإنتاج بتاعته قبل ما يدخل عمرة و يكمل الخطة بتاعته هنا لازم يرجع للمدير علشان يقرروا تحويل باقى خطة انتاج الخط رقم 3 و لنقل انها كانت 2000 عبوة على الخطين التانيين بالتعاون مع الادارات التانية زي الجودة و الادارة الهندسية لتقييم الموقف تقييم شامل.

6. Continual improvement :- باينة من اسمها التحسين المستمر لكل حاجة مواد خام و منتج و عملية تصنيعية و أداء و كفاءة الموظفين.

و دة نعمله عن طريق :- ان يكون التطوير المستمر هو هدف لكل واحد في الشركة و يشتغل عليه كويس ، توفير التدريب المستمر للموظفين على العمليات اللي هما مكلفين بيها و طرق اداء وظيفتهم على أكمل وجة ممكن ، و زي ما قلنا تحسين جودة المواد الخام اللي بستخدمها و تحسين العمليات المختلفة اللي منتجي بيمر بيها بحيث في النهاية أخرج بمنتج عالي المواصفات و يبقى هو دة الهدف بتاعى دايم التحسين المستمر ، و لو حصلت على انجاز معين و عملت تطوير و تحسين حقيقي لازم اسلط الضوء عليه و أوضحه للناس علشان يبقى نموذج و قدوة للباقيين و حافز يشجع باقى الناس على التطوير.

7. Factual approach to decision making :- يعنى منهجية حقيقية لاتخاذ القرار يعنى اية

بردو ؟ يعنى تبقى قراراتى اللي بتخدها علشان امشي شغلى نابعة من معطيات حقيقية على أرض الواقع طبقا للعملية التصنيعية بتاعتي و معطياتها و النتائج اللي بحصل عليها منها طب أعمل الكلام دة ازاي ؟

كالآتى :- أول حاجة انى أتأكد إن كل بيانات و سجلات العملية التصنيعية بتاعتي حقيقية و دقيقة و موثوق فيها مش مضروبة ولا متألفة لأن هيتبنى عليها قرار سواء للتطوير أو للصيانة لو في مشاكل أو غيره ، ان جميع البيانات دى تكون متاحة لكل الناس اللي محتاجينها علشان يدرسوها و يتخذوا قراراتهم بناءً عليها مش تتعامل معاملة الأسرار العظمى و كل واحد يخبئها عن التانى ! ، الخطوة اللي بعد كدة هي تحليل البيانات دى تحليل دقيق بطرق حديثة زي مثلا احد أهم الطرق انى احط بياناتى دى في رسومات بيانية و **Charts** علشان تبقى **Visualized** يعنى معروضة قدامى بوضوح و ياحبذا لو كانت البيانات دى مثلا لمدة شهر فات أو اثنين أو ثلاثة محسوبة قدامى في رسم بيانى واحد زي مثلا قيم ال pH للمنتج لمدة 6 شهور فاتت في **Chart** واحدة هقدر من خلالها أعرف هل انا ماشي صح ولا لا و أقارن النتائج دى مع بيانات الاستهلاك للكيمياويات و أشوف هل في استهلاك زائد أو ناقص عن حاجتى .. كل دة بعرفه لما بقارن النتائج دى كلها مع بعضها و أحطها قدامى مرسومة في رسم بيانى مثلا على الإكسل.

8. **Mutually beneficial supplier relationships** :- يعنى اعتماد مبدأ المنفعة المتبادلة فى علاقة شركتى مع الموردين و دة هيخلي شركتى و شركات الموردين ليهم قدم ثابتة فى السوق لأنه هيدنى مادة خام جيدة فبالتالى أنا هجيب منه على طول فقيمتنا احنا الاتنين فى السوق ترتفع و نقدر نساعد بعض فى الاستجابات السريعة المشتركة لمتطلبات السوق اللى احنا موجودين فيه سوا و بيحقق لى أفضل استخدام للموارد بتكلفة قليلة ... طيب أعمل كدة ازاي؟؟

كالآتى :- أول حاجة أحط خطة مع المورد أحدد فيها بالظبط المكاسب القريبة و المكاسب البعيدة و نشوف ازاي نقدر نحققها سوا من خلال أهدافى و أهدافه ، تجميع الخبرات و الموارد بيني و بين المورد بحيث يبقى شغلنا كله فى نظام واحد مش أنا فى اتجاه و هو فى اتجاه تانى و دة بيتم عن طريق توفير المعلومات اللى عندى و عنده لكل و وضع خطط مشتركة للإنتاج طبقا لمعطيات السوق اللى احنا فيه ، و وضع خطط تطوير مشتركة على أساس المنتج بتاعى و بتاعه و دى هيساهم فيها البيانات الدقيقة اللى قلنا عليها فى المبدأ السابع و احصائيات استطلاع رأى العملاء اللى فى المبدأ الأول ، و أخيرا لما التعاون اللى بيني أنا و المورد يكلل بنجاح ما أو تطوير إيجابى معين أسلط الضوء عليه و أظهره كويس علشان يبقى أرضية صلبة لأ تعاون قادم و يكبر الشراكة بيني و بينه.

الكلام اللى فوق دة كله كان عبارة عن نظرة سريعة جدا على ال 8 مبادئ فى نظام QMS Quality Management System اللى فى ال ISO 9001 لكن جوا كل مبدأ منهم تفاصيل كتير جدا بتختلف من شركة لشركة و من صناعة لصناعة لكن هما دول كدة الأساس اللى بيتبنى عليهم أى نظام جودة عموما.

HACCP: ثانياً

يعنى اية :- **HACCP** يعنى تحليل المخاطر و نقاط التحكم الحرجة **Hazard Analysis And Critical Control Points**

النظام دة يا شباب اخترعوه علشان يراقبوا بيه الصناعة من أول المادة الخام لحد ما تخرج منتج نهائي للحفاظ على جودة المنتج بتاعى و بيستخدم فى الصناعات الغذائية لحماية المنتج من التلوث و حماية المستهلك من المخاطر عموماً الناتجة عن هذا التلوث ... النظام دة بيخلي الشركة تعمل رقابة ذاتية على نفسها بحيث متستناش مفتشين من الجهات الرقابية أو من الإدارة العامة أو لو كانت شركة انترناشونال يجيلها مفتش من الشركة الأم ... طيب دلوقتى ازاي أطبق النظام دة عندي فى المصنع؟؟

عن طرق اتباع شوية قواعد كالاتى :-

1. **Hazard Analysis** :- يعنى تحليل نوعية المخاطر الللى عندي الللى بتأثر فى المنتج من أول المادة الخام الللى بيتصنع منها لحد المنتج نفسه طيب دى هعملها ازاي دي؟؟ باني أمسك كل خطوة من خطوات الإنتاج بتاعتي من أول استلام المواد الخام لحد المنتج النهائي و أشوف تأثيرها على المنتج بتاعى و على الخطوات الصناعية على خط الانتاج و هنضرب مثال على كدة فى معالجة المياه بنستخدم الكلور كمادة معقمة و بييجي لنا فى هينتين إما كالسيوم هيبوكلورايت $Ca(OCl)_2$ و دى مادة صلبة أو بييجي على هيئة صوديوم هيبوكلورايت $NaOCl$ و دى مادة سائلة و الكلور زى ما انتوا عارفين من اخطر المواد على صحة الانسان و حتى على اى منتج غذائي عموماً لأنه عامل مؤكسد قوى جدا و سام فى نفس الوقت عند الجرعات العالية منه و ممكن ييوظ لى المحطات عندي لو كانت RO بيبوظ الأغشية بتاعتها لو فاكيرين من الحلقة الثالثة ... و هكذا عمل التقييم دة على كل مادة أو خطوة فى الصناعة.

2. **Control Points & Critical Control Points ... CP & CCP** :- يعنى نقاط المراقبة و نقاط المراقبة الحرجة ... يعنى اية بردو؟؟ يعنى بعد ما حددت المخاطر الللى ممكن تواجهني أبداً احدد هل هي CP ولا CCP و هنضرب مثال لكل واحدة فيهم ... بالنسبة لل CP دى نقطة مراقبة لعملية معينة من عمليات الانتاج مش بتشكل عندي خطورة شديدة على المنتج أو المستهلك و يمكن تداركها بسهولة و تفاديها بسهولة زى اية مثلاً زى ال pH كدة فى صناعة معالجة المياه بيبقى من النادر انها تخرج خارج المواصفات بتاعتي لو أنا عامل كنترول كويس على شغلي و محطتي و مش بتبقى ذات خطورة شديدة لو زادت أو نقصت بمعدل مقبول يمكننى إنى ألحقه بسرعة و أعدله لكن مش بمعدلات خيالية فدئ بنسبها ... CP أما ال CCP فدئ بتبقى نقطة مراقبة لعملية معينة من عمليات الإنتاج بتشكل خطورة على المنتج و خطورة على المستهلك لو زادت و خرجت برة المواصفات بتاعتي زى اية؟؟ زى الكلور الللى بضيفه كمادة معقمة للمياه الخام الللى قلنا عليه فوق دة على طول بيبقى CCP لأنه زى ما قلنا سام لو اختلط بالمنتج و ممكن ييوظ لى المحطات بتاعتي و يدمرها بمعنى الكلمة لو كانت أغشية RO علشان كدة بيحتاج مراقبة دقيقة و لازم أخذ له احتياطات تمنع وصوله للمنتج النهائي خالص أو تبقى موجودة فيه بحيث متأثرش أبداً على صحة المستهلك زى مثلاً ببط قدومه فلاتر من الكربون المنشط يعمل له امتزاز **Adsorption** و بالتالى اتخلص منه خالص و الفلتر فى الحالة دى بيبقى هو ال CCP بتاعتي الللى لازم أراقب المياه الللى خارجة منها باستمرار.

Corrective Action Plan بالخطوات التي أنا لازم أعملها علشان أواجه حاجة زي كدة و لازم كله يبقى حافظها صم زي اسمه لأن كلور يعدى بتركيز كبير في مية شرب دي كالأرثاء بكل المقاييس و التي حصلت معاه في ورديته هيتحاكم محاكمة عادلة و يُعَدَم ☺ و للتوضيح أولاً لازم أجرى أوقف المحطة التي حصلت فيها المشكلة دي ، ثانياً أجرى على خط الإنتاج أقول للمشرف على الخط يوقف انتاج ، ثالثاً أبلغ المدير بتاعى بالكارثة التي أنا عملتها و حاول تسد ودنك و تحمى وشك ☺، رابعاً أتخذ الخطوة التصحيحية للى حصل دة و هي إعادة تنشيط الفحم الموجود داخل الفلتر باستخدام بخار مية لو المصنع فيه قسم غلايات أمرر عليه البخار و بعدين اسببه يبرد و بعدين أعمله غسيل عكسي Back Washing و بكدة يرجع زي الأول تانى.

5. **Verification** :- يعنى التثبت و التأكد من كل الخطوات السابقة انها بتمشي صح و مفيش فيها لخبطة و دة عن طريق كذا حاجة ... بالنسبة لخط الإنتاج أحاول اخلى الماكينات التي عندي صالحة على أفضل حال للإنتاج من متهاكة ولا بتمشي بالعافية و اتابع حالتها باستمرار و دي مسئولية الادارة الهندسية في المصنع من خلال برامج الصيانة الوقائية **Preventive Maintenance** و العمرات ، و بالنسبة للمعمل و شغلنا احنا بيبقى عن طريق متابعة النقاط التي قلنا عليها دي و تسجيل النتائج التي بتطلع على بأمانة مش نتائج مضروبة لأنه زي ما قلنا قبل كدة في نظام الأيزو هيتبنى عليها قرار و هنا بتأكد بيها من سير لعملية بتاعتي بدون مشاكل و أستعين على كدة بالتأكد من تواريخ صلاحية الكيماويات التي بستخدمها في التحاليل المختلفة حسب الصناعة التي أنا فيها و كمان بستعين على كدة من خلال معايرة الأجهزة التي عندي زي على سبيل المثال جهاز قياس ال pH مثلا و ال TDS **Total Dissolved Solid** أو جهاز قياس العكارة و الحضانات **Incubators** في معامل الميكروبيولوجي و أى جهاز بيحتاج معايرة أهتم بمعايرتها الدورية على طول اذا كانت شهريا ولا ربع سنوية ولا نصف سنوية و غالبا كل ما زادت المدة بيبقى المعايرة خارجية يعنى خارج الشركة في شركات معايرة متخصصة و كل دة علشان اضمن النتائج التي طالعة لى.

6. **Documentation** :- و دي آخر خطوة معنا في ال HACCP و هي توثيق الكلام التي فوق دة كله و الخطوات دي في خطة بيسموها ال HACCP Plan و الناس بتوع ال FDA التي هي منظمة الأغذية و الأدوية بيقولوا (الشيء الغير مسجل كتابيا فهو لم يحدث على الإطلاق) فلازم أهتم بالخطة دي بالتفصيل الممل فيبتم وضع نوع الخطوة الى عندي و مكانها على خط الإنتاج من أول المواد الخام مروراً بخطوات التصنيع لحد المنتج النهائي و توصيف للخطوة و نوعية الخطر المحتمل التي ممكن يواجهني منها و بتوع ال FDA بردو بيقولوا (لو نسيت خطوة إذا أنت نسيت خطراً) ثم طريقة مراقبتها و الشخص المسئول عن مراقبتها كل دة بحطه في جدول كيبينى كدة أى جودجى ناصح لازم أول ما يحس أنه ملأ يده من الشغل و اتعلم و بقى يمك و ردية لوحده لازم يسأل على ال HACCP Plan و لو مكانتش موجودة يحاول هو يتطوع و يعملها زي ما قلنا فوق كدة بنية صافية لزميله و يحسبها لوجه الله ☺

عوامل مساعدة على تنفيذ و نجاح ال HACCP Plan :-

- وجود التزام من الإدارة العليا في المصنع بتطبيق نظام ال HACCP
- تحديد مجموعة ذات تأهيل مناسب للعمل كفريق متخصص لل HACCP
- تحديد مسئوليات الفريق بالظبط من متابعة و تنفيذ و تطوير خطة ال HACCP
- التنسيق المستمر بينهم و يفضل يكون واحد من كل إدارة في المصنع

- روح التعاون بين الفريق و توفير المعلومات و البيانات المطلوبة لهم
- عمل خريطة للعملية التصنيعية بخطواتها كلها بالتفصيل الممل بيسموها **Process flow chart** علشان نقدر نحدد منها العمليات اللى فيها **CP** و **CCP**
- وجود رؤية تطوير لدى فريق ال **HACCP** بحيث يقدروا يكتشفوا الخطر فى كل خطوة و يتوقعوه و يضيفوه للخطة باستمرار علشان يبقى المنتج و المستهلك بتاعى فى ال **Safe Side** على طول .

ثالثا: ISO 18000

OHSAS 18000 Occupation Health and Safety Assessment Series

و دى يا شباب عملوها كنظام للتحكم و السيطرة و المحافظة على السلامة و الصحة المهنية سواء للأشخاص أو المنشآت و حماية الجميع من الأخطار من أى نوع من خلال تطبيق متطلبات و مبادئ النظام دة أو الشهادة دى و أى شركة تقدم طلب للحصول على الشهادة لازم تكون مطبقة المتطلبات دى و تعتبر الحد الأدنى علشان تاخذ بيها الشهادة اللي اتعملت مخصوص علشان تبقى مقياس أو Standard أو مرجعية لأى نوع من أنواع المراجعة أو التفتيش فى مجال السلامة و الصحة المهنية من قبل الشركة نفسها داخليا داخل الشركة نفسها أو المراكز المعتمدة لمنظمة الأيزو خارجيا ... طيب مميزات تطبيق ال ISO 18000 إيه؟؟

- زى ما قلنا فى المقدمة إنه بياسس نظام كامل يمنع أو يقلل حدوق الأخطار للموظفين أو المنشآت طبقا لنوع الصناعة أو العمل اللي بيعمله الموظف أو بيتعمل فى المنشأة أو الشركة.
- بيقولنا إزاي نحدد نوعية الأخطار دى و ازاي ننفادها و نعمل توعية للأشخاص اللي معنا فى نفس المؤسسة أو الشركة بحيث الكل ياخذ باله.
- ببساعدنى دانما فى المحافظة على تنفيذ و تطوير نظام السلامة اللي أنا عامله عندى فى حالة لو مكنتش واخذ شهادة ال ISO 18000
- و ببساعدنى انى أعمل تقييم ذاتى لنظام السلامة و الصحة المهنية بعد ما اطبقه و بالتالى أحافظ دائما على شركتى و الموظفين بعيدا عن الأخطار.
- كفاية بس انى أحط على ال Label بتاع منتجى علامة ال ISO 18000 دة هيجلى ثقة العميل فى منتجى كبيرة لأنه هيستهلك منتج معمول فى ظروف بيئية آمنة ☺

ودلوقتى هنتكلم عن ازاي نطبق ال ISO 18000 من خلال متطلباته :-

- **Health and Safety Management** :- يعنى لابد من وجود ادارة مخصصة للسلامة و الصحة المهنية تختص بأمورها و تلتزم بينود المعايير أو Standard اللي المركز هيديهاك علشان تنفذها عندك فى المصنع و تتابع تنفيذها أيا كان مجال الصناعة بتاعتك و بيعجبني فى نظم الأيزو كلها انها بتبدأ أول حاجة بال **Management Commitment** يعنى الإلتزام من الإدارة بتنفيذ المتطلبات لأن الباقي كله ملوش لزمة لو مفيش إدارة حريصة على التنفيذ.

- **Training** :- و دى الخطوة الطبيعية اللي بعد التزام الإدارة و هى تدريب الناس اللي هينفذوا متطلبات المعايير اللي التزمت بيها الادارة بتاعتهم علشان تاخذ الشهادة و كل واحد بيتدرب على شغله هو ازاي ينفذه من غير ما يصاب بمخاطر فيه يعنى يتعور ولا يتكسر ولا يموت لا قدر الله ، أو يسبب أى ضرر للمكان أو الشركة حرائق أو تلفيات و خلافه و بيبقى فيه هنا نوع من التزام الإدارة بتدريب الناس دوريا على الكلام دة لأن مرة واحدة أو 2 أو حتى 3 مش كفاية لأ لازم يكون التدريب دورى و منتظم علشان الناس يفضلوا على وعي دائم بالمخاطر اللي فى عملهم و وعي دائم بأهمية المحافظة على أنفسهم و غيرهم و المكان اللي شغالين فيه بالإلتزام بمعايير السلامة اثناء شغلهم.

- **Risk Assessment** :- و دى خطوة مهمة جدااااااااااا لأن بدون معرفة و تقييم لنوعية المخاطر اللي عندى مش هعرف أتعامل معاها لو حصلت و بالتالى ممكن تسبب لى خسائر سواء بشرية أو مادية

فبالتالى لازم اللى هيجي يعمل التقييم ده يكون على درجة عالية من التأهيل فى اكتشاف و تمييز أنواع المخاطر المحتملة فى شغلانة معينة أو خلية نسميها نشاط معين من كذا نشاط أو عملية بتتعمل داخل المصنع.. و منهجية تقييم الأخطار ليها اربع خطوات:-

1- Identify Risk :- و دى بعرف فيها نوع الخطر اللى عندى و موجود فى مين و مين اللى بيتعرض له.

2- Risk Analysis :- و هنا بحلل الخطر نفسه من حيث شدة تأثيره و عدد مرات تكراره و بيطلع لى رسم بياني كدة بيقولى الخطر الفلانى تأثيره على او منخفض و هكذا ... دة جدول بقيس بيه الشدة على المحور الرأسي مضروبة فى عدد مرات الحدوث على المحور الأفقى و بستنتج منه مثلا ان الأقل خطورة هو رقم 1 و العلى خطورة هو رقم 9 و بينهما تتفاوت الشدة و عدد مرات التكرار فيتفاوت التقييم يعنى كل رقم من دول يقابله ما يساويه من خطر.

9	6	3
6	4	2
3	2	1

3- Risk Management :- و دى بعمل فيها الخطة اللى هتخلينى اواجه الأخطار اللى عندى و احدد اولوياتى فى البدء تبعاً للتقييم اللى انا عملته دة و تأثير الخطر على شغلى و مكانى.

4- Review & Follow Up :- و هنا بقى بشوف خبط نجحت ولا لا و بصلح الديفوهات اللى فيها لما طبقتها عملى و شفتها على الطبيعة بحيث اطورها اكثر و اكثر واعتمدها كخطة طوارئ للخطر الفلانى.

أمثلة بقى على المخاطر المختلفة و ازاي تعامل معاها:-

اللحامات فنى بيلحم لازم يكون لابس واقى لوجهه و جوانتى و جمبه طفاية حريق أو السيور و القطع المتحركة فى أى ماكينة لازم أكون حاطط ملاحظة Note يفضل يكون ال ID بطاقة التعريف بتاع الفنى اللى جواها عليها و اقلها خالص و افصل عنها الكهرباء أو الكيماويات الحارقة أو السامة زى الأحماض المركزة أو الكلور أو الصودا الكاوية لازم أولا تكون Food Grade يعنى صالحة للإستخدام فى الصناعات الغذائية لو كنت هستخدمها فى أى صناعة غذائية و أكون حاطط عليها ال MSDS Material Safety Data Sheet بتاعتها اللى جاية لى معاها من المورد و أكون لابس بردو جوانتى و واقى للوجة Face Mask علشان لو ليها رائحة نفاذة و لو هتعامل بكميات كبيرة و خصوصا العمال بجيب لهم ملابس مخصصة ضد الانسكابات بتاع الكيماويات دى عليهم و هكذا.

و كمان زى العمل داخل أماكن مغلقة بدون تهوية جيدة زى التانكات لازم يكون فى تهوية جدية تتركب لى داخل جوة التانك دة و توفر له أكسجين كفاية جوة و يفضل لو فيه جهاز قياس نسبة الأكسجين ياخده معاها بحيث لو قل عن نسبة معينة يخرج فوراً من جوة أو مثلا العمل فى أماكن مرتفعة أعلى من مترين لازم يكون لابس خوذة و حزام يتعلق منه فى أقرب حاجة ثابتة قوية ليه بحيث لو رجله انزلت ميقش و يفضل متشعلق لحد ما يلحقوه 😊 أو مخاطر الكهرباء يعنى العمل على لوحات الكهرباء مينفعش أى حد سواء مهندس أو فنى يشتغل من غير خوذة و جوانتى و واقى للوجة علشان لو حصل شرر و يكون المكان حواليه جاف جدا و لابس فى رجله جزمة غير موصلة للتيار الكهربى و تكون جافة بردو و هكذا أو مثلا المكان على الضوضاء و دى تعتبر خطر بردو بوفر للناس سدادات أذن يلبسوها و أحط يافطة على المكان على الضوضاء دة و جمبها احط

السدادات دي أو السائقين مثلا لازم و حتما و لابد يكون لابس حزام الأمان و خوذة و حاجة كمان اسمها High Visibility Vest و دة جاكيت كدة فيه زى علامات مش عارف معمولة من اية بصراحة متخيطة فيه بتعكس الضوء اللي بيجي عليها و الجاكت دة أى حد بيلبسه لما يكون شغال فى المصنع على فكرة مش لازم سائق بس بحيث اللي سائق عربية ولا ونش ولا رافعة قدامه ينتبه له و يتفاداه أو لو سائق توزيع و وقف فى الطريق اضطرارى يلبسها بحيث لو نزل تحت عربيته يصلحها مثلا ميجيش حد من وراه مش شايفه يخبطه و هكذا.

و على أساس التقييم دة أبدأ أحط الخطوات المناسبة لتفادى حدوث تلك الأخطار المتوقعة و يضمن بالتعاون مع الإدارة وجود الأدوات المطلوبة اللي قلنا بعضها و ليس كلها فوق و بعد ما عملنا كدة دة تيجي خطوة التوثيق للمخاطر دي كلها حسب نوع كل نشاط بيتعمل و أعلننا لكل علشان يبقى فيه توعية بيها ثم أفضل أراجعها باستمرار علشان لو فيه أى تطوير أنا حابب أضيفه أو حتى طرأ مع الوقت اضيفه لضمان وقاية أفضل من المخاطر دي و دول صور لبعض العلامات الإرشادية الواجب توافرها فى أى مصنع :-



• **Accident Treatment / Accident Reporting / First Aid Facilities** - و دى

المقصود بيها التعامل مع الحوادث يا شباب لما تحصل من خلال سرعة التبليغ عنها و من خلال أهم حاجة الإسعافات الأولية فى الموقع لتقليل ضرر الحادثة و دة بيتم بحاجتين الأولى هى توفير شبة صيدلية أو دولا ب كدة صغير بجيب فيه مطهرات زي الديتول مثلا و معقمات زي ال Alcohol الطبي (السبرتو) و شاش و قطن و أربطة ضاغطة و ميركروكروم و لاصق طبي و غسول للعين و لو أنا صاحب شركة محترمة هجيب مراهم حروق زي مثلا (ميبو Mebo و دة ممتاز جدا) و أجيب تلاجة صغنة كدة أحط فيها أكياس تلج و هكذا ... و الحاجة الثانية إنى أدرب فريق من العاملين عندى على الإسعافات الأولية و يفضل واحد أو اتنين من كل إدارة ازاي أعالج الكسور و الحروق و الاختناقات و النزيف و الجروح و الإغماءات و هكذا بطرق بسيطة عارفينا دكاترة متخصصة فى الإسعافات الأولية التدريب دة مهم جدا أنا أخذته و حتى مفيد فى الحياة العامة كمان.

• **Personal Protective Equipment** : - يعنى أدوات الحماية الشخصية PPE و دى يا شباب

هى الحاجات اللى مفروض انى ارتديها لما أكون بعمل أى نشاط فى المصنع حسب نوع شغلى و حسب طبيعة النشاط دة اللى أنا هعمله... يعنى الميكانيكي غير الكهربائي غير السائق غير الكيميائي غير العامل ... كل واحد له طبيعة شغل مختلفة بتحتاج أدوات حماية شخصية مختلفة عن التانى و هنا بيبدأ اخصائي السلامة و الصحة المهنية بالتعاون مع الإدارة فى توفير كل الأدوات دى للناس عنده و أدربهم على استخدامها و أعملهم توعية دورية بأهميتها و أحط قدامهم ملصقات توعية بحيث على طول تبقى الحاجات دى فى ذهنهم بحيث أقلل احتمالات الاصابة البشرية و أحافظ على ال Man Power اللى عندى أو المادية بحيث أقلل الخسائر الناتجة عن أى مشكلة لأقل درجة ممكنة.

• **Emergency Procedures** :- اجراءات الطوارئ و هى اللى بتكون موجودة بحيث لو حصل

حاجة عندى فى المصنع أطبقها زي مثلا توفير مخارج الطوارئ فى كل مكان فى المصنع و توضيحها و وضع لافتات متتابعة تشير ليها فى كل حطة بحيث وقت ما يحصل حاجة يكون الكل عارف هيروح فىن ، و تحديد نقاط تجمع Assembly Points خارج المباني اللى فى المصنع و خارج صالات الانتاج للناس علشان يتجمعوا فيها و كل كذا ادارة يتجمعوا مثلا مع بعض أو لو كان المصنع كبيرة و فيه مساحة أحدد لكل ادارة نقطة تجمع خالية برة المباني علشان كل الناس بيبقوا عارفين بعض و يسألوا على بعض و أى حد مفقود نقدر نحدده بسهولة علشان انقاذه ، و توفير أجهزة انذار مثلا زي انذار ضد الحرائق أو ضد المياة لو غرفة محركات مثلا و جمبها اى مصدر مياة و غرقت الأرض لأى سبب بيبقى فيه جهاز انذار على مستوى معين من الأرض كدة أول ما يلمس المية يدي جرس انذار بان فى احتمالية غرق هنا و هكذا ... استخدموا مخيلتكم يعنى.

رابعاً: OSHA

الأوشا دى يا شباب اختصار لـ **Occupational Safety and Health Administration** و دى وكالة تابعة لوزارة العمل الأمريكية أنشئت بموجب قانون أصدره الرئيس الأمريكي نكسون سنة 1970. قبل اصدار اصدر قانون الأوشا الأمريكي كان معدل الوفيات الناتجة عن اصابات العمل بدرجاتها المختلفة فى أمريكا 14000 عامل سنويا و دة رقم ضخم وبعد اصداره قل العدد دة لغاية ما بقى حوالى 4500 سنة 2013 ... اذا الأوشا أحدثت فرقا كبيراً.

مهام الأوشا بتتلخص فى تهيئة بيئة عمل مناسبة للعامل تحافظ على سلامته من مخاطر عمله و تحافظ على سلامة المنشأة من أى مخاطر قد تحدث فيها.

و علشان كدة حددت الأوشا حاجتين : حقوق العامل على المنشأة اللى بيشتغل فيها و حقوق المنشأة كمان عليه ... و زى ما بيقولوا فى المثل العقد شريعة المتعاقدين، أصبحت الأوشا هى بمثابة العقد بين المؤسسة و العامل للحفاظ على سلامة الطرفين.

اية الفرق بين الأوشا و بين ال ISO 18000 اللى اتكلمنا عنها ؟؟

- ال ISO 18000 هى معايير سلامة و صحة مهنية أصدرتها منظمة الأيزو بينما الأوشا هى وكالة تابعة لوزارة العمل الأمريكية تعمل بقانون أمريكي للسلامة و الصحة المهنية.
- ال ISO 18000 دى شهادة ملزمة فقط لمن يطبق معاييرها فى أى حنة فى العالم أما الأوشا دى ملزمة لكل الشركات داخل أمريكا لأنها جهة رسمية داخل الدولة.
- الاتنين يودوا نفس العمل ألا و هو الزام العامل و المنشأة على حد سواء بمتطلبات السلامة و الصحة المهنية لكن الأوشا كانت أكثر فاعلية لأنها كقانون دولة أصبحت فيها ثواب و عقاب للعامل او المنشأة المخالفة فبالتالى اصبح الالتزام بيها اشد أما الأيزو فهى مجرد شهادة بتأخذها المؤسسة لتطبيقها متطلبات السلامة و الصحة المهنية و لكن مش فعالة قوى الا لو التزمت بيها الشركة و عمالها التزام شخصى بدون الحاجة الى الزام خارجى كما هو الحال مع القوانين فبالتالى لما يجيك **audit** المفروض بتكون جاهز علشان انت ملتزم لكن فى اغلب الأحوال دة مبيحصلش و آخرهم معاك انهم يسحبوا منك الشهادة علشان كدة القوانين و التشريعات داخل الدولة و الثواب و العقاب داخل المؤسسة بيكون له اثر كبير ... دة اذا كان بيتطبق ☺

المهم .. من حق أى عامل فى أى شركة أو مكان عمل انه يطالب شركته بالآتى :-

- توفير مكان عمل آمن و كلمة آمن دى بتشمل تحتها جميع انواع المخاطر و الاصابات المحتملة اثناء تادية العمل يعنى لازم المكان يكون مترخص للعمل من جهة رسمية تقول انه صالح و آمن للعمل ... لأن دة الطبيعى اصلا مش زى ما بنشوف !
- يجب إعلام العامل باى خطر محتمل فى عمله سواء كان كيميائى أو فيزيائى من خلال ال **MSDS** المرفقة للخامات أو ال **SDS** المرفقة للآلات و المعدات و اللى بيبقى مكتوب فيها بالتفصيل الممل كل المعلومات الممكنة و المتاحة عن الخامة الفلانية او الالة الفلانية علشان المتعاملين معاها بيقوا عارفين يتعاملوا معاها ازاى.

• من حق العامل انه يقدم تقرير اصابة لصاحب العمل لإتخاذ الإجراءات المناسبة فيه يعنى لو حصل اصابة لعامل فى مكان عمله لازم يقدم تقرير اصابة عمل او تقرير حادثة باصابته و يحدد فى التقرير نوع الاصابة بناء على التقرير الطبي و بعدها بيبدأ صاحب العمل او رئيسه المباشر أو مسنول السلامة و الصحة المهنية يشوف مين اللي غلطان هل العامل هو اللي غلطان لأنه مش ملتزم بإشتراطات السلامة و الصحة المهنية و مش لابس ادوات الحماية الشخصية بتاعته و مش بعمل شغله بالطريقة الصحيحة اللي تجنبه اى اصابة و فى الحالة دى يبقى هو اللي بيتحمل نتيجة غلظه .. ولا العامل ده كان ملتزم بكل اللي فات دة لكن رغم كدة حصلت له الحادثة دى فيقدر يطالب صاحب المعمل بالتعويض المناسب.

• من حقه لو اكتشف خطر جديد طرأ على طبيعة شغله انه يقدم به طلب أو شكوى لصاحب العمل و يطالبه بالحماية منه ... يعنى مثلا العامل جه فى يوم لقي الـ Stand اللي بيحط عليه الكيماويات متآكل و أصبح غير صالح لحمل الكيماويات اللي وزنها ثقيل و فيه منها مواد سائلة خطيرة قابلة للاشتعال مثلا أو أحماض أو خلافة أو مثلا المعدة اللي هو شغال عليها لقلها بدأت تهيس منه و كل شوية تعمل ضوضاء عالية و تكسر مثلا العبوات الزجاجية اللي بتتملى جواها أو مثلا غلاية الضغط فيها بيعلو و مبتقفش عند الحد المعين اللي احنا محددينه ليها تقف عنده ... كل دى مخاطر لو ما اتلحقتش ممكن تسبب كوارث بمعنى الكلمة علشان كدة العامل الناصح فى مكان شغله لازم يكون عنده حس كدة يكتشف به الخطر و يتوقعه قبل حدوثه و يبلغ بيه مديره المباشر علشان يتحط فى الخطة بتاعة لجنة السلامة و الصحة المهنية فى المصنع علشان يتاخذ فيها الإجراءات المناسبة و توفير الحماية للعامل المحتك بيها.

• من حقه انه يتم تدريبه على كيفية تأدية عمله بطريقة آمنة و كيفية حماية نفسه و غيره و التدريب دة لازم يبقى دورى و منتظم مش مرة واحدة و خلاص لأ ... بيتم تدريب العامل على شغله أولا و ازاي يعمل به بأصح و أمن طريقة ممكنة لنفسه و لمكان شغله و يعرف اية الجديد فى شغله و ازاي يعمل به كمان تدريبه على اكتشاف اى خطر جديد او محتمل ممكن يحصل و يبلغ بيه و كمان ازاي لو حصل حادثة يعرف يعمل اية مش يغرق فى شبه مية يعرف ازاي يحمى نفسه و يحمى غيره من الحادثة دى و يعرف ازاي يعمل اسعافات أولية لزميله لو أصيب فى مكان عمله مثلا على ماكينة أو بسبب مادة كيماوية خطيرة أو اى حاجة زى كدة.

• من حق العامل على الشركة توقيع الكشف الطبي الدورى عليه و لضمان عدم تأثير بيئة العمل عليه بشكل سلبي و تدارك اى مشكلة صحية للعامل علاجها قبل تطورها و انها تصبح مزمنة زى مثلا الربو او فقدان السمع او اصابات الظهر و العمود الفقرى نتيجة زيادة احمال او اى اصابة مزمنة اخرى حتى لو كانت نفسية ناتجة عن الضغط النفسى اللي بيتعرض له العامل فى مكانه لأن الضغط النفسى بينتج عنه امراض عضوية كتير ربنا يعافينا و اياكم !

• كل اللي فوق دة من حق العامل انه يعرفه و يطالب به بدون اى خوف من عقاب او مضايقة من صاحب العمل او رئيسه المباشر و بدون اى محاولات اسكات او تفويت الفرصة على العامل انه يطالب بحقه و من حق العامل انه يشتكى فى خلال 30 يوم للأوشا انه تم عقابه او تم تجاهل طلبه فى توفير بيئة عمل آمنة لو كان معاه الحق بتيجي الأوشا " تقفل " الشركة او المكان اللي فيه المشكلة خالص لحد ما تتحل بواسطة صاحب العمل و كمان بتحط غرامات مالية ايضا كنوع من العقاب و بتزيد بتكرار الخطأ.

نيجي لحقوق صاحب العمل أو هنسيميا حقوق الشركة :-

- من حق الشركة عليك انك تلتزم باحتياطات السلامة فى مكانك بدون تقصير.
- من حق الشركة عليك انها طالما موفرة ليك ال PPEs الخاصة بعملك فلازم تكون لابسها.
- من حق الشركة انها لما تدربك على شغلك لازم تقوم بيه على افضل ما يمكن منعا للحوادث.
- من حق الشركة انك تبلغ فوراً عن اى حاجة خطأ انت شايفها ممكن تعمل مشكلة او تؤدى لكارثة على المصنع .. و فى فرق بين انك تبقى آسف يعنى فى التعبير "عصفورة" و انك تبلغ عن مشكلة تخص العمل بطريقة احترافية لأن التبليغ عن مشكلة بيبقى له طريقة عرض معينة و تقرير مكتوب بيشرح الخطأ اللي انت شفته بدون شخصنة و اقتراحاتك للحل و بيروح للمشرف على السلامة او المدير المسئول علشان يبدأ يتخذ فيه اجراءات تجنبه ... اما العصفورة فكلنا عارفينه !
- من حق الشركة ان لو حصل كارثة زى حريق مثلا انك تبقى عارف كويس قوى هتعمل اية سواء كنت فى فريق الاخلاء لزمائك او فريق مكافحة الحريق لو كان بسيط يسهل السيطرة عليه بالطفايات اللي فى المصنع اما لو كان حريق كبير لا قدر الله مش مسئوليتك دى مسئولية الدفاع المدنى و مهتمك الاولى و الاخيرة هى اخلاء زملاءك و عمل الاسعافات الاولية اللازمة لهم فقط لا غير علشان متزودش الطين بلة زى ما بيقولوا.
- من حق الشركة عليك و من حق زمائك عليك انك تويعيم بشروط السلامة و الصحة المهنية بطريقة ودية و بنقاش مثمر عن فائدة الالتزام بيها اثناء العمل علشان ميحصلش لأى حد فيهم حادثة تأثر عليه و على مستقبله المهني أو على حياته عموماً لا قدر الله.

كل الكلام اللي فوق دة بتعمله كموظف عادى فى الشركة لكن بيبقى هو مسئولية لجنة السلامة و الصحة المهنية فى المصنع و اللي بتبقى مكونة من كذا عضو من ادارات المصنع المختلفة يرأسهم مسئول السلامة فى المصنع و دول بيجتمعوا علشان يتابعوا كل الكلام دة و يطوروه.

انواع ال Inspections او التفتيشات اللي ال OSHA بتعملها:-

- تفتيش عام سواء مجدول او مفاجى و دة بيبقى للإطمئنان على التزام الشركة بمعايير الأوشا.
- تفتيش بناء على شكوى و دة بيكون ان عامل قدم شكوى و الأوشا جاية تحقق.
- تفتيش بعد حادثة نتج عنها حالة وفاة او 3 حالات اصابة لمعرفة سبب الحادث و مجازاة المقصر لأن وارد يكون اللي عمل المشكلة هو العامل المصاب نفسه فبيتحمل نتيجة خطوه و مش بياخذ تعويض او لو التقصير من الشركة بياخذ تعويض و غرامة على الشركة و الزامها بتصليح الأضرار على حسابها.
- تفتيش متابعة لمتابعة تنفيذ الشركة لقرارات او اجراءات عقابية اتخذت مثلا بحق الشركة الفلانية علشان قصرت فى حاجة سواء ادى التقصير لكارثة او لا و بالتالى جات الأوشا علشان تشوف الشركة عملت اللي اتطلب منها ولا لا.

لو سمحتم راجعوا الجزء بتاع الأيزو 18000 لأنه يحتوى على المخاطر المحتملة و ازاي تعامل معاها و اية ال PPEs اللي مفروض استخدمها لأن الأخطار اثناء العمل مبتتغيرش لكن انا بس حبيت اوضح الفرق بين الأوشا و الأيزو 18000 كحاجتين معمولين لنفس الغرض.

خامسا: ISO 14000

و دى يا شباب عبارة عن مجموعة من المتطلبات اللى اتعملت سنة 2004 علشان نأسس بيها نظام ادارة بيئة _ **EMA Environment Management System** _ كويس و أى شركة عايزة تحافظ على منتجها و بيئة العمل فيها و صحة العاملين و المكان اللى هى موجودة فيه عموما بتحاول تطبق المتطلبات دى علشان تاخذ شهادة الأيزو 14000 فى ادارة البيئة بشكل كويس و النظام دة يا شباب ممكن يتم تطبيقه على أى حاجة يحتمل انها تكون مصدر تلوث أو أى مكان أو مؤسسة أو شركة عايزة تقلل مصادر التلوث عندها أو تحافظ على استمرارية الموارد البيئية اللى فيها أو اللى بتقوم عليها الصناعة بتاعتها بحيث تحقق أفضل استخدام مع اقل درجة من التلوث الناتج عنها و دى فعلا فائدة كبيرة جدا للى يهتم بيها و هيخلى حاجات كتير فى مجتمعاتنا تتغير للأفضل.

• مزايا تطبيق متطلبات الأيزو 14000 :-

1. ببحسن زى ما قلنا الأداء البيئي أو الممارسات اللى بتتم داخل المنشأة أو الشركة أو المؤسسة اللى بيتطبق فيها بحيث يحافظ على المنتج و العاملين و الشركة نفسها و المكان اللى هيا فيه.
2. بيحط اطار واضح جدا من الممارسات اللى بتساعدنى على تقليل التلوث فى البيئة من حولينا.
3. بيزود كفاءة الشركة من خلال العمل فى بيئة كويسة و بيوفر تكاليف ممكن اخسرها نتيجة العمل فى بيئة غير ملائمة ينتج عنها مشكلات فى المنتج أو فى ال Man Power أو فى المنطقة المحيطة بالشركة.
4. بيزود اطمئنان المستهلك للمنتج بتاعى من خلال وضع ملاحظة على عبوة المنتج ان شركتى واخدة شهادة الأيزو 14000 فى ادارة البيئة و بالتالى بيزود الطلب على منتجى فى السوق و يزود ارباحى.
5. بيزود قدرات التوقع و التنبؤ بأى مشكلات بيئية سواء موجودة عندى و انا مش واخد بالى منها أو ممكن تحصل مستقبلا علشان اتفادها
6. ببحسن القدرة على ادارة الموارد البيئية بشكل عام و عدم الإسراف فى استهلاكها و تدميرها و خصوصا لو كانت موارد بيئية نادرة أو شحيحة
7. ببخلىنى اتجنب حدوث مشاكل الحكومة أو الجهات المسؤولة نتيجة مشاكل مع جيرانى فى المنطقة اللى انا فيها لأنهم شايفين ان وجود شركتى خطر عليهم و بالتالى حصولى على الشهادة نظريا ممكن يطمئنهم من ناحيتي و الجيران دول ممكن يكونوا مناطق سكنة أو حتى مصانع بجوارى فى المنطقة الصناعية اللى أنا فيها.

و دلوقتى هنتكلم عن متطلبات الأيزو 14000 و كيفية تطبيقه :-

- **Management Commitment :-** يعنى التزام الإدارة عن طريق وضع سياسة ادارة بيئية للشركة تحدد فيها اية اهدافها اللى عايزة توصلها من خلال تطبيق متطلبات ال ISO 14000 عندها يعنى مثلا تقليل التلوث و توفير تكاليف و زيادة الأمان البيئي و استخدام الموارد البيئية بشكل منظم يحافظ عليها و هكذا و نشر السياسة دى بين العاملين فى الشركة بحيث الكل يبقى على علم بيها و يشارك فى تطبيقها و بردو لازم تحتوى السياسة دى على التزام بالتطوير الدائم ليها و متابعة أى مستجدات على صناعتى و اضيفها باستمرار ثم الالتزام بكل ما جاء فيها دايمًا و تنفيذها.

• **Identification Of Environmental Aspects** -: تعريف دقيق جدا بالتفصيل الممل لكل الجوانب البيئية و تأثيرها المطلوب ادارتها ادارة سليمة سواء كانت فى :- رقم واحد المنتج بتاعى مثلا عندنا مصنع انتاج مياة شرب معالجة معبأة عندى مخلفات كيمياوية زى مخلفات المياة المستخدمة فى التنظيف و الغسيل للأرضيات و المستخدمة فى غسيل الفلاتر الرمل مثلا و الكربون فى عمليات ال **Back Washing** اليومية لتنظيف الفلاتر من أى عوالق و شوائب حجزتها و كمان الكيماويات المستخدمة فى اجراء الإختبارات على المياة كلها كيميائيات خطيرة بينيا فهيطلع لى فى الصرف الصحي كميات كبيرة من المياة غير نظيفة محملة بكميات رهيبه من المخلفات الكيماوية ... و عندى كمان المخلفات الفيزيائية زى مثلا عبوات تالفة او فارغة من عبوات المنتج أو كراتين أو شموع **Cartridge Filters** (عارفينها اللى بتبقى فى فلاتر المياة بتاع البيت دى) أو عبوات فارغة من عبوات الكيماويات اللى داخله عندى فى الصناعة بتاعتى جاييها من المورد و خلصت أى مخلفات لأى نشاط من لحام أو تقطيع أو فك و تركيب لقطع غيار لا تصلح مجددا للإستخدام و هكذا قيسوا على هذا أى مخلفات لأى صناعة تانية ... و ثانيا المجتمع اللى حوليا أو المنطقة المحيطة بشركتى هل هى منطقة سكنية و أنا مثلا هسبب لهم ضوضاء أو تلوث بأدخنة أو مخلفات الصناعة بتاعتى أيا كانت و لا انا مثلا مصنع مواد غذائية و جمبي مصنع تانى لإنتاج الأسمنت أو منتجات البترول أو حتى الطوب الأحمر دة بنشوف مدخنة طول كدة شغالة دخان صبح و ليل و ليل و صبح و هتأثر بالتالى على صلاحية منتجى و هكذا.

• **Setting & Implementing Performance Targets** -: يعنى أبدأ بعد ما حددت الجوانب البيئية اللى عندى و تأثيرها أبدأ أحط لها طرق متابعة و مواصفات علشان متخرجش عن الحد المسموح بيه فى القوانين المحلية للمكان اللى أنا شغال فيه و أشوف هتخلص منها ازاي ... و نبدأ بالمخلفات الفيزيائية لأنها سهلة كل اللى هعمله انى افصلها عن بعضها فى سلالات مهملات مخصصة لكل نوع يعنى المخلفات الزجاجية لوحدها و الورقية لوحدها و البلاستيكية لوحدها و لو عندى مخلفات ذات خطورة عالية زى اطباق زراعة البكتريا **Petri Dishes** فى معامل الميكروبيولوجي بعملها سلة مهملات خاصة بيها و هكذا ... أحدد نوع المخلفات و افصلها لوحدها علشان يجي راجل متعهد تجميع المخلفات دى يشيلها يوديها تانى لمصانع تدوير المخلفات دى.

أما المخلفات الكيماوية لازم و حتما ولا بد نعمل فصل للمخلفات دى على قد ما نقدر يعنى مثلا المخلفات القلوية لوحدها و المخلفات الحامضية لوحدها دة فى حالة لو كنت فى المعمل مثلا و بتخلص من عينة بعد ما قستها و بعد كدة بردو يجي راجل متعهد ياخذ المخلفات اللى أنا فصلتها فى حاويات معلمها أنا إن دى حاوية مخلفات قلوية و دى حاوية مخلفات حامضية و بيروح يوديها مصانع معالجة مخصصة بدل ما تروح فى الصرف الصحي العادي أو فى أى ترع أو مصارف أو مياة جارية و كدة زى الكوارث اللى بنشوفها ! و تأثر على البيئة أما لو كانت مياة بكلمات ضخمة رايحة الصرف الصحي دى ملهاش غير انى اتابعها باختبار بيتعمل على مياة الصرف اسمه **COD & BOD**

1. **COD Chemical Oxygen Demand** -: هو كمية الأوكسجين المستهلكة فى أكسدة المركبات العضوية لتحويلها الى مواد غير عضوية زى (CO , SO_2 , CO_2 , NO , NO_2) و P_2O و هكذا و دة بيعطيني اشارة على وجود مواد قابلة للتحلل تسبب لى تلوث فى المية و كلما قل الأوكسجين فى الإختبار دة بيدل على زيادة الملوثات العضوية و ارتفاع نسبتها فى المية و فى الحالة دى بعمل اجراء تصحيحي **Corrective Action** علشان اقلل كمية الملوثات العضوية اللى عندى للحد الأدنى على قد ما اقدر بحيث لما المية تروح لمحطات معالجة مياة الصرف

الصحي الحكومية تكون محتاجة معالجة بسيطة و بالتالى ابقى ساهمت بشكل فعال فى حماية البيئة عندى و فى المنطقة اللى انا فيها.

2. BOD Biological Oxygen Demand :- و دة اختبار بنعمله علشان نعرف منه الملوثات الحيوية فى المية زى البكتريا اللى بتستهلك الأوكسجين فى نشاطها الحيوى و كلما قلت كمية الأوكسجين بيعطينى دليل على وجود بكتريا كثير فى مياة الصرف عندى و على أساسها بردو باخذ اجراء صحيحي بانى اقلل كمية البكتيريا الموجودة فى مياة الصرف عندى و دة بيتم من خلال السيطرة على عمليات الانتاج من البداية و الاهتمام بنظافة المكان كويس جدا و هكذا و يا حبذا لو المصنع اللى أنا فيه يكون فيه محطة لمعالجة مياة الصرف الصناعى و الصحى للمصنع و دى حاجة لذيدة جدا كمجال شغل.

• **Work Instructions :-** يعنى يبدأ اجيب كل الكلام اللى فوق دة و ارتبه فى تعليمات شغل و اوزعها للناس علشان يبقى ملزم للجميع و بالتالى اضمن تفاعل العاملين معايا و مشاركتهم فى تطبيق التزامات ادارة البيئة بشكل فعال و اعقد لهم دورات تدريبية بشكل دورى و منتظم علشان يبقوا على علم و اتصال مستمر بالمتطلبات دى و لو فيه تطوير أعممه عليهم علشان كله يبقى فى الصورة النهائية من التعليمات دى و يتم تنفيذها بكفاءة.

• **Establishing Periodically Auditing Program :-** يعنى تأسيس نظام مراجعة و تقييم داخلى لنظام ال ISO 14000 علشان اشوف اذا كان بيتم تطبيقه بصورة كويسة و لا لا و هل العاملين عندى فاهمينه كويس و فاهمين متطلباته و لا لا عن طريق انى احط كل الجوانب اللى فوق دى فى Check List كدة يعنى قائمة مراجعة فيها كل الجوانب البيئية المحتملة عندى و اقسماها بقى (موارد ، ملوثات ، آثار جانبية ، ...) و أبدأ احط تحت كل نوع منهم الحاجات اللى بتندرج تحته و ليها علاقة بيه و مكان وجودها فى المصنع و نوع تأثيرها ايجابي و لا سلبي و ططرق مراقبتها و التحكم فيها و هل مطبقة و لا فيها اهمال و هكذا و أمر على المصنع كله بالقائمة دى لحد ما اعطي كل الجوانب دى علشان اقيمها بعدين فى اجتماع الإدارة.

• **Periodic Reviews By Top Management :-** هنا بقى مع الإدارة بتاعة المصنع يبدأ اشوف النتائج اللى وصلت ليها بعد التقييم دة هل هى مرضية و لا فى جوانب تقصير لازم أبدأ اعالجه أو اشوف لو كان فيه جوانب بيئية لم يتم تغطيتها فى النظام عندى سواء تم نسيانها او طرات فى أى تجديد أبدأ اضيفها عندى و أوفر الإمكانيات اللازمة لمراقبتها و اضيفها فى سياسة الشركة البيئية و اعمل توعية بيها و هكذا على طول افضل اقيم نفسى و اشوف انا فين من تطبيق النظام دة عندى فى الشركة.

سادسا: Food Safety System Certification FSSC 22000

في سنة 2001 منظمة الأيزو حبت تعمل Standard أو نظام كدة لصناعة الأغذية عموما قائم على مبادئ ال HACCP اللى كنا اتكلمنا عنها فى حلقة قبل كدة فعملوا نظام اسمه ISO 22000 لسنة 2005 حظوا فيه متطلبات نظام سلامة الغذاء اللازم توافرها فى صناعة الغذاء عموما لكن ال ISO 22000 متقبلش من منظمة تانية اسمها Global Food Safety Initiative (GFSI) دوروا عنها على النت ☺ و سبب الرفض كان علشان الأيزو 22000 مكاتش فيه Pre-requisite Programs البرامج الإشتراطية و دى هى البرامج المتعارف عليها عالميا و الموضوعه للتحكم فى العملية التصنيعية فى وسط بيئي آمن ... و ساعات بيستعوضوا عنها بالSOP بتاعة الشركة نفسها المطبقة بالفعل أو بيضيفوا عليها حسب كل صناعة و البرامج اللى محتاجاها.

سنة 2008 جت مجموعة من الشركات العالمية الكبيرة وضعوا ملحق سموه Publicly PAS 220 Available Specification عملوا فيه البرامج الإشتراطية دى اللازمة للأيزو 22000 فقامت منظمة ال GFSI اللى انتوا دورتوا عليها على النت وافقت على الأيزو 22000 مع الملحق بتاعه دة ☺

و بعدين جت مؤسسة ال Food Safety Certification جمعت النظام بالملحق بتاعه فى Standard واحد و سموه FSSC 22000 و وافقت عليه منظمة ال GFSI أخيرا سنة 2010 و بكدة بقى عندنا نظام بيجمع متطلبات سلامة الغذاء اللى موجودة فى ال HACCP & GMP فى نظام ادارة سلامة غذاء واحد بيغطى جميع العمليات اللى بتلامس المنتج سواء بطريقة مباشرة أو غير مباشرة.

طيب لية نظام ال FSSC 22000 نظام مهم جدا فى مجال سلامة الغذاء ؟؟

لأنه أشمل نظام إدارة سلامة غذاء Food Safety Management System (FSMS) اتعمل لحد دلوقتى و جمع كل مميزات الأنظمة السابقة ليه كلها فى نظام قياسي واحد قابل للتطبيق و المراجعة عليه سواء داخليا من داخل الشركة بأن الشركة تراجع على نفسها يعنى تعمل Auditing لنفسها أو عن طريق مراجعين خارجيين من الشركات المعتمدة من منظمة الأيزو و اللى ليها صلاحية منح الشهادة دى للشركات اللى طبقت النظام و تتابع تطبيقه باستمرار.

من ضمن مميزات ال FSSC 22000 كمان :-

- انه عمل تكامل بين نظام ادارة سلامة الغذاء اللى اتعمل علشانه مع نظم الادارة الأخرى زى نظام ادارة البيئة EMS و نظام ادارة الجودة QMS و نظام ادارة السلامة و الصحة المهنية OHSAS و كل دول اتكلمنا عنهم قبل كدة فى حلقات فاتت.
- انه كمان عمل دمج كامل لل ISO 22000 و لل PAS 220 و لل HACCP مع الخطوات التشغيلية للصناعة بتاعته أيا كان هي اية.
- معتمد من منظمة GFSI اللى قلنا عليها فوق.
- بيعمل تحكم و بيقفل من الأخطار اللى ممكن تأثر لى على سلامة المنتج الغذائى بتاعى و بيحسن من عمليات التصنيع و الجوانب و المفاهيم المرتبطة بيها.
- بيساعد المؤسسات على اتباع الأساليب القانونية فى عملها سواء القوانين المحلية أو الدولية.

- بيزود الشفافية على طول العملية التصنيعية سواء على مستوى الخطوات أو الأفراد المشغلين أو الإدارة أو حتى بين المؤسسة أو الشركة و بين محيطها اللى هى فيه.
- بيساعد المؤسسات و الشركات الصغيرة أو الغير متطورة فى بنيتها الأساسية و التصنيعية انها يبقى عندها نظام ادارة متكامل تشتغل بيه.

و دلوقتى بقى هنتكلم عن 8 عناصر الرئيسية لل FSSC 22000 :-

1- SCOPE او مجال النظام :-

و فيه ان النظام دة معمول علشان يعمل تحكم فى العمليات التصنيعية للمنتجات الغذائية بشكل عام بحيث يتأكد ان كل عملية منهم بتعمل صح على أكمل وجه بما يناسب متطلبات العملاء اللى بيستهلكوا المنتجات دى تجنباً لأى خطأ يودى الى أى كارثة.

2- Normative Reference :-

الجزء دة بيوضحوا فيه المصادر اللى فيها المصطلحات المرتبطة بنظم الأيزوزى نظام إدارة الجودة و نظام إدارة السلامة و الصحة المهنية و نظام إدارة البيئة و ال GMP و ال HACCP و اللى تم دمجها كلها فى نظام ال FSSC 22000 .

3- Terms & Definitions :-

و دة عملوا فيه تعريفات للمصطلحات موجودة فى النظام دة و الأنظمة السابقة ليه علشان يعملوا توحيد لفهم المصطلحات دى عند الناس كلها بحيث ميحصلش خلط عن المشغلين للنظام و كل واحد يفهم النظام و يفصله على مزاجه.

4- Food Safety Management System :-

الهدف من الجزء دة هو تأسيس و توثيق و تفعيل و الحفاظ على نظام ادارة سلامة الغذاء ... الأربع حاجات دول مهمين جدا يا شباب لأنهم بيتضمنوا الخطوات و النتائج الموثقة ليه بعد تفعيل الخطوات و اللى هتاخذ بايدي فى النهاية لعمل التطويرات اللازمة للنظام بتاعى و عمليات التصنيعية اللى أنا شغال بيها و بالتالى أفضل فى حركة مستمرة و مراقبة مستمرة لنفسى بنفسى و يفضل منتجى فى تحسن مستمر.

5- Management Responsibility :-

أنا رجعتا تانى بقى لو فاكرين لما قلنا ان كل نظام بيطلع من الأيزو لالالالال لازم يكون من ضمن أجزاءه حاجة اسمها التزام و مسئولية الإدارة العليا لتنفيذ النظام ☺ لأن بدون التزام و ارادة من الإدارة العليا للتطبيق مفيش حاجة هتتطبق فلانم يكون فى مدير مخصوص لإدارة سلامة الغذاء فى المؤسسة أو الشركة و يكون متحدد لها سياسات و أهداف و مسئوليات و محطوط لها خطط طوارئ و كل دة بالتوازي مع وجود أساليب تواصل فعالة مع حاجتين :- الموردين بتوع الخامات ، و العملاء اللى هيستهلكوا المنتج .. و بعدين بعد ما اعمل كل دة أبدأ أعمل خطة مراجعة للكلام دة كله لضمان

الإستمرارية فيه و اتخاذ الإجراءات اللازمة لتصحيح الخطوات أو الأشياء الغير مطابقة علشان يبقى فى تحسين مستمر للمؤسسة.

-: Resource Management -6

و دى ليها علاقة بالإدارة العليا بردو و بتتطلب منهم توفير مصادر و ميزانيات و عاملين لتشغيل النظام دة بفاعلية و مش بس كدة لأ كمان لازم يتعمل لهم تدريبات دورية على شغلهم و على النظام دة و يبقى عندهم وعى بيه و بأهمية الإلتزام بتنفيذه ثم تقييمهم بناءً على درجة التزامهم بس لازم أكون موثر لهم بينة عمل مناسبة فيها احتياطات السلامة ليهم علشان أعرف أحاسب المخطيء بعد كدة.

-: Planning and Realization of Safe Products -7

و هنا الجزء دة بيهتم بتطبيق مبادئ ال GMP و ال HACCP اللى اتكلمنا عنهم فى حلقات فاتت بالإضافة بقى للبرامج أو الخطوات الإشتراطية اللى هى ال SOP بتاع الصناعة بتاعتى اللى اتكلمنا عنها فى أول حلقة لو فاكيرين و اللى قلنا عليها فوق حسب الصناعة بتاعتى اللى هى لازم تبقى موجودة و مطبقة زى مثلا :-

برامج التدريب .. برامج أو خطوات التعقيم للمعدات فى المصنع .. برامج الصيانة و العمرات .. برامج التتبع للنتائج بتاعتى لضمان أعلى مستوى من التأكيد عليها .. برامج مراجعة الموردين و خاماتهم سواء عندى لما الخامات تيجي أو عملهم زيارات أشوف بيصنعوا الخامات اللى بيوردوها لى ازاي .. كمان برامج التحكم فى المنتج الغير مطابق للمواصفات بعمل فيه اية حسب كل صناعة ... و أخيرا برامج استدعاء المنتج من السوق فى حالة لو فلت منى من المصنع و هو غير مطابق للمواصفات.

Validation, Verification and Improvement of the Food Safety -8 -: Management System

اللى هو ازاي أخلى نظام ال FSSC 22000 صالح دائما للتطبيق فى شركتى و ازاي أتأكد من كدة و ازاي أحسنه بإستمرار و دة بيحصل عن طريق انى أتأكد ان كل الخطوات و الوسائل اللى بنفذ بيها النظام سليمة و صحيحة علميا و كمان لازم أعمل تخطيط و توثيق مستمر و منتظم لنتائج التدقيق اللى بعمله على الخطوات اللى بنفذها فى صناعتي يعنى مثلا أنا جيت عملت معيرة لجهاز معين بمحاليل المعايير بتاعته و طلع لى نتائج المعايير مطبوطة الصح انى مينفعش أكتفى بكدة لأ بجيب كمان عينة من محلول قياسي Standard Solution بكون عارف قيمته و بروح مخلص الجهاز يقيسه لى تانى دة اسمه تدقيق لنتيجة المعايير أو Verification و بعمل كدة علشان أبقي متأكد ان الجهاز دة أو أى خطوة تانية من خطوات الصناعة ماشية تمام و حسب المواصفات.

الكلام كبير قوى أنا عارف و مكلع بس دة لأنه دمج كل اللى فاتت كله من أنظمة الجودة فى نظام واحد فلازم اللى يدوس فيه يبقى عنده خلفية الأول عن باقى شهادات الأيزو اللى طلعت قبله و اللى شرحناها قبل كدة لأنى لما اترشحت له كمتدرب مفهمتش حاجة بردو إلا لما جبت كل الكلام اللى قبله و قرأته و ربنا يوفقكم ☺

الباب الرابع
الاسعافات الأولية

First Aid

الاسعافات الأولية

مكنش ينفع اتكلم عن الأيزو 18000 و الأوشا من غير ما اتكلم عن الاسعافات الأولية يا شباب لأنها مهمة جدا فى حالة وقوع حادث لشخص لا قدر الله اثناء عمله فبدل ما نستنى لحد ما الاسعاف تيجي احنا ممكن نعمل شوية اسعافات اولية بسيطة تساعد فى انقاذ الشخص المصاب ننفذ بيها روحه لحد ما الاسعاف توصل اللي هي بتستجيب بسرعة دى و الناس بيوسعوا لها الطريق وكدة عارفينها ☺ ، علشان المريض ياخذ الرعاية الطبية الكاملة فى المستشفيات و كدهون يعنى ☺ ... و ياما ارواح ناس تم انقاذها بالاسعافات الأولية و كانت سبب فى نجاتهم لأنها اتعملت لهم بسرعة و بواسطة ناس عارفين و متدربين كويس و دة اللي هنحاول نوضحه هنا فى الباب دة ... لكن دة لا يعنى عن التدريب العملى فترة.

نتكلم جد بقى .. أنا عايز أكد على حاجة فى الباب دة عامة على كل الحالات اللي هنتكلم عليها ... أول ما تشوف حالة اصابة قدامك متفكرش الا فى انك تجرى على تليفونك و تطلب الاسعاف فورا و تصف لهم الوضع بالمختصر المفيد و تاتى حاجة تتأكد من العلامات الحيوية للمصاب و هى :-

1. النبض:- و دة ممكن تحسه من

- شريان الرسغ الحركة اللي كلنا عارفينها دى و بنشوفها.
 - الشريان الفخذى من بين الرجلين كدة.
 - الشريان السباتى اللي هو فى التجويف اللي فى الرقبة عند الحنجرة.
- معدل النبض الطبيعى من 60 الى 100 نبضة فى الدقيقة للشخص العادى و بيزيد مثلا لو فى كلب بيجرى وراك فى الشارع ولا طالع سلم على و بيقل اثناء الأنتخة و النوم و بنعرف منه مدى كفاءة عمل الجهاز الدورى.

2. الضغط :- و دة بيعبر عن شدة اندفاع الدم فى الشرايين و ينقسم لنوعين:-

- انقباضى اثناء انقباض عضلة القلب و دة بيبقى من 100 الى 140.
 - انبساطى اثناء انبساط عضلة القلب و دة بيبقى من 60 الى 90.
- الضغط المثالى هو 80/120 و لو زاد الضغط الانقباضى لحد 200 أول قل لحد 90 تروح تكشف.

3. التنفس:- شهيق و زفير و قفص صدرى طالع نازل .. معدلك الطبيعى من 12-16 مرة فى الدقيقة بيزيد و يقل حسب الحالة المرضية.

4. لون الجلد:- اللون الوردى و درجاته .. لما يبتهت روح اكشف.

5. درجة الوعى:- و بتساعدك فى تحديد مدى خطورة حالة المريض و بتنقسم الى :-

- واعى تماما اللي هو الشخص العادى
- مستجيب للنداء يعنى لما تنادى عليه بصوت على يجاوبك
- مستجيب للألم يعنى ميسمعكش بس لو أحدثت له ألم يحس بيه.
- الغيبوبة و دة شخص غير مستجيب للنداء أو للألم.


6. درجة حرارة الجسم :- و بتراوح من 36.5 الى 37.2 و بنقيسها يا اما بوضع الترمومتر لمدة دقيقتين تحت اللسان أو تحت الإبط بس تزرود نص درجة عن الترمومتر فى الحالة دى ... و لو زادت او قلت روح اكشف.

أولا : الإغماءات

هو فقدان الوعي نتيجة نقص فى كمية الدم المحمل بالأكسجين و رايح للمخ فتلقى المصاب فجأة بقى مش شايف قدامه و مش قادر يصلب طوله و هوب يروح واقع على الأرض.

و دة اسعافه بسيط يا شباب و هو انك بتسيب المريض على الأرض لحد ما يفوق و تفك له الكرافتة و زرار القميص مثلا و ترفع رجليه الاتنين على حاجة عالية دة لو كان بيتنفس .. أما لو مش بيتنفس تبدأ تتأكد ان مجرى الهواء بتاعه مفتوح بانك تفتح بقه و ترجع راسه للخلف علشان لو بالغ لسانه ولا فى اكل فى بقه المهم يعنى تتأكد ان مجرى الهواء بتاعه فاضى و هو راقد على ظهره على سطح صلب و بعدين تبتدى تعمله تنفس صناعى. و التنفس الصناعى ببدا بانك تضغط على صدر المريض 30 ضغطة فوق التجويف اللى فى نهاية الضلوع بصابعين و ابتدى اضغط و بعدين تقفل أنفه و تديله نفسين منفصلين عن طريق الفم لية بنضغط الاول قبل النفس لأن الضغط بيساعد القلب على انه ياخذ الاشارة العصبية اللى بتخليه يستعيد حركته من تانى و تفضل على كدة لحد المصاب ما يستعيد وعيه.

اتأكد الأول قبل ما تعمل أى حاجة انك اتصلت بالاسعاف و ان المصاب معدوش كسور علشان متعاملش معاه ببغف فحالة الكسر اللى عنده تتدهور أو لو كان فى مكان حساس زى العمود الفقرى تجيب له شلل ولا حاجة ببقى جه يحكلها عماها ☺



ثانيا : الأزمات القلبية

و دى بتبقى نتيجة حدوث جلطات أو ضيق فى الأوعية الشرايين اللى بتغذى القلب بالاكسجين وأعراضها بتكون عبارة عن آلام فى الصدرو الكتف و صعوبة التنفس و التعرق.

و هنا لازم تستغل الوقت اللى المريض فايق معاك فيه و تسأله عن أى أدوية بياخذها و تديهاله بسرعة و تخليه يقعد قعدة مرتاحة و تفك له هدومه بردو و حط له قناع اكسجين لو متوفر و لو مش بيتنفس اعمله تنفس صناعى.

ثالثا: الاصابات المختلفة

واحد اتعور فى وجهه و بينزف حط له غيار معقم يوقف النزيف و اضغط عليه و لو فى حاجة مغروسة متشيلهاش انت كمسعف اولى (إوعى ☺) سيبها و وقف النزيف و خلى المصاب فى وضعية مرتاحة. نفس الكلام لو واحد حصل له كسر او كدمة فى وجهه حط له تلج بسرعة و لو حاجة دخلت فى عنيه (مسمار) مثلا او عى تشيله و حط فوqe كباية مثلا او حاجة مجوفة بحيث يبقى جواها و ثبتها علشان متتحركش ببلاستر ولا حاجة و اجرى بيه على اقرب مستشفى او اتصل بالاسعاف زى ما قلنا فوق اول حاجة.

واحد مصاب فى رقبته .. أول حاجة اتأكد ان مفيش كسر فى الفقرات العنقية و لو فيه ثبت الكسر بجبيرة و اتأكد ان مجرى الهواء مفتوح و انه بيعرف يتنفس و لو فيه نزيق وقفه بالضغط عليه و طيران على المستشفى.

واحد مصاب فى صدره .. اصابات الصدر نوعين اصابات مغلقة (زى كسر فى الضلوع) او مفتوحة زى جرح غائر ،، فى حالة وجود كسر ثبت الكسر بحاجة تكون مرنة مخدة مثلا و اضغط عليها مش جبيرة ناشفة و خليه ياخذ نفس عميق كل شوية و متربطش اى حاجة على صدره علشان يعرف يتنفس. فى حالة الجرح الغائر (بالصدر او البطن) وقف النزيف بسرعة بالضغط عليه بغير معقم و لو فى حاجة مغروسة فى صدره متحاولش تشيلها أبدا متحاولش تشيلها لكن ثبتها كويس فى مكانها علشان متتحركش و تبوظ الدنيا زيادة و لو فى اى احشاء خارجة متمسهاش بس غطيها بغير معقم مبلل محلول ملح و طيران على المستشفى ... انتوا متخيلين معايا الافلام دى ولا اية ☺

رابعا: التسمم

السم هو اى مادة تؤثر على العمليات الحيوية لخلايا الجسم و تتلفها و اسبابه ممكن سوء استخدام الأدوية ، مأكولات فاسدة ، عن طريق الخطأ، الجهل بإنها مادة سامة، بقصد جنائي واحد عايز يخلص من مراته مثلا و هكذا .. ممكن التسمم يحصل عن طريق الفم ، الاستنشاق ، الجلد ، الحق ، العض أو اللدغ .. الخ

أعراضه فقدان الوعي و التعرق الشديد و اتساع حدقة العين و آلام شديدة فى البطن و تنفس غير طبيعي مع خلل فى ضربات القلب ... تسعف واحد زى دة ازاي؟؟ من غير ما تفكر اول حاجة تتصل بالاسعاف وتتأكد من ان مجرى الهواء مفتوح و تعمله تنفس صناعى علشان لو القلب توقف و لو خد السم دة عن طريق الفم حاول تخليه يستفرغ لو فايق معاك إلا فى حالات التسمم بمواد كاوية زى الأحماض او الصودا الكاوية أو الجاز أو ما شابه ذلك اديله لبن علشان يقلل تهيج المعدة و اجرى بيه على المستشفى علشان ياخذ العلاج المضاد للسم أو المادة الكيماوية . طب لو غازات سامة مستنشقة طلع المصاب فى الهوا بسرعة بس إلبس الأول قناع واقى من الغازات السامة علشان مترقدش جمبه !! و اعمله تنفس صناعى لو مغمى عليه و اديله اكسجين. طب لو سم عن طريق الحقن أو اللدغ و خلفه (الأفعى السامة هتلاقى مكان اللدغ انياب و الغير سامة هتلاقى أسنان بس مش هتلاقى انياب) .. قالك اعمله رباط ضاغط أعلى مكان الحقن أو اللدغ علشان يوقف سريان السم فى الأوردة و فى نفس الوقت ميوقفش النبض فى الشرايين و فى حالة التورم شيل من ايده اى حاجة زى الخواتم أو الساعة أو غيره (بس متخدهاش فى الزحمة ☺).

خامسا: الجروح

الجروح هي تمزق في أنسجة الجسم الرخوة زي الجلد مثلا و هي نوعين جروح مغلقة نتجت عن الاصابة بشيء غير حاد و بنعرفها من ان مكانها يبقي ازرق و مورم و في الحالة دي بترفع الجزء المصاب من المريض اذا كان ذراعه مثلا ولا رجله أعلى من مستوى القلب و تحط له كمادات باردة علشان التورم و تشوف اذا كان في كسر ولا لأ تعمله جبيرة و طيران على المستشفى أو جروح مفتوحة بتنزف زي الخدوش و القطع والبتر و الوخز و هنا بتغسل الجرح بمحلول ملح و بعدين توقف النزيف بسرعة بالضغط عليه .. متحطش محاليل مطهرة مركزة كتير على الجرح علشان الجرح متهتكش اكثر (استخدم الايثانول على خفيف كدة بقطن) و متحطش مراهم علشان لو في افرازات تخرج لأن المراهم بتمنعها و لو في شظايا مثلا في الجرح خرجها بملقاط ولا حاجة اما لو حاجة كبيرة متخرجهاش و بعدين خط غيار معقم للجرح و في حالة البتر هات حاجة املاها تلج و لف الجزء المبتور في شاش معقم و حطه في كيس نظيف و حطه فوق الثلج مش جواه و طيران على المستشفى علشان ممكن يتم اعادة الجزء المبتور تانى للمريض ... محدش يقشعر منى في الحتة بتاع قطع الغيار دي لو سمحتوا ☺

سادسا: الحروق

قالك الحروق هي عبارة عن تلف في أنسجة الجلد بسبب التعرض للحرارة أو الكهرباء او مواد كيميائية. و الحروق انواع ،، في حروق الدرجة الأولى و دي بتبقى احمرار في الجلد مع ألم خفيف و تشفى بسرعة و حروق الدرجة الثانية و دي بتسبب ألم شديد مصحوب بظهور فقاعات على الجلد و أخيرا حروق من الدرجة الثالثة و هنا بقى المصاب بي فقد الاحساس بالألم طبعا لأن التلف في الأنسجة وصل للنهايات العصبية و منظر الجلد يبقي زي المتفحم كدة و دي طريقة تحديد الجزء المحترق من الجسم عافانا الله و اياكم أجمعين.

الاطفال		الاشخاص البالغين	
النسبة	الجزء المحترق	النسبة	الجزء المحترق
١٨%	الرأس والعنق	٩%	الرأس والعنق
٩%	الطرف العلوي الواحد	٩%	الطرف العلوي الواحد
١٨%	الجزء من الامام	١٨%	الجزء من الامام
١٨%	الظهر	١٨%	الظهر
١٤%	الطرف السفلي	١٨%	الطرف السفلي
		١%	العانة

حاجتين اتنين اوعى تشيلهم من الحرق .. الهدوم أو اى حاجة لزقت في الحرق و الفقاعات اللي على الجلد اوعى تقرب منها دي حماية ربانية للجزء المحروق و ازالته بتوظ الحرق اكثر و تلوته. ممكن تستخدم مراهم حروق في حالة الحروق البسيطة أما في حالة الحروق الكبيرة حاول تقدر نسبة الحرق حسب الجدول اللي فوق دة و بعدين انقل المصاب بعيد عن منطقة الحريق و اتأكد انه واعى او اعمله تنفس

صناعى و لو فى مواد كىماوية انسكبت على المصاب اغسل الجزء المصاب دة كويس بمياة لمدة من اقل من 15-20 دقيقة و لفه بملاية الحروق او ملاية نظيفة عادية و طيران على المستشفى.

سابعا: اصابات الكهرباء

ازاى أصلا تتفادى الكهرباء؟؟ انك تبعد عنها و لو اشتغلت فيها أو اضطرتك الظروف انك تتعامل مع أى حاجة فيها كهرباء فى البيت أو الشغل لازم تكون لابس جوانتى و حاجة بلاستيك فى رجلك يعنى باختصار اعزل نفسك كويس و متقربش من أبراج الضغط العالى خالص ولا عواميد الإنارة أثناء المطر ولا اى سلك عارى انت مش عارف دة بتاع اية (اعزله أو هات حد يعزله) و شوف كل دول فىن و امشي عكسهم ... دة لمصلحتك انت و الله 😊

طب ازاى تسعف واحد اتكهرب؟؟ .. قالك لو شفت واحد متكهرب قدامك أوعى تقرب منه أو تلمسه لكن هات حاجة عازلة زقه بيها علشان تبعد عن التيار الكهربى اللى شده بأسرع ما يمكن بس متعوروش يعنى و بعد كدة لو لقيته واعى معاك و بيعرف يتنفس هديه و طمنه ان ربنا نجاه الحمد لله و لو لقيته فاقد الوعى و مش بيتنفس اعمله تنفس صناعى بسرعة و اجري بيه على اقرب مستشفى و خلوا بالكم من نفسكم.

ثامنا: الغرق

أول حاجة خالص بتعرف تعوم كويس؟؟!! لو بتعرف يبقى سيطر على الغريق كويس فى المية و خلى راسه برة و حاول تخليه واعى و أول ما تخرجه بره نيمه على ظهره و رجع راسه لورا و اتأكد ان مجرى الهوا مفتوح و ابتدى اعمله تنفس صناعى و بعد ما يفوق لفه ببطنية ولا حاجة تدفيه بعد ما تشيل هدومه المبلولة من عليه و طيران على المستشفى.

تاسعا: الغصة

الغصة دى واحد بلع حاجة أو وقف فى زوره حاجة سدت مجرى الهوا و المريض مش عارف ياخذ نفسه و مش عارف يتكلم ... طب نسعفه ازاى؟؟ قالك شجع المريض على انه يكح و تعالى وراه و اخبط بين أكتافه لفوق خمس أو ست مرات لو الحاجة اللى بلعها مطلعتش طبق صواب قبضة ايدك على الابهام اضغط بيها لفوق زى الصورة كدة (لأنها متتشرحش بصراحة 😊) اسفل الصدر لحد ما تخرج و اعمله تنفس صناعى لو فقد الوعى ... طب لو واحد كان لوحده مش معاه حد و حصله الموضوع دة يعمل اية ... اجرى فى لمح البصر فى جزء من الثانية على أى حاجة عالية زى حافة طرييزة أو بوفيه مثلا و ميل بصدرك عليها و اضغط بصدرك انت على الطرييزة كأن واحد هو اللى بيعملك زى الصورة كدة لحد ما اللى بلعته يخرج.



عاشرًا: الكسور

الكسور هي اصابات الهيكل العظمى و ليها عدة انواع :-

- كسر بسيط : العظم مكسور بس الجلد سليم
 - كسر مضاعف : كسر مع جرح فى الجلد و نزيف
 - كسر مفتت: العظمة مكسورة لأكثر من جزئين سواء بنزيف او من غير نزيف.
 - كسر منخسف: فى العظام المسطحة زى الجمجمة كدة بردو بنزيف او من غير نزيف.
- كل دة بيبقى مصحوب بألم شديد اللى ممكن يسبب صدمة عصبية و عدم قدرة على تحريك الجزء المكسور و تورم و ما تستهونوش بحماية النزيف دى !! .. و كمان كتر الحركة ممكن يخلى الكسر البسيط يتحول الى كسر مضاعف و يعمل تهتك فى الاوردة و الشرايين و ممكن يحصل تلوث للكسر المصحوب بنزيف.

طب ازاي نسعف المصابين بالكسور :-

قالك لو فى نزيف وقفه و اعمله جبيرة و حط له تلج على مكان الكسر ... طب ازاي نعمل جبيرة؟؟

- قالك اول حاجة قبل الجبيرة متحاولش انك تصلح الكسر مش خشب هو ☺ جبره زى ما لاقيته.
- الجبيرة تبقى ماسكة مفصلين واحد اعلى الكسر و التاني اسفل الكسر علشان تضمن ثباته.
- الجبيرة لازم تكون مبطنه بشاش و قطن علشان ميحصلش احتكاك مع الكسر يبوظه زيادة.
- شد الجبيرة كويس على الكسر بس بردو الشد ميبقاش اكثر من اللازم و علامتك هي تألم المصاب.
- اتأكد ان مكان الكسر دافى و فيه نبض و لف الرباط على الجبيرة من اسفل لأعلى.
- طب لو مفيش جبائر؟؟ قالك استخدم جسم المريض كجبيرة تثبت عليها الجزء المكسور يعنى لو الذراع مكسور تثبته على صدر المريض و لو رجله مكسورة تثبتها فى الرجل الثانية بانك تربطهم فى بعض.

الباب الخامس
الأجهزة و الأختبارات
Devices and Tests

أولا : اختبارات المياه

في الباب دة يا شباب هنتكلم أولا عن الاختبارات اللي بعملها للمية عندي في المعمل و هنعلم الاختبارات دي ل 3 أنواع :- فيزيائية Physical كخواص المية و كدة ، و كيميائية بالمعايرة Titrimetric ، و Spectrophotometric اللي هي بتعمل بالأجهزة اللي بتشتغل بالإمتصاص الضوئي ... لما بحفر بير يا شباب بودى المية اللي بتطلع لي لمعمل خارجي كبير و موثوق علشان يعمل لي تقرير بالمكونات الكيميائية للمية بتاعتي و على أساسها يبدأ أجهز نظام المعالجة بتاعتي و كمان أجهز معملتي اللي هبدأ فيه أعمل اختباراتي الدورية على المية دي قبل و بعد عملية المعالجة ... طب اية هي الأشياء اللي ممكن تكون موجودة في المية و الاختبارات اللي بعملها عليها:-

أولا :- الاختبارات الفيزيائية :-

- **اللون Color :-** زي ما حضراتكم عارفين ان الماء الصالح للشرب بيبقى عديم اللون علشان كدة أي لون موجود في المية ما هو الا شوائب في المية نتيجة اختلاطها بعوالق التربة مثلا لو كانت جوفية أو حصل أكسدة مثلا لبعض مكوناتها زي الحديد أو اختلطت بأى مادة لها لون ... حضرتك بتشوف اللون اية و تسجله و بس كدة.
- **درجة الحرارة Temp :-** و دة أهميته بتكمن في مناطق معينة بيبقى عمق الآبار فيها كبير قوى زي مثلا أنا كنت بشتغل على مية بتطلع من البئر من عمق 1800 متر تحت الأرض درجة حرارتها 70 درجة مئوية فلأزم أعملها نظام تبريد الأول قبل ما ادخلها مثلا على وحدة ال RO بتاعتي علشان متبوظش الأغشية بتاعتها و هكذا.
- **الطعم و الرائحة Sensory & Sniffing :-** و دة اختبارين بنعملهم للمية علشان نشوف طعمها و ريحتها هل لها طعم غريب مثلا حامضى أو قلووى أو لاذع أو سكرى أو مالح أو ملهاش طعم و هكذا دة ال Sensory و التاني اختبار الشم Sniffing علشان أشوف ريحة المية هل لها روائح غريبة ولا ملهاش ريحة ... حضرتك بردو هتسجل النتائج و خلاص.
- **التوصيلية الكهربائية Electric Conductivity :-** و دة بيبقى اختبار بيقولى و الله انت نسبة الأملاح اللي عندك في المية كبيرة ولا صغيرة و دة بقيسه باستخدام جهاز ليه Probe بيقرا العينة و بيدينى رقم بوحدته $\mu\text{S}/\text{cm}$ و كلما زادت التوصيلية الكهربائية زادت نسبة الأملاح ... فكرة عمل الجهاز تقوم على قياس كمية الشحنة الكهربائية للأيونات الموجودة في المية عن طريق ال probe اللي بيتكون من 2 الكترود محطوطين على بعد 1 سم من بعض و أول ما بيدخل البروب في المية بيتولد فرق جهد بين الالكترودين ... فرق الجهد دة بيحصل فيه drop نتيجة المقاومة الكهربائية للأيونات في المية و هي دي اللي الجهاز بيقيسها طبقا لقانون اوم $I=V/R$ فرق الجهد بيتناسب عكسيا مع المقاومة يعنى كل ما المقاومة زادت كل ما فرق الجهد قل يعنى التوصيلية الكهربائية قليلة لأن مفيش ايونات تعمل تيار كهربى (امبير) و العكس صحيح لما نيجي نقيس التوصيلية الكهربائية لازم درجة الحرارة تكون عند 25 درجة حرارة الغرفة علشان القراءة و حركة الأيونات بتتأثر بارتفاع و انخفاض درجة الحرارة ... معايرة الجهاز بتتم بمحلول معروف القيمة و بنختار قيمته تكون قريبة من المية اللي انا بقيسها دائما يعنى مثلا لو من 100 - 1000 زائد او ناقص $\mu\text{S}/\text{cm}$ 500 بجيب محلول معايرة $\mu\text{S}/\text{cm}$ 1000

ولو من 1000-10000 زائد او ناقص 5000 بجيب محلول معايرة 10000 $\mu\text{S/cm}$ كمثال و هكذا و لازم اراعى درجة الحرارة فى المعايرة لأنها مهمة جدا لازم تكون 25 درجة مئوية واتبع تعليمات المعايرة اللى جاية مع الجهاز.

• **الأملاح الصلبة الذائبة Total Dissolved Solids TDS :-** و دة جهاز برودو بيقيس نسبة الأملاح الذائبة فى المية زى فكرة جهاز ال EC اللى فوق دة جهاز ليه Probe بيقرا العينة و بيدينى رقم بوحددة ال ppm. طب افرض انا معديش جهاز يقيس ال TDS على طول لكن عندى جهاز بيقيس التوصيلية الكهربائية اذن ال TDS معلومة عندى بضرب الرقم اللى طلغى من جهاز ال $0.62 \times \text{Conductivity}$ هيدينى قيمة ال TDS و لو انا متوقع ان كمية الأملاح عالية زى مية ال RO reject كدة لو فاكرين بضرب $0.7 \times$ و (0.7 & 0.62) دول ثوابت معروفة.

• **ال pH :-** و دة اختبار روتينى للمية بعمله علشان أعرف قيمة الوسط بتاع المية بتاعتى هل حامضى ولا قاعدى ولا متعادل علشان أعرف إذا كان مطبوظ ولا هزوده ولا هقله بخطوات فى العملية التصنيعية بتاعتى ... طبعا كلنا عارفين ال pH هو اية و جه ازاي دة عبارة عن Scale من 0 -7-14 و جت القيم دى من معادلة ثابت تأين المية اللى هو حاصل ضرب تركيز ايون الهيدروجين \times تركيز ايون الهيدروكسيد بعد ما أخذنا سالب اللوغاريتم بتاعها و أفلام كدة ☺ ... جهاز قياس ال pH بيعتمد على قياس فرق الجهد فى المية معتمدا على تركيز ايون الهيدروجين فيها. الجهاز له الكترودين ممكن يبقى كل الكترود فى بروب او الاتنين فى بروب واحد و محطوطين فى محلول متعادل من ال KOH يحتوى على تركيز ثابت من ايونات الهيدروجين ... لما بيتحط البروب فى المية الحامضية ذات تركيز ايونات الهيدروجين العالى بيتولد فرق جهد فى المية و لأن المحلول الداخلى فى الالكترود معروف ال pH بتاعته و معروف فرق الجهد بتاعه فيقوم الجهاز واخذ الفرق بين الجهدين و يحوله لقيمة تبقى هى قيمة ال pH. و برودو لازم نهتم بدرجة الحرارة لازم تكون 25 درجة مئوية و فى حالة المعايرة بعاير الجهاز بتاعى ب 3 محاليل معروفة ال pH و هى 4.1 و 7.0 و 10.0 و لازم اتأكد ان الجهاز قرأهم صح عند 25 درجة مئوية و اتبع تعليمات المعايرة اللى جاية مع الجهاز.

• **العكارة Turbidity :-** و دة اختبار بيقيس نسبة الشوائب اللى موجودة فى المية وبتقاس عن طريق جهاز له خلية توضع بها العينة و فكرة عمله قائمة على قياس مدة حجب عينة المية للضوء المار من خلالها و تكون النتيجة بوحددة قياس اسمها Nephelometric Turbidity Unit NTU ... فكرة عمل الجهاز تقوم على تسليط كمية من الضوء معروفة الكثافة الضوئية على العينة اللى عايز اقيس لها العكارة فتقوم الشوائب المعلقة فيها تشتت شعاع الضوء دة او تمتصه ثم يتم قياس الضوء المتشتت دة عند زاوية 90° و معايرة الجهاز بتتم عن طريق محاليل معروف قيمة العكارة بتاعتها و اتبع تعليمات المعايرة اللى جاية مع الجهاز.

ثالثا:- Spectrophotometric Testing :-

و دى يا شباب بتبقى أجهزة تقوم فكرة عملها باختصار كدة _ علشان هنجيلها تانى _ على امتصاص أطوال موجية معينة من حزمة ضوء مسلطة على العينة اللي احنا عايزين نقيس تركيز مادة كيميائية معينة فيها ... بمعنى آخر يا شباب انى بحول المادة اللي أنا عايز أقيسها الى لون بكثافة معينة حسب تركيز المادة فى العينة و اللون ينتج من تفاعل ال Reagents أو ال Kits مع المادة دى بالطريقة اللي جاية معاها فى Pamphlet اللي هي طريقة تحضير العينة فى أنابيب الإختبار علشان بعد كدة أنقلها فى ال Cuvettes اللي هي الخلايا اللي بأضعها فى الجهاز علشان أسلط عليها حزمة الضوء اللي هتقيس لى تركيز المادة اللي عندى.

بالطريقة دى يا شباب أقدر أقيس أى مادة كيميائية بقى بالتفصيل فى عينة المية اللي عندى بدل ما أضطر الى قياسها بالمعايرة و فلاسكات و سحاحات و اند بوينت و مش عارف اية ... لكن دة مش معناه أبدا ان المعايرة وحشة علشان مليانة حاجات كتير و بتستهلك وقت و عامل الخطأ البشرى وارد ... نفس الكلام بردو موجود فى أجهزة تحليل الطيف الضوئى بردو وارد انك تغلط و انت بتحضر العينة و وارد ان الجهاز يعطيك نتيجة خطأ نتيجة مثلا انه متعملوش معايرة بقاله كتير و هكذا ... فكل طريقة ليها مميزات و ليها عيوبها و الأهم اننا نختار الطريقة المناسبة لكل اختبار حسب الجدوى الإقتصادية بتاعته و دقة النتائج اللي تحصل عليها.

و دة جهاز HACH




و دة جهاز NOVA 60



و دلوقتى هنشرح بطريقة مبسطة الجهازين اللي فوق دول كنماذج لأجهزة ال Spectrophotometers

1) الجهاز الأول اللي على اليمين يا شباب اسمه Nova 60 ... فى الجهاز دة بتحضر عينتك برة فى أنبوبة اختبار حسب الطريقة اللي بتيجي مع كل Kit زى العلب المحوطة دى كدة و بعدين ننقلها فى ال Cuvette اللي هي أنبوبة كدة زى اللي فى الصورة و بنحطها فى الجهاز فى الحثة المنخفضة دى على اليمين بس علشان الجهاز يقيس العينة بنحط الأول ال ID بتاعها اللي هي بتحدد للجهاز الطول الموجى اللي بستخدمه مع الإختبار دة و بتبقى أنبوبة كدة مخصصة لكل اختبار يعنى مثلا الحديد له واحدة و الفلورايد له واحدة و هكذا و مكانها على الشمال كدة و هي باينة فى الصورة الجزء الأسمر دة اللي فوق.

هى دى ال Cuvette



(2) الجهاز التانى اسمه HACH و دة جهاز تانى بردو له Kits تانية و بردو العينة بتتضر فى أنبوبة اختبار برة و بعدين تنقلها فى الخلية كدة غير اللي محطوطة جمبه دى و بتحطها فى المكان بتاعها اللي متغطى دة و بتروح على البكرة اللي فى الجنب بتحدد انت بنفسك للجهاز الطول الموجى اللي يستخدمه للإختبار اللي بتعمله و الأطوال الموجية مكتوبة فى اللسته اللي فى الخلف دى و بعدين تقيس العينة على الجهاز.

(3) و دة اصدار أحدث من جهاز HACH ميزته ان له Touch Screen و الأطوال الموجية مخزنة عليه فقط انت بتختار الإختبار اللي انت عايز تعمله و الجهاز بيحدد الطول الموجى المناسب أوتوماتيكيا و بتحضر العينة برة فى أنبوبة اختبار و تنقلها فى الخلية اللي شبة بتاع الإصدار القديم و بتحطها فى الحتة المقوسة دى و تغطى و الجهاز بقرأ النتيجة و بتظهر على الشاشة و بيخزن النتائج و ممكن يعملها رسم بيانى كمان 😊 ... انا اشتغلت عليهم كلهم.



طب اية هى الإختبارات اللي ممكن أستخدم الأجهزة دى فيها فى معالجة المية مثلا؟؟

الإجابة :- حاجات كتير زي مثلا الفلورايد والنترات و النترا و السلفات و الأمونيوم ... الخ.

بقيت حاجة مهمة جدا جدا في ال Spectrophotometers ألا و هي فكرة عمل الأجهزة دي اية ، و ازاي بتشتغل لأن دي هي اهم ما في الموضوع ... انت راجل كيميائي واقف في معمل قدام جهاز زي دة فلانم تكون عارف طريقة تشغيله مش تحط كيماويات على بعضها و الجهاز يقرأ و خلاص لأ لازم تبقى فاهم.

كل مركب كيميائي يا شباب بيمتص كمية معينة من الضوء المسلط عليه عند طول موجي معين و الجهاز بيقاس الشدة الضوئية الممتصة من المركب الكيميائي دة علشان يحدد تركيزه في العينة اللي انت حاططهاله.


الأجهزة دي بتنقسم لنوعين يا شباب :-

- **UV-visible spectrophotometer** :- و دي بتستخدم أطوال موجية (185 – 400 nm) طولها قليل و طاقتها عالية علشان ترددها عالي و دة حيز الأشعة فوق البنفسجية - المرئية.
- **IR spectrophotometer** :- و دي بتستخدم أطوال موجية (700 - 15000 nm) طولها كبير و طاقتها قليلة لأن ترددها صغير و دة حيز الأشعة تحت الحمراء.

جهاز ال Spectrophotometer بيتكون من حاجتين من اسمه كدة:-

- **Spectrometer** :- و دة بيصدر حزمة من الضوء ليها range من الاطوال الموجية بتمر على عدسة علشان تخلي حزمة الضوء دي مستقيمة و مركزة على منشور ضوئي علشان يقسم الحزمة دي لعدة للأطوال الموجية اللي فيها و بيبقى فيه wavelength selector علشان يختار الطول الموجي المناسب للعينة.
- **Photometer** :- و دة اللي بيقاس كمية الفوتونات الضوئية الممتصة بواسطة العينة اللي في الجهاز اللي بتوازي تركيز المادة اللي انا عايز اقيسها في العينة.

و دي صورة بتوضح الكلام دة :-



و دلوقتي بقى عايزكم تعرفولى المعادلات دي :-

$$\text{Transmittance}(T) = I_t / I_0$$

المعادلة دي بنحسب بيها كمية الضوء المار في العينة حيث I_t هي شدة الضوء بعد المرور في العينة و I_0 هي شدة الضوء قبل المرور في العينة.

$$\text{Absorbance}(A) = -\log(T)$$

و المعادلة دى بنحسب بيها كمية الضوء الممتص بواسطة العينة بتاعتك. و منه بتقدر تحسب تركيز المادة اللى بتقيسها فى العينة بواسطة قانون بير لامبرت :-

$$A = \epsilon lc$$

حيث A هى ال Absorbance و ϵ Extinction Coefficient دة ثابت لكل مركب و l دة طول المسافة اللى بيقطعها الضوء و أخيرا C هى التركيز اللى احنا عيزينه و بنجيبه بالتعويض فى المعادلة.

ثانياً: Spectroscopy

هنتابع هنا فى الجزء دة شوية كلام عن ال Spectroscopy ... و دة يا شباب علم بيهتم بدراسة الأطياف الضوئية المنبعثة او الممتصة بواسطة شيء ما و حطيته هنا بعد الجزء بتاع ال Spectrophotometers علشان فكرتهم تقريبا واحدة فيبقى الكلام كله متصل ببعضه فى ذهن القاريء بدل ما نخليه فى باب لوحده.

أنواع الأطياف الضوئية:-

- طيف ضوئي مستمر: و دة الضوء الصادر منه بيبقى متوزع على كل الأطياف الضوئية الممكنة زى الضوء الأبيض كدة.



- طيف الإنبعاث: مجموعة من الخطوط الضوئية الصادرة عن مركب معين او مادة معينة.




- طيف الامتصاص: و دة عكس اللي فوق عبارة عن خطوط سوداء ناتجة عن امتصاص أطوال موجية معينة.



أنا عايزكم تعرفوا _ و الكلام ليا من قبلكم _ فى كل نوع من انواع ال Spectroscopy اللي هنتكلم عنها نظريته و كمان نعرف شكل ال Spectrogram بتاعه عامل ازاي على قد ما نقدر يعنى و بردو شكل ال Peaks على خفيف كدة و لية طلعت كدة او اللي عايز يتوسع بيبقى كتر خيره ☺.


هنبتدى أول حاجة بال UV Spectrum :-

لما الضوء بيسقط على عنصر او مركب معين او ال chromophore اللي هو المجموعة الوظيفية اللي بتمتص الطاقة بيخلى الكترونات التكافؤ يحصل لها اثاره excitation من ال ground state الى ال higher energy state لما بتمتص كمية الضوء المناسبة لها. و عندنا 3 انواع من مستويات الطاقة (سيجما) و دة اقل واحد للروابط الفردية و (باى) و دة اللي بعده فى الروابط الثنائية و الثلاثية ، و أخيرا (n) يوجد فى حالة ال Lone pair of electrons و دة أعلى واحد فى الطاقة اللي بيحتاجها علشان يثار ، و اول ما يمتصوا كمية الطاقة المناسبة ليهم بيحصل عندى التنقلات اللي انتوا شايفينها دى فى الصورة.




من الجهاز بتاع ال UV بيخرج شعاعين واحد بيمر على العينة و التانى بيمر على عينة مرجعية و الجهاز بيحسب الفرق فى الامتصاص بينهم و بيطلع لى ال Chart و بناءا عليه بتظهر عندى Peak على ال Spectrogram بتقولى انت عند الطول الموجى الفلانى حصل Absorbance بمقدار كذا و عند أعلى طول موجى حصل فيه absorbance الطول الموجى دة بسميه (λ_{max}) و كل مركب له (λ_{max}) خاصة بيه و منها اقدر اعرف المركب أو العنصر اللي عندى ممكن يكون اية.

طيب حتة حلوة كدة على السريع .. اية اللي بيخلى ال peak على ال Spectrogram تبقى sharp ولا broad ؟ قالك ان كل مستوى طاقة بيبقى فيه حاجة اسمها vibrational energy levels و دى الالكترونات بتتنقل بينها داخل مستوى الطاقة الواحد و دة اللي بيخلى ال peak تظهر واسعة board.



دّة شكل spectrogram بتاع برمنجانات البوتاسيوم.




من تطبيقات ال UV Spectroscopy على سبيل المثال فى صناعة الحديد و الصلب او السبانك عموما و حبيت اعمل tracing يعنى تتبع لعنصر فيها بجيب عينة و ادوبها على هيئة محلول ايونات العنصر دة و اشوف ال Spectrogram بتاعه. و كمان فى الاختبارات على آيضم أو هضم الدواء فى الجسم باخد عينات متفرقة من الدم من الجسم و بنفس الطريقة اللي فوق بقيسها علشان اشوفها وصلت للأعضاء المختلفة ولا لا و هكذا ...

هنخش بعد كدة على ال IR Spectroscopy :-

و النوع دة بنستخدمه علشان نعرف بيه المجموعات الوظيفية Functional Groups لمركب موجود معايا و مش قادر اتعرف عليه. و الفكرة قائمة على ان كل ذرة ليها حركة اهتزازية بتعتمد على كتلتها و طول و قوة الرابطة بينها و بين اخواتها. المركبات اللي ليها dipole و اللي ليها resonant frequency هي اللي بتقدر تمتص ال IR Radiation و يكون ليها Spectra . لما تمتص الذرة كمية مناسبة من الطاقة ذات تردد مساوى لتردد الاهتزاز بتاع روابطها بتبدي تعلن عن وجودها و تقول انا اهو و الجهاز بتاعنا بيقيس الكمية الممتصة من الطاقة علشان تخليها تعمل كدة بعد ما تحضر له العينة بالطريقة المناسبة اذا كانت صلبة ولا سائلة و غازية و دى قصة تانية حاولوا تقرأوا انتم عنها ... أهو غلاسة كدة ☺.

الجهاز دة بيخرج حزمتين, واحدة بتمر فى العينة اللي انا عايز اقيسها و بيخرج جزء اقل طبعا و التانية بتمر فى عينة مرجعية و ليكن هواء مثلا و الاتنين بيخرجوا على detector بيحسب الفرق بين الاتنين و بيعرض لنا ال spectrogram.



كل ما المركب بيبقى كبير و فيه مجموعات وظيفة كتير بيبقى من الصعب شوية انك تميزه من ال Spectrogram بتاعه بحيث انك ممكن تتلخبط فى شكل ال peak اللي ظهرت لك و تقول ان فى مثلا C=O و هي مش موجودة علشان كدة قالك ان فى اربع مناطق ممكن نتنبأ باللى هيظهر فيهم:-


• 4000–2500 cm⁻¹ :- عندها بيحصل امتصاص الروابط الفردية مع الهيدروجين زى C-H, O-H, N-H

• 2500–2000 cm⁻¹ :- عندها بيحصل امتصاص الروابط الثلاثية زى C≡C, C≡N

• 2000–1500 cm⁻¹ :- عندها بيحصل امتصاص الروابط الثنائية زى C=C, C=O

• 1500–400 cm⁻¹ :- و دى بيسموها ال fingerprint لأن المجموعات الوظيفية اللي بتظهر فيها بتكون فى مركب معين غير مشابهة لأى مركب آخر دة فى غالب الأحوال علشان كدة بتكون مميزة للمركبات زى الفينول مثلا زى ما انتم شايفين كدة فى الصورة دة ال Spectrogram شايفين ال Peak بتاع ال O-H و ال Aromatic C-H اللي جنبها الصغنة المدببة دى و باقى ال Peaks فى


ال **fingerpint region** ... حاولوا تعرفوا الكلام دة يا شباب ☺ و انا قبلكم لأنه مهم يعنى ازاي الواحد تقع فى ايده **chart** ميعرفش يقرأها .. عادى اية المشكلة بس العلم نور على كل حال ☺.



قالك طالما كدة بقى احنا نعمل زى مرجع كدة نشوف كل مجموعة وظيفية من اللي نعرفهم ظهرت فين و نسجل الكلام دة علشان نعرف نفرق بين المركبات بعد كدة و كانت النتيجة زى ما هتشفوفوا فى الصفحة اللي جاية .. لسة هقعد اقول بقى الشكل رقم كذا يوضح كذا ... يا راجل كبر مخك ☺.

المهم بقى تطبيقات ال **IR Spectroscopy** اية؟؟ .. قالك لقوا ان البكتريا و الفيروسات و الطحالب و حتى الأميبا ممكن نعرفها من ال **Spectra** بتاعها اللي بيظهر على هيئة **broad complex contours** لأن ال **DNA, RNA** فيها بيمتص ال **IR Radiation** ولا **confirmation tests** ولا غيره ☺ .. و كمان قالك اننا ممكن نربط الميكروسكوب الضوئي بتكنولوجيا ال **FTIR Spectroscopy** _ دوروا عليها ☺_ و اللي مبتحتاجش **monochromator** زى العادى لفصل طول موجى معين لأنه أصلا بيخرج منه طول موجى واحد على طول و بالتالى بيبقى اسهل و اسرع فى الوقت فى دراسة الحاجة اللي عايزين نشوفها تحت الميكروسكوب و الحصول على ال **Spectrogram** بتاعها. و عندك بردو الصناعات الغذائية و صناعة الدواء و أى حاجة بيدخل فيها مادة فعالة... المفروض صاحبها اللي هو **Patent** ليها يعنى هو اللي اخترعها بيروح يسجلها بال **IR Spectroscopy** بتاعها منعا لسرقتها بعد كدة علشان بتنفقس لو حد حب يقلدها فى الغالب مبتطلعش زى الأصلية .. و هكذا

Table 3 Correlation table for infrared spectroscopy



هندخل بعد كدة على ال NMR Spectroscopy :-


هنا بقي بدخل على حاجة جديدة اسمها Nuclear Magnetic Resonance الرنين النووي المغناطيسي و دة بنعرف بيه يا شباب الذرات المرتبطة بذرة معينة فى مركب واحد من خلال تعريض الذرة دى لمجال مغناطيسي و اشعاع و دة بيساعد جدا جدا فى استنتاج المركب اللى معايا لو كان مجهول أو تأكيده لو كنت عارفه و هنشوف ازاي الكلام دة.

النظرية بتقول ان الدوران المغزلي *spining motion* لأنوية العناصر حول محورها بيولد عزم مغناطيسي (M) magnetic moment، بيخلي الأنوية دى لما توضع بين قطبي مجال مغناطيسي خارجى ، يعمل لى انفصال *splitting* طاقة الحركة المغزلية لمستويين طاقيين مختلفين على أساس اتجاه العزم المغناطيسي بتاع الحركة المغزلية وهما:- مستوى طاقة منخفض *Low energy* وهنا بيكون العزم المغناطيسي فى اتجاه المجال المغناطيسي الخارجى. و مستوى طاقي مرتفع *High energy level* وهنا بيكون العزم المغناطيسي فى اتجاه مضاد للمجال المغناطيسي الخارجى.

الأنوية بتوضع فى مجال مغناطيسي خارجى ويسلط عليها أشعة الراديو *Radiowave* فتمتصها الأنوية وتنتقل لمستوى الطاقة الأعلى ويحصل تغير فى اتجاه الحركة المغزلية للنواة و بعدين ترجع الأنوية من المستوى العالى فى الطاقة الى المستوى المنخفض مرة أخرى وهكذا ويطلق على هذه الظاهرة ظاهرة الرنين النووي المغناطيسي. وامتصاص الطاقة دة بنقدر نكشف عنه ونكبره ويطلق عليه إشارة الرنين المغناطيسي *resonance signal*. الأنوية اللى لها خواص مغناطيسية قوية و لها تطبيق عملى لإمكانية تحليلها بواسطة مطياف NMR بتبقى زى: الهيدروجين 1H ، والكربون ^{13}C و دول اشهر حاجة بالاضافة كمان بعض العناصر زى البورون ^{11}B ، والفلور ^{19}F ، والفوسفور ^{31}P .


كمثال على ال NMR Spectroscopy هناخد ال 1H :-

توزيع أنوية ذرات الهيدروجين فى مركب معين عندى بيؤدى إلى وجود الأنوية دى فى ظروف أليكترونية مختلفة بالنسبة لتوزيع الأليكترونات فى الرابطة بين نواة الهيدروجين والذرات الأخرى. الفرق دة فى التوزيع الأليكترونى بيؤدى إلى امتصاص الأنوية لل *Radiowave* على ترددات مختلفة و بالتالى عدد الإمتصاصات يعبر عن الارتباطات المختلفة لذرات الهيدروجين فى الجزئ زى مثلا $-CH_3$ & $-CH_2$ & $-OH$ - كل واحدة ليها ظروف الكترونية مختلفة عن التانية و بالتالى امتصاص كل واحدة فيهم بيبقى على تردد مختلف عن التانية و بالتالى نعرف ان المركب دة مثلا فيه كذا و كذا من الذرات المحيطة بذرة الهيدروجين و زيها بالظبط لما نجى نعمل لل ^{13}C و غيره من انواع ال NMR.



جهاز ال NMR يتكون من مغناطيس اما دائم أو كهربى و وحدة تغيير شدة المجال المغناطيسى اللى هو الملف اللى فى الصورة دة و وحدة انتاج ال Radiowave و وحدة وضع العينة و أخيرا ال Detector بتاع الترددات اللى بيكبرها و يسجلها.

و دة شكل ال ^1H NMR لل Ethanoic acid



الكلام فى ال NMR اكبر و أعقد بكتييبيبيير من ان اى حد يلخصه فى صفحتين ثلاثة علشان كدة دايما بأكد على ان الكلام دة مجرد اعطاء فكرة مبسطة جدا للى عايز يتوسع فيه.


وبالنسبة للتطبيقات بقى ال NMR دانما ما يستخدم فى اثبات التركيب للمركبات elucidation لأنه وسيلة تأكيد قوية جدا و من الناس اللى بيستخدموه ال R&D فى الشركات و بتوع المنتجات الطبيعية Natural Products اللى بيشتغلوا على فصل مستخلصات من نباتات طبية و عايزين يشوفوا اذا اكتشفوا مركب جديد من نبات معين و دة فى حد ذاته انجاز أصلا بيتسجل باسم صاحبه_ و يا سلام بقى لو لقوا له فاعلية طبية بيبدأوا يثبتوا تركيبه بوسائل ال Spectroscopy المختلفة و على رأسهم ال NMR طبعا علشان بيدأوا رحلة تصنيعه معملياً للإستفادة منه حسب فاعليته على نطاق أوسع اذا كان دواء مثلا و لا أى حاجة تانية.

و من أشهر تطبيقات ال NMR هو ما يسمى بال MRI Magnetic Resonance Images أشعة الرنين المغناطيسى اللى كلنا عارفينها او سمعنا عنها و شالوا كلمة نووى Nuclear من الاسم ... ممكن أعرف اللى


شالها شالها لية؟؟ فيها اية فهمنا الناس انهم مش داخلين مفاعل نووى ولا حاجة و ان الجهاز دة مش جهاز عنقودى شديد الانفجار عبارة عن كتلة من القنابل النووية و اى حاجة من دى دة جهاز أشعة عادى ، فيها اية لو الاشعة اسمها بقى **Nuclear Magnetic Resonance Imaging NMRI** اللى اخترع الجهاز هيخس يعنى لو حط الكلمة، دة حاجة عجيبة قوى ... أنا متضايق جدا من الموضوع دة.

المهم .. الجهاز بيبقى ضخم يتسع لإنسان كامل يدخل فيه وبيستخدم المجال المغناطيسي وأمواج الراديو للحصول على صور دقيقة وثلاثية الأبعاد تمكن الطبيب من رؤية الأجزاء الداخلية لجسم الانسان من عظام ومفاصل والدم وخصوصا الأنسجة الرقيقة مثل المخ والغضاريف بدون استخدام X-rays أو حقن بالأصبغ لتوضيح الصور و بالتالى يقدر يكتشف التغيرات اللى طرأت أو قد تطرأ على أعضاء وأنسجة الجسم نتيجة لمرض ما بالمقارنة مع الأعضاء السليمة. الجهاز بيعتمد على ذرة الهيدروجين فى التصوير لإحتواء الجسم على كمية كبيرة منها بسبب الماء اللى بيتكون منه الجسم كله. بيدخل المريض للجهاز بدون اى اشيء معدنية و بيفضل ثابت متمسك طول فترة ال Scanning اللى ساعات بتطول حسب نوع الفحص المطلوب لأن اى حركة ممكن تسبب تشوه للصورة ... و دى صورة كدة زى ما هو مكتوب مقارنة بين واحد عنده 25 سنة طبيعى و التانى عنده 78 سنة مصاب الزهايمر أعاذنا الله و اياكم من كل سوء ... الصورة للتوضيح و تفسيرها للمختصين ☺

MRI BRAIN IMAGES




Normal 25
years old



Alzheimer Disease
78 years old

و أخيرا هندخل على مطياف الكتلة او Mass Spectroscopy

فكرة عمل مطياف الكتلة هي انه سيتم تعريض العينة لحزمة من الالكترونات عالية الطاقة (حركتها سريعة يعنى) فتقوم مكسرة العينة لأيونات موجبة لأنها بتخليها تفقد الكترون أو أكثر و كمان بتكسر الروابط الضعيفة فى المركب اللى فى العينة. الأيونات الناتجة عن التكسير دة بتكون مختلفة عن بعضها فى الكتلة و الشحنة m/e و على الأساس دة بيتم فصلهم بواسطة مجال مغناطيسي أو مجال مغناطيسي كهربى. اذا اهم حاجتين بيحصلوا فى ال Mass Spectroscopy هما عملية التأين Ionization اللى ينتج عنها ما يسمى بالأيونات الجزيئية Molecular Ion لأن المركب كله بيتحول لأيون بفقد الكترون أو اثنين ثم عملية ال Fragmentation و اللى بيتم فيها تكسير الأيونات الجزيئية دى لأيونات أصغر و مختلفة فى الكتلة نتيجة تكسير الروابط الضعيفة فى المركب زى ما قلنا. مطياف الكتلة دة ببسهل عليا معرفة الوزن الجزيئى للمركب اللى فى العينة بتاعتى بالإضافة الى انه بيعطينى فكرة عن تركيب المركب دة من خلال معرفة مواضع تكسر الروابط الضعيفة فيه و فى الشكل دة تركيب جهاز مطياف الكتلة.



تركيب أجهزة مطياف الكتلة :-

1. وحدة وضع العينة Sample handling system سواء صلبة أو سائلة أو غازية و كل واحدة ليها احتياطاتها و الجهاز بيقيس كميات قليلة جدا تظل لميكروجرامات من العينة.


2. **حجرة التأين Ionization chamber** و العينة اللي رايحة لغرفة التأين لازم تكون فى الصورة البخارية (السائلة أو الصلبة بتتحول الأول لغازية بالتسخين و الصهر) و بعدين بيتم تقليل الضغط مرتين على الأقل من مكان وضع العينة عن طريق تفريغ الهواء بوحدة تفريغ. بعد كدة بيتم تسليط حزمة من الالكترونات بطريقة تسمى التصادم الأيونى_ و فى طرق تانية_ تؤدى الى تأين العينة و تكسيرها و دة بيخليها تتنافر مع بعضها لأنها كلها موجبة و الجهاز بيركزها فى صورة حزمة واحدة عن طريق الفرق فى جهد التعجيل علشان تدخل بعد كدة وحدة الفصل.

3. **وحدة فصل أو فرز الأيونات Ion analyzer or separator** و هنا بيتم فصل كل الأيونات بدقة شديدة جدا على أساس الاختلاف فى نسبة الكتلة / الشحنة (m/e) عن طريق مجال مغناطيسي قوى يجذب الأيونات الموجبة دى حسب كتلتها و شحنتها بالتتابع مع تثبيت فرق جهد التعجيل للحصول على حزمة أيونات واحدة كل مرة و بتغيير فرق الجهد بقدر احصل على كل الأيونات بأحجامها و شحنتها المختلفة علشان اشوف طيف الكتلة بتاعهم ... و فى طرق تانية بردو.

4. **وحدة جمع الأيونات Ion collector** و دى الأيونات بتدخلها بالتتابع كدة بعد فصلها بالتتابع زى ما شرحنا علشان نبدأ مرحلة تسجيلها.

5. **وحدة تسجيل Recorder** و هنا بقى بتبدي رحلة التعرف على الأيونات اللي اتكونت و أهمهم ال molecular ion لأن كتلته بتبقى بالظبط زى كتلة المركب بتاعنا فى العينة بس فقد الكترون و زى ما انتوا عارفين كتلة الالكترون تكاد تكون معدومة علشان كدة الايون الجزيئي بيبقى هو المركب بتاعنا و بيبظهر له Parent Peak تعبر عنه و باقى الأيونات بيتم تسجيلهم بطرق مختلفة زى لوحة فوتوجرافية أو خلايا ضوئية و كل واحدة فيهم ليها مميزاتها و ممكن تقرأوا عنها و فى الصورة شكل مطياف الكتلة 2-methyl butane. ال m/z دى هي ال m/e الكتلة / الشحنة.

من تطبيقات مطياف الكتلة هو امكانية ربطه مع ال Gas chromatography لعمل مطياف الكتلة للغازات المفصولة بالكروماتوجرافى فى جهاز واحد يسمى GC-MS.



الباب السادس
الكروماتوجرافى
Chromatography

الكروماتوجرافى

الكروماتوجرافى باختصار هى تكنيك لفصل المركبات الموجودة فى خليط اعتمادا على درجة ادمصاصها على سطح مادة تانية أو ذوبانها فى مذيب. كل الطرق الكروماتوجرافية تعتمد على حاجتين ال stationary phase و دى بتبقى ثابتة و ال mobile phase و دى بتبقى متحركة.


و من غير مقدمات كتير ملهاش لزمة هندخل على طول فى طرق الكروماتوجرافى المختلفة.

أولا:- Paper chromatography و ده هو أبسط طريقة من طرف الفصل و فيه بتقوم جايب الخليط بتاعك و تاخذ منه نقطة و تحطها على filter paper و تسيبها لما تنشف و تحطها فى كاس مشبع بالمذيب اللى انت مختاره بعناية تبعاً ل polarity بتاع المواد اللى انت متوقع تلاقيها أو اللى انت عارف انها موجودة فى الخليط اللى فى النقطة دى. طيب اية ال stationary phase هنا؟؟ هى مجازا الفلتر أو الورقة و ال mobile phase هو المذيب.

Retention Factor (R) :- هو المسافة المقطوعة بواسطة المركبات المفصولة على الورقة مقسوما على المسافة اللى قعها المذيب على الورقة .. زى الصورة دى كدة

$$\text{Retention ratio} = \frac{\text{distance moved by solute}}{\text{distance moved by solvent}} = R_f$$

So as long as the correct solvent and type of chromatography paper are used, a component can be identified from its retention ratio (Fig. 6).



وارد انك تلاقى مركبين ليهم نفس قيمة ال (R) لكن فى الواقع لو انت استخدمت مذيب تانى و فصلتهم بيه هتلاقى كل واحد له قيمة مختلفة عن التانى علشان كدة يفضل فى ال paper chromatography انك تعمل التست بتاعك بأكثر من مذيب و الطريقة دى أصلا بتبقى Qualitative يعنى بس بتعرفك الخليط بتاعك مكون من اية من المركبات.

ثانياً: Thin layer chromatography (TLC)

و الطريقة دي زى ال PC بالظبط مش هنرغى فيها كثير لكن هنا ال Sationary phase بيبقى silica gel مثبتة على لوح زجاج مثلاً ... حضرتك لما بتحضر اللوح ده اللي عليه ال silica gel و تنشف عليه بتقوم (زى ال PC) و اخذ خط من تحت و منقط المخلوط بتاعك اللي انت عايز تفصله على الخط ده و تسيبه ينشف و بعدين تروح حاظه فى حاوية مقفولة مشبعة بالمذيب بتاعك اللي هتفصل بيه ... لية ال TLC أحسن من ال PC علشان الفصل فيها بيبقى أجود لأن حبيبات السيلكا جل بتبقى المسام بينها ضيقة قوى فتسمح بمرور من يستحق المرور فقط من المركبات حسب زى ما قلنا درجة ال polarity و ال الامصاص بتاعها على السيلكا جل.

و أول ما تلاقى المذيب بتاعك وصل لقمة اللوح اللي بتفصل عليه تبدأ تشوف كل ال (R) بتاعة كل مركب أو كل section من اللي اتفصلوا قدامك .. ممكن تستخدم لمبة UV أو spays معينة علشان تعرف تحدد المسافة اللي المركبات اللي عندك ملهاش لون مشيتها على اللوح اللي هي ال R .. دوروا على طريقتها ☺

من أهم استخدامات ال TLC هو فصل ال intermediate states للتفاعلات الكيميائية المختلفة لدراستها و ده استخدام فى غاية الأهمية لأن دي بتبقى مراحل مؤقتة فى التفاعل الكيميائي و بيفوتك انك تتعرف عليها فسيادتك المفروض بتتابع التفاعل بتاعك كويس و تاخذ منه عينات كل فترة تفصلها علشان تشوف هل فى Spots جديدة ظهرت دلالة على مركب جديد مختلف عن الناتج اللي انت متوقعه ولا لا؟؟ طب دي أعرها ازاى؟؟ بإنك تحط نقطتين واحدة تكون للمتفاعلات و واحدة للنواتج كنقط مرجعية و تفصل قصادهم عينات من التفاعل كل فترة و لو طلع لك spots جديدة فى غير الاماكن المعتادة يبقى كدة انت عندك حاجات جديدة اتكونت يادوب تلحق تقصها من على لوح ال TLC و تدوبها علشان تبدأ رحلة التعرف عليها ☺

ثالثاً: Gas chromatography (GC)


هنا يا كبير منك ليه بيبقى ال mobile phase بتاعتنا عبارة عن غاز و ال stationary phase عبارة عن يا اما مادة صلبة فييسموه Gas- Solid adsorption أو سائل غير متطاير بيبقى اسمه Gas-Liquid partition. و الطريقة دي بنستخدمها لفصل خليط من الغازات أو تحميل مادة ممكن تحويلها الى غاز و فصلها عن طريق تمريرها على عمود بيحتوى زى ما قلنا اما على مادة صلبة أو مادة سائلة.

بتيجي سيادتك حاقن العينة بتاعتك فى حاجة مطاط كدة زى سدادة من السيلكون بتلتنم تلقائياً أو حجرة مخصصة لحقن العينات قبل عمود الفصل و بيجي الغاز الحامل زى الهيليوم أو النيتروجين الجاف يروح ناقلها و ممشيها فى العمود اللي فيه ال stationary phase اللي هتفصل الخليط ده من الغازات و بيبقى معمول بطريقة تحافظ على درجة حرارة خليط الغاز أو خليط المادة اللي أنا حولتها الى غاز ثابتة.

بعد كدة بيخرج الخليط المفصول على ال detector علشان نبتدى نحدد محتوياته تبعاً برودو لل R بتاعته اللي هي المسافة المقطوعة للغاز خلال عمود الفصل لحد ما توصل لل detector و بتعتمد على الآتى:-

- معدل سريان الغاز الحامل للخليط.
- درجة حرارة عمود الفصل
- طول و قطر عمود الفصل
- طبيعة ال stationary phase و المادة المفصولة و طريقة تفاعلهم مع بعض.
- درجة تطاير المادة المفصولة.

و دى صورة لتركيب جهاز ال Gas chromatography :-




رابعاً: Liquid chromatography (LC)

و دى طريقة بتستخدم سائل ك mobile phase و ال stationary phase بيبقى مادة صلبة زى ال silica gel متعبية بردو فى عمود فصل Column و مهم قوى قوى انه يبقى متعبي كويس علشان مييقاش فيه فقاعات هواء أو cracks و مشبع بال solvent و يتحط فى آخره قبل الحنفية كدة حتة قطة كويسة قبل ما تعبي طبعا العمود بالسيلكا جل علشان الطبقات المفصولة متسدش الحنفية و هى نازلة .. و تسيب الخليط اللي انت حطيته ينزل و يتفصل باستخدام الجاذبية الارضية.

بعد كدة بتبدأ تجمع الطبقات اللي اتفصلت دى طبقة ورا طبقة و هى نازلة من الحنفية فى أنابيب اختبار تكون مجهزها قبل كدة و معلمها و تبقى مركز كويس علشان انت مش حمل خسارة جزء من الخليط اللي بتفصله لو كان بأحجام صغيرة علشان ساعات بيبقى من نباتات طبية مش متوفرة و المستخلص بتاعك منها بيبقى حاجة بسيطة خالص فأهم حاجة هنا ال Perfect handling.

لو كان المخلوط بتاعك فى مركبات أو طبقات ملونة بيبقى خير و بركة و لو مفيش بتلجأ لل UV علشان تعرف تحدها 😊. و دى صورة لعمود الفصل بمكوناته.



database بكل قيم ال R للمركبات المختلفة بحيث لما يتفصل عندك حاجة يميزها ... و ال HPLC بيقدر يفصل كميات صغيرة جدا من العينات و دقته عالية تتين علشان كدة بيستخدم معاه أجهزة ال Spectroscopy المختلفة زي ال IR & UV & MS و غيرهم.

استخدامات الكروماتوجرافى :-

غالبية استخدام تطبيقات و أجهزة الكروماتوجرافى المختلفة بتبقى فى الأبحاث العلمية دة أول حاجة طبعا فصل مخاليط مختلفة و ليكن مثلا من نبات بيستخدم فى الطب الشعبي ethnopharmacology فى علاج مرض معين بيبتدى الباحث ياخذ النبات دة ياخذ منه مستخلص بانه يغليه أو ينقعه فى مية أو مذيب آخر المهم بياخذ المستخلص بتاعه و بيبتدى الأول يتعرف على مكوناته من خلال ال PC و ال TLC ثم يفصله لطبقات عن طريق ال LC ثم أخيرا يتعرف على كل مركب على حدة باستخدام أدق حاجة بقى اللى هى ال HPLC ثم لما يفصل المستخلص دة كل مركب لوحده بيبتدى بقى يشوف لو كانوا مفصولين قبل كدة بيعرف من خلال قيمة ال R بتاعته أما لو مش مفصول قبل كدة بيبقى يا سعه يا هناء لأن أمه بتبقى داعية له ساعتها لأنه قدر يكتشف مركب جديد NEW COMPOUND و بيبتدى معاه رحلة اكتشاف تركيبه الكيميائي باستخدام وسائل السبكتروسكوبى المختلفة علشان يسجله بإسمه ... لأنه بيبقى بمثابة عيل من عياله بمعنى الكلمة ☺ و يشوف له فاعلية طبية علشان يعالج المرض اللى كان جدى و جدك بيعالجوه بيه و بيبتدى يصنعه معمليا ثم صناعيا على نطاق واسع للمرضى بدون أى احتكار أو ارتفاع أسعار أو شحان فى السوق و كدهون ☺

نفس الكلام بنلاقيه فى صناعات الأغذية انك تجيب منتج معين تفصله علشان تعرف اذا كان فعلا متصنع طبقا للمواصفات و لا لأ و اذا كان فعلا بيحتوى على كل المكونات اللى موجودة على ال label و بتركيزاتها المكتوبة عليه ولا لأ و هكذا و نفس الحال فى الأدوية بردو.

و ممكن بردو نستخدم الكروماتوجرافى فى لبينة بانك تشوف عينات المياة و الهواء فى حنة معينة أو التربة سواء زراعية أو فى أى مكان آخر و مقدار التلوث فيها و كدة و اية الملوثات اللى موجودة علشان نبتدى نحط خطط للتغلب عليها.

دى كانت معظم ال Guidelines اللى حبيت أقولها فى الكروماتوجرافى للى ميعرفوش و تبقى بداية للى عايز يتوسع و يتخصص فيه مثلا بأى طريقة شغل أو بحث ... و بعيد و بزيد انى متعمد مقولش كل حاجة علشان لو فتحنا فى كل موضوع مش هنخلص بالمعنى الحرفى للكلمة ☺

المراجع

المياة القلوية المتأينة •

<http://www.alkhayma.com/waterionizer.htm>

ISO 9001 •

http://www.iso.org/iso/qmp_2012.pdf

ISO 18000 •

<https://www.iso.org/obp/ui/#iso:std:iso-iec:18000:-1:en>

ISO 14000 •

<https://www.iso.org/obp/ui/#iso:std:iso:14001:ed-2:v1:en>

Root Cause Analysis •

<http://www.financepractitioner.com/contentFiles/QF02/g1xtn5q6/12/0/statistical-process-control-for-quality-improvement.pdf>

http://www.tuv-nord.com/cps/rde/xbcr/SID-926CD5F4-935229F0/tng_be_nl/bijlage-nieuwsbrief-januari-2013-brc-understanding-root-cause-an.pdf

HACCP •

[/http://www.fda.gov/Food/GuidanceRegulation/HACCP](http://www.fda.gov/Food/GuidanceRegulation/HACCP)

GMP & GLP •

<http://www.chem.agilent.com/Library/primers/Public/59886197.pdf>

Lean Manufacturing & 5 S •

<http://www.epa.gov/lean/environment/methods/fives.htm>

Microbiology •

http://www.sartorius.com/fileadmin/fm-dam/sartorius_media/Lab-Products-and-Services/Microbiology/Microbial-Enumeration/Nutrient-Pad-Sets-and-Membranes/Brochures/Broch_Microbiological_Testing_SM-4017-e.pdf

FSSC 22000 •

<http://www.fssc22000.com/documents/support/downloads.xml?lang=en>

الأوشا •

[/https://www.osha.gov/dte/public_sector](https://www.osha.gov/dte/public_sector)

الاسعافات الأولية : هيئة الاسعاف المصرية •

<http://www.eao.gov.eg/Arabic/FirstAid/Pages/HowToSaveALife.aspx>

Ultraviolet/visible spectroscopy •

<http://media.rsc.org/Modern%20chemical%20techniques/MCT4%20UV%20and%20visible%20spec.pdf>

Infrared spectroscopy •

<http://www.rsc.org/learn-chemistry/resource/res0001299/infrared-spectroscopy?cmpid=CMPO0002748>

Nuclear magnetic resonance spectroscopy •

<http://media.rsc.org/Modern%20chemical%20techniques/MCT2%20NMR.pdf>

Mass spectrometry •

<http://media.rsc.org/Modern%20chemical%20techniques/MCT1%20Mass%20spec.pdf>

Chromatography •

<http://media.rsc.org/Modern%20chemical%20techniques/MCT5%20Chromatography.pdf>

نصائح عامة

- أوصى نفسي و أوصيكم بما وصى الله به عباده الأولين و الآخرين فقال سبحانه :- { وَ لِلّٰهِ مَا فِي السَّمَاوَاتِ وَمَا فِي الْأَرْضِ ۗ وَلَقَدْ وَصَّيْنَا الَّذِينَ أُوتُوا الْكِتَابَ مِنْ قَبْلِكُمْ وَإِيَّاكُمْ أَنْ اتَّقُوا اللَّهَ ۚ وَإِنْ تَكْفُرُوا فَإِنَّ لِلّٰهِ مَا فِي السَّمَاوَاتِ وَمَا فِي الْأَرْضِ ۗ وَكَانَ اللَّهُ غَنِيًّا حَمِيدًا (131) } النساء

- عن أبي العباس عبد الله بن عباس قال كُنْتُ خَلْفَ رَسُولِ اللَّهِ صَلَّى اللَّهُ عَلَيْهِ وَسَلَّمَ يَوْمًا فَقَالَ " يَا غُلَامُ إِنِّي أَعَلِمْتُكَ كَلِمَاتٍ أَحْفَظُ اللَّهُ يَحْفَظُكَ اللَّهُ تَحُدُّهُ تَجَاهُكَ إِذَا سَأَلْتَ فَاسْأَلِ اللَّهَ وَإِذَا اسْتَعَنْتَ فَاسْتَعِنْ بِاللَّهِ وَاعْلَمْ أَنَّ الْأُمَّةَ لَوِ اجْتَمَعَتْ عَلَى أَنْ يَنْفَعُوكَ بِشَيْءٍ لَمْ يَنْفَعُوكَ إِلَّا بِشَيْءٍ قَدْ كَتَبَهُ اللَّهُ عَلَيْكَ رُفِعَتِ الْأَقْلَامُ وَجَفَّتِ الصُّحُفُ " رواه الترمذي ، وأحمد ، وصححه الألباني في صحيح الجامع برقم (7957)

- إياكم و اليأس يا شباب ... اليأس خيانة لنفسك و خيانة لأخلاقك ... اليأس جريمة لازم يتعملها قانون يعاقب عليها ... اليأس كبيرة من الكبائر يقول جل ثناؤه :- { يَا بَنِي آدَمَ اتَّقُوا اللَّهَ ۖ فَتَحَسَّسُوا مِنْ يَوْسُفَ وَأَخِيهِ وَلَا تَيَاسُّوا مِنْ رُوحِ اللَّهِ ۚ إِنَّهُ لَا يَيَاسُ مِنْ رُوحِ اللَّهِ إِلَّا الْقَوْمُ الْكَافِرُونَ (87) } يوسف

و يقول أيضا سبحانه و تعالى :- { قَالَ وَمَنْ يَقْنُطْ مِنْ رَحْمَةِ رَبِّهِ إِلَّا الضَّالُّونَ (56) الحجر

- اتمسكوا بكل لحظة أمل عندكم و اياكم تفقدوا الأمل أبداً حتى لو الدنيا كلها مقفولة و سودة بردو لسة فيه أمل و لسة فيه نور و لسة نقدر نكمل

- اجتهدوا يا شباب فى اللى بتعملوه و كل واحد بيشتغل ولا بيذاكر يا ريت يعمل كدة بضمير و ربنا مش هيضيع تعبته أبدا .

- احتسبوا نية عن كل حاجة بتعملوها علشان يبقى أجرها مضاعف والواحد ممكن يوصل بنيته للحاجات اللى ميقدرش يوصلها بعمله فى الدنيا و الآخرة فقط بنية سالحة و سريرة طيبة و اخلاص لوجه الله عز و جل و دون أحد من عباده علشان ميبقاش رياء و سمعة نعوذ بالله من ذلك .

